



BIBLIOTECA NAZ.
Vittorio Emanuele III

II

6

OLI

63

XLI


o

20

















Autore N. P. Jacobi Terranova



76.
VINDICIÆ
KEMPENSES


ADVERSUS

R. P. FRANCISCUM DELFAU

MONACHUM AC PRESBYTERUM

CONGREGATIONIS S. MAURI.

*Auctore R. P. Canonico Regulari
Congregationis Gallicanæ.*



PARISIIS,

Apud SEBASTIANUM MABRE-CRAMOISY,
Regis Typographum, viâ Jacobæâ,
sub Ciconiis.

M. DC. LXXVII.

CUM PRIVILEGIO REGIS.

THE HISTORY OF THE

ROYAL SOCIETY OF LONDON

FROM ITS ORIGIN TO THE PRESENT TIME

IN TWO VOLUMES

BY JOHN HENRY MAWSON


ESQ. F.R.S.

LONDON: PRINTED BY J. ALLEN, 10, BLENHEIM STREET, W. 1895



PRINTED BY J. ALLEN, 10, BLENHEIM STREET, W.

1895



LECTORI BENEVOLO

P R Æ F A T I O.

LITIS hujus & controversiæ de autore *Fabula Ger-*
librorum de Imitatione Christi, quæ RR. *seniana ortus,*
PP. Benedictinis cum Canonicis Regularibus, *progressus, &*
jam ab annis quinquaginta & amplius inter- *finis; simul-*
cedit, hoc initium, hic progressus, finis de- *que operis ne-*
nique & exitus is hætenus fuit. Anni sunt *cessitas, & ordo.*
circiter sexaginta-quinque supra ducentos, ex
quo primùm in Germaniâ inferiore, aureum
illud de Imitatione Christi opus, castæ pia-
rum deliciæ mentium, in lucem prodiit au-
tore Thoma de Kempis Canonico Regulari.
Ab eo tempore, mirum profectò, quàm in-
credibili celeritate, per reliquas omnes Eu-
ropæ regiones & oras libellus ille pervaserit.
Legerunt eum omnes: quotquot autem lege-
runt, rapuerunt, quia rapiebantur cùm lege-
bant. Quippe, ut verbis autoris ipsius di-
cam, liber iste, sermoni divino simillimus,
parvus est dictu, sed plenus sensu, & uber in Lib. 3. cap. 23.
fructu.

Seq̃ quod in rem præsentem præcipuè ve-
nit, nemo unquam, in tantâ litterarum lu-
ce, in hac scribendi & liberè de rebus sive
â iiij

P R Æ F A T I O.

obscuris sive dubiis pronunciandi libertate; quæ postremis duobus hisce sæculis tam late obtinuit; nemo, inquam, repertus est unquam, cui venire in mentem potuerit, libellum hunc, alterius, quàm Thomæ Kempensis Canonici Regularis fœtum esse verum ac germanum.

Nam quòd Ludolpho Carthusiano semel forsitan & iterum; quòd D. Bernardo sæpè; quòd Joanni Gersoni inclito Parisiensis Academix Cancellario sæpiùs adscriptus; quòd denique nullo Autoris nomine insignitus sæpissimè prodierit: Typographorum istud, nihil, vel in ipsis sanctissimorum Patrum opusculis, non in dies simile committentium, dolus aut error exitit. Adeoque rem ita se habere viris omnibus eruditis persuasum erat, ut nullus unquam de eâ secus, aut sentiendum, aut loquendum esse sibi toto illo ducentorum annorum decursu existimaverit; nullusque non arbitratus fuerit, parum referre, si libellum hunc, aut Gersonis, aut Bernardi, aut nullius auctoris nomine commendatum vulgus exciperet; modò præceptis uteretur quæ passim in eo, non aurea tantùm sed planè divina continentur. Dum tamen interim ejus auctori vero Thomæ de Kempis, laus & fructus industriæ pietatisque apud eos omnes constaret, quorum munus est, scriptorum censum & nomenclaturam exploratis diligenter singulorum rationibus instituere.

*Petravius,
Leo Allatus,
Lucas Holste-*

Verùm Cæctanus Monachus Benedictinus Italus, homo (ut doctissimi quique ætatis

P R Æ F A T I O.

nostræ Scriptores in eo reprehenderunt) adeo flagrantis, ardentisque, pro Ordinis sui gloriâ, zeli & studii, ut omnia ad ipsum per fas atque nefas, trahere nihil interdum vereretur: rem sodalibus suis, majorem in modum gratam, totique Ordini suo perhonorificam facturum se arbitratus est, si opus de Imitatione Christi, Benedictino alicui tandem assereret. Propterea fabulam illam suam patrum nostrorum & nostrâ etiam memoriâ adeo celebrem, de Joanne Gersene de Canabaco Sancti Stephanî Vercellensis anno 1220. Abbate, & autore, uti confingebat, librorum de Imitatione Christi, magno conatu adornare molitus est: sed exitu prorsus infelici. Nam statim Heribertus Rosveidus, doctissimæ Societatis Scriptor diligentissimus, choragium ejus omne, singulari Vindiciarum Kempensium libello, ita bellè disturbavit, ut risus & admurmuratio spectatorum non mediocris exinde sæpè fuerint consecuta.

Et quia Quatremarius & Walgravius, Monachi etiam Benedictini, novas quasdam machinationes excogitaverant, quibus probabiliorē jucundiorēque Caëtani fabulam redderent; multi tum ex nostris, Fronto scilicet & Verlinus: tum è Societate Jesu eruditi viri, Heferus, Bollandus, Theophilus Rainaudus: tum denique ex aliis Scriptoribus incliti viri, Naudeus, Carreus, Chiffletius Abbas Balernenſis, & quidquid uspiam fuit eruditorum virorum illicò refutationes eden-

nus, Naudeus, Chiffletius, Suareſius Vaſionenſis Antistes, &c. Vide Naudeum in conjectionibus cause Kempensis.

P R Æ F A T I O.

tes, fumum eorum omnem ac figmentum exsufflarunt ac dissiparunt.

Cumque paulò vehementiùs controversia Quatremarium inter & Naudeum exarsisset, jamque eò pervenisset, ut Naudeus Codices 4. M. SS. pro Gersene à Benedictinis Italis oblatos, depravatos & corruptos esse demonstraret, ut perspicuum erat ex additionibus & lituris, unde appareret nomine Thomæ aut Gersonis deleto, novam vocem inductam aut immutatam, ac nomen Gerseni inculcatum ac intrusum fuisse; Benedictini verò contrà fraudis & corruptelæ expertes esse Codices hos affirmarent. Re ad Senatum Parisiensem delatâ Pseudogersen Monachus Benedictinus limine pulsus, in medium deinceps prodire solenni edicto prohibitus est. Sancitum quippe est à sapientissimis Senatoribus, ne libri quatuor de Imitatione Christi, alioquàm Thomæ Kempensis, genuini parentis, nomine insigniti imposterum excuderentur.

Anno 1652.

Atque hoc quidem decreto quotquot erant boni & eruditi, litem innocentissimo Thomæ Kempensi, tam malis artibus intentatam, neque melioribus machinationibus propugnatam, optimo tandem exitu finitam ac compositam arbitrabantur; magnamque in spem veniebant, fore uti omni pugna posthac desisterent Scriptores Benedictini. Immo majores patresque suos imitarentur, RR. scilicet PP. Sancti Germani à Pratis Parisiensibus, qui olim unà cum RR. PP. Cælestinis ac

P R Æ F A T I O.

Carthusianis, libros de Imitatione Christi, *Extant etiam
num illa dua
editiones.*
semel & iterum anno 1521. & 1523. nomine
Thomæ Canonici Regularis Parisiis edendos
procurarunt.

Sed ut sunt hominum quorundam ingenia
ita comparata, ut quod semel ab illis, pro
humanâ imbecillitate, erratum est, istud perti-
naciter tueri velint. Nihil sibi contrâ Scripto-
res Benedictini, prius ac magis faciendum ar-
bitrati sunt, quam ut integritatem M. SS. il-
lorum Codicum, præstandam in se reciperent.

Multa tamen adversabantur. Unde conti-
nendi adhuc erant in tenebris, dandumque il-
lis erat otium: nam doctissimus Launoïus, qui
ab illis tunc stabat, & cui Codices illi tunc
ostensi sunt, nonnihil corruptelæ in illis de-
prehendebat. Prætereà adhuc in vivis agebat
Naudeus, cujus conspectum Codices illi ve-
hementer reformidabant. Denique corrogan-
di erant M. SS. Codices alii, in quorum
turbâ & recensione illi latere possent.

Statuunt itaque expectandum, & in totos
viginti annos, eoque plus res dilata est. In-
tereà moritur Naudeus. M. SS. Codicum mi-
nium & rubrica quæ vel Launoïo tantoperè
anno 1652. apparebant, diuturnitate temporis
nonnihil diluuntur. Corrogantur denique ex
Flandriâ, Alamanniâ, cæterisque regionibus plu-
res M. SS. Codices alii, ad Gerseni quidem
causam promovendam aut Kempensis labe-
factandam, non admodum reipsâ utiles: sed
in quorum tamen turbâ & multitudine, ut

*Launoïus p. 90.
libri sui de
autore lib. de
Imitatione
Christi Gallus
edit. 1652.*

P R Æ F A T I O.

antè dixi, vitiatì Codicēs confundi ac regi possent.

Ita R. P. Lalemant in Relatione suâ.

Itaque re jam satis, ut opinabantur, maturâ, litis ac controversiæ de autore librorum de Imitatione Christi instaurandæ occasiones modis omnibus inquirunt. Veteres illas suas & graves adversum Naudeum, jam à triginta circiter annis demortuum, iterant criminationes. Queruntur Codicēs quatuor M. SS. pro Gersene, à Benedictinis Italis exhibitos, tanquam depravatos & corruptos, falsò ab eo olim accusatos: habere se illos magnumque Codicum aliorum M. SS. numerum, paratosque se esse, cuivis examinandos illos exhibere. Quid plura? tandem eò rem perducunt, ut ab Illustrissimo Senatûs Præsìde impetraverint, uti vellent in Sangermano eorum Monasterio infulas suas, ad eum usque pulverem demittere. Adfuere unâ è nostris duo, Reverendus scilicet Pater Lalemant Sanctæ Genovesæ tum Prior & Cancellarius, & R. P. du Molinet: qui M. SS. istos Codices ventilantes, Italos à Naudeo olim meritò falsi accusatos, & recens adductos, aut ad labefactandam causam Thomæ Kempensis, aut ad Gersenis promovendam, prorsus inutiles esse faciliè demonstrarunt. Unde Illustrissimus Senatûs Princeps, pro singulari illâ quâ præstat luce ingenii, cui nec error ullus errat, nihil de priori illâ sententiâ quâ libri de Imitatione Christi Thomæ olim asserti fuerant, prorsus immutandum vidit & censuit.

Paulùm exinde adversariorum conatus om-

P R Æ F A T I O.

nis & impetus tardatus est, ac non parum concidit animus. Interjecto tamen temporis spatio, ac redintegrato animo, ad Illustrissimum Ecclesiæ Parisiensis Archipræsulem adeunt, orant, obtestanturque, velit novorum Codicum examini præsentiam suam exhibere; sic litem omnem posse dirimi. Quod tantoperè efflagitabatur, annuit Illustrissimus Præsul, eâ humanitate, quâ fit inprimis, ut dum ingenio admirationi est omnibus, singulis etiam sit cordi. Diem dicit, quâ die in Palatium suum conveniant. Ubi ea dies venit, ad præstitutum tempus RR. PP. Benedictini adsunt seduli: Codices omnes suos numero ad duodecim, editiones ad 4. aut 5. Bernardi aut Gersonis nomine inscriptas comportant; denique clam nobis (quorum tamen adesse præsertim intererat) conveniunt etiam viri doctrinæ famâ incliti, quos litis hujus contestandæ arbitros soli delegerant.

Non est tamen quodd cum clarissimis illis viris injuriam ullam expostulemus. Functi sunt proborum hominum officium: duas enim res tum fecere. Alteram, quæ æqui justique servantium fuit, quâ scilicet *nobis absentibus causam dijudicari non posse censuerunt*. Alteram, quæ humanitatis colentium & Reverendis Patribus, sine cujusquam injuriâ, honestè, urbanèque gratificantium fuit; quâ nempe testati sunt *exhibitos sibi plures M. SS. Codices librorum de Imitatione Christi. Lecta etiam sibi Rossignolii, Majoli, Possevini ac*

P R Æ F A T I O.

Bellarmini testimonia, de Codice Aronensi. Prætereà ostensas esse sibi varias ejusdem opusculi editiones primarias, sub nomine Sancti Bernardi, unam absque temporis notâ, aliam sub nomine Joannis Gerson: unam etiam sub nomine Thomæ à Kempis factam anno 1494. in quorum fidem, inquiunt, communi consensu hoc instrumentum subsignavimus.

Libenter & nos M. SS. Codices hos omnes exhibitos, editiones has omnes ostensas, tabulas has testimoniales adductas, lecta denique hæc omnia Andreæ Majoli, Bernardini Rossignolii, Possevini & Bellarmini testimonia assentimur. Sed nunquid hinc efficitur istorum omnium quidquam aut officere Thomæ, aut Gersoni adminiculari? nihil omnium minus. Idque si clarissimis viris examinare aut vacasset, aut libuisset, facilè profectò ab eis pro singulari illâ rei antiquariæ peritiâ quâ præstant, potuisset apprehendi. Sed publico inservientibus & gravioribus rebus occupatis non licuit esse tam otiosis, aut tam imprudentibus, ut bonas horas tam malè vellent perdere. Controversiam hanc itaque integram iis quorum intererat disceptandam prorsus dimisere.

Atque ut istud vel in uno Codice Pado-lironensi omnium præcipuo breviter hîc tenemus & experiamur, Codicis hujus historiam, & variam, ut ita dicam, fortunam sic habe.

Anno 1618. quo nempe tempore RR.

PRÆFATIO.

PP. Benedictini nullo tunc urgente adversario à quo sibi cavere deberent, candidiùs & securiùs loquebantur : scripsit Caetanus ipse in hoc Mantuano sive Padolironensi Codice hoc Epitaphium manu primariâ in fine tunc contineri.

*Magnum parva tenet virtutibus urna Joannem,
Præcelsum meritis, Gersen cognomine dictum.*

Parisijs celsæ Professor Theologiæ

Claruit Ecclesiæ, qui Consolarij anno

Milleno Domini centum quater atque viceno

Nono, luce petit superos. Julii duodenâ

Quid ex hoc vitiato & corrupto Epitaphio Joannis Gersonis Ecclesiæ Parisiensis Cancellarii, qui obiit anno 1429. die duodecimâ Julii, in quo Epitaphio nomen *Gerson* in *Gersen*, & vox hæc *Cancellarius* in istam *Consolarium*, crassè immutata sunt : quid, inquam, factum quoque sequatur in hujus Codicis inscriptione & subscriptione, in quibus hæc vox *Gersen* etiam legitur, alijs dijudicandum relinquo. Historiam enim duntaxat scribimus.

Anno circiter 1630. jam urgente adversario, cum tandem animadverteret idem Caëtanus simpliciùs & imprudentiùs à se factum esse, qui Epitaphium istud in fine Codicis hujus extare indicasset, videretque eodem prorsus *Gersenem Consolarium* jugulatum gladio quo Gersoni Cancellario vis illata fuerat; Epitaphium istud planè rescindi, & ab hoc Codice prorsus evelli debere optimè intellexit : unde

P R Æ F A T I O.

diligenter cavit, ut non plus in eo deinceps extaret, quàm unquam extitit *Gerſen* ille *Conſolarius*, cui priùs inſcribebatur.

Anno 1641. cùm RR. PP. Benediſtini reſciviſſent typis Luteriæ & ſumptibus Regiis in Auguſtâ Luparâ, excudi librum de Imitatione Chriſti in folio extenſo, litteris majoribus ac verè Regiis. Eminentiffimum Cardinalem Richelium convenerunt, rogaruntque, ne in tam eximio opere cudendo permetteret huic errori locum eſſe, quo Thomæ Kempenſi Canonico-Regulari vulgò tribuitur, cùm ſit potiùs Joannis Gerſen Abbatis Vercellenſis Ordinis Sancti Benediſti: quemadmodum appareret ex fide M. SS. Codicum qui Romæ aſſervabantur apud Abbatem Cætanum, cum titulo verò & genuino Joannis Gerſen, non autem Thomæ à Kempis. Annuit Eminentiffimus Cardinalis, ſed eâ conditione, modò Benediſtini Romani Codices illos exhiberent viro alicui conſpicuæ dignitatis & doctrinæ famâ commendato, qui fidem poſteà faceret libros ejuſmodi viſos à ſe, diligenter obſervatos fuiſſe, talesque judicatos, ut illis fides certiffima adhiberi poſſet.

Itaque Naudeum tunc Romæ degentem elegerunt RR. PP. Benediſtini, Codicesque ſuos examinandos ipſi exhibuerunt. Hos intet M. SS. Codices erat Padolironenſis, in quo quidem, ut antè diximus, Epiraphium Joannis Gerſonis non ampliùs extabat; multa tamen tam in Codicis hujus inſcriptione, quàm in

PRÆFATIO.

in subscriptione adhuc reperiebat Naudeus, quæ fraudis & mendacii suspensionem statim injicerent: unde factum, ut Regia illa librorum de Imit. Chr. editio Gerseni non fuerit inscripta. Sic enim de corruptelâ hujus Codicis refert Naudeus: *Assumpto*, inquit, *in manus Padolironensi Codice*, consideravi primùm *in ejus titulo verborum quamdam inversionem, & præposterum ordinem*; scilicet, Incipit liber Joannis Gerseni primus. Mox: apprehendi *litturas prioris cujusdam atque vetustioris tituli, cujus vestigia nonnulla veluti Jho, & alias litteras dimidiatas, recentior superadditus titulus non* benè tegere potuerat. Apparebant enim statim *attentiùs inspicienti*, neque dici poterat eas esse *expressa signa aliarum litterarum, quæ in ejusdem folii adversâ parte continebantur*, quia postea D. Floravantes, & ipsimet PP. Benedictini, P. Placidus, & qui cum eo adfuit etiam P. Joannes, ambo Procuratores Ordinis S. Benedicti Congregationis Sancti Mauri, eas acumine stili perforantes diversitatem animadvertunt: denique verba illa, Liber Joannis Gerseni primus, erant multò magis splendenti rubricâ exarata, quàm sequentia hæc, De contemptu mundi & Imitatione Christi, ut vel ex illa solâ differentiâ rubricâ, seu minii frans ipsa patere vel caco potuisset. Unde certum est, *titulum planè falsum esse, & alteri vetustiori, quamquam æquè falso Joannis Gerson, propter tres illas vetustiores litteras Jho inductum; non unâ quidem Gerson in Gerseni, sed to-*

P R Æ F A T I O.

rius tituli inversione ac commutatione, ne vel Cancellarii vox relicta, vel quædam alia quæ minimè ad Joannem Gersen pertinere poterat fraudi detegenda occasionem aperiret. Secus enim poterat commodissimè littera o nominis Gerson in litteram e, quæ Gersen efficit, commutari. Eodem prorsus modo quo sub finem ejusdem Codicis factum est in illis verbis: Explicit liber quartus Joannis Gersen de Sacramento Eucharistiæ. Mihi enim procul dubio est scriptum antea fuisse Joannis Gerson, sed ne posterior Epigraphe priori fraudi esset, vim non minus quam prior illa experta est. Et PP. Placido & Joanni tam liquidè de singulis falsitatibus constitit, ut publicè declararint, non è re suâ fore instrumentum ullum fieri, quo potiùs jugulari eorum causa posset; quin & coram Em. Card. à Balneo, Domino meo, P. Placidus juratus antea se tot falsitatum & ineptiarum inscium fuisse, gratias habuit nobis omnibus pro navatâ solerter operâ, cùm suam frustrâ deinceps à suis Patribus Benedictinis desideratum iri assereret.

Ab hoc anno 1641. quo Romæ hæc acta sunt ad annum 1652. id est per decem circiter annos, cùm inter RR. PP. Benedictinos Sancti Germani & Naudeum vehementiùs controversia exarsisset, eoque pervenisset, ut ubique à RR. PP. Benedictinis summi flagitii in re litterariâ perpetrati accusaretur Naudeus. Ipse verò Naudeus nihil à se contra veritatem in accusando falsi Codice illo, aut dictum, aut factum esse contenderet. Quin

P R Æ F A T I O.

semel & iterum, sive apud Præto-rem Urbanum, sive in amplissimo Senatu verbis expressis & scripto sæpiùs sponderet, se sufficienti fidejussore interposito, lampadem aut donarium aliquod argenteum quinquaginta pondo Ecclesiæ Sancti Germani appensurum, quoties manuscriptus ille Codex bonâ fide ab illis repræsentatus, non eodem prorsus modo se habere, ab idoneis iudicibus deprehenderetur, quoties ab illo designatus erat. Cum, inquam, ita arderet utrò citròque controversia, & ab amicis, à Canonicis Regularibus, à Senatu, ab omnibus efflagitaretur, producerent tandem RR. PP. Benedictini manuscriptum Codicem illum; sic litem omnem hoc uno facto dirimi posse; nunquam tamen tunc ausi sunt toto illo decennio illum exhibere. Interim verò à Quatremario ingentes admodum libri adversum Naudeum conscribebantur, in quibus, quod lectu festivum est, uno in loco vitium in eo Codice Quatremarius agnoscebat; alibi integrum esse contendebat; modò Romæ asservari aiebat in Bibliothecâ Caëtani; modò penes Naudeum detineri asseribat, cum conjici possit ex his quæ mox profero, in Bibliothecâ Sangermanâ Parisiensi Codicem illum tunc extitisse.

Anno 1652. doctissimus Launoïus, qui tunc temporis à RR. PP. Benedictinis stabat, Codicem hunc Mantuanum sive Padolironensem amicè sibi ostensum fuisse scribit. Et in ejus inscriptione multa etiam cum Naudeo,

P R Æ F A T I O.

quæ ipsam non sanam esse, sed vitiatam ac corruptam indicarent, notasse se candidè fatetur. Sic enim refert in libello ab eo tunc temporis Gallicè edito. *Sur ce sujet, je diray ce que j'ay remarqué dans un manuscrit d'un livre de l'Imitation qui est en l'Abbaye de Saint Germain, & qu'on me dit estre celui de Mantouë. Le titre est tel : Incipit liber Joannis Gersen primus ; & la fin est telle : Explicit liber quartus Joannis Gersen de Sacramento Eucharistiæ. J'ay observé trois choses dans ce titre. La première, que ces paroles, Liber Joannis Gersen primus, étoient écrites d'un rouge un peu plus reluisant que les autres ; la seconde, que la ligne du papier sur laquelle ces paroles, Incipit liber Joannis Gersen, sont écrites, est un peu plus brunie, ce qui s'étend jusques au dessus de la ligne ; la troisième, que cette tache & souillure de papier va bien au dessus du mot de Gersen.*

Anno demuim 1671. à clarissimis viris de hoc Codice Padolironensi sive Mantuapo hæc referuntur. *Decimus codex est Monasterii Sancti Benedicti de Padolirone sic inscriptus : Incipit liber Joannis Gersen primus ; in qua inscriptione sana est omnino scriptura in nomine proprio, & nulla falsi legitima suspicio apparet, neque in subscriptione, quæ in fine codicis primariâ manu exarata est hoc modo : Explicit liber quartus Joannis Gersen de Sacramento Eucharistiæ.*

Hanc virorum clarissimorum relationem ve-

P R Æ F A T I O.

rissimam esse nullus dubito. Sed ita tamen ut quæ à Launoïo, Naudeo, Floravente, immò & Caëtano, Placido, & Joanne Benedictinis de fraude & corruptela hujus Codicis tam in inscriptione suâ quàm in subscriptione, tam candidè & tam certò referuntur, pro falsis habere non possim.

Sed quæras, què igitur tam diversa & sibi tam adversa de uno & eodem Codice (si tamen idem est) testimonia simul conciliantur ? facillimè inquam ; nam anno 1641. quo tempore Codex ille à Naudeo examinatus est, recens hic superadditus titulus, *Liber Joannis Gerseni primus* ; ita longè multò magis splendenti, quàm sequentia verba erat exaratus rubricâ, ut fraus ipsa tunc vel cæco patere potuisset, ut ait Naudeus. Interjecto deinde decem annorum spatio, quot intercedunt ab hoc anno 1641. usque ad annum 1652. quo tempore Codicem hunc examinavit Lanoïus, jam non ita splendebat rubrica in hoc titulo, *Liber Joannis Gerseni primus*, ut fraus ipsa vel cæco patere potuisset : sed ita tamen etiam tunc splendebat, ut homini æquè oculato ac Lanoïus fraus ista adhuc appareret. Quidni itaque interjecto viginti & ampliùs annorum spatio, quot interjacent ab anno hoc 1652. ad annum 1673. quo tempore à viris clarissimis Codex ille examinatus est ; quidni, inquam, jam splendor minii & rubricæ in hoc superinducto titulo, *Liber Joannis Gerseni primus*, diuturnitate temporis dilutior fa-

P R Æ F A T I O.

ctus ita sit imminutus, ut vel ab oculatissimis
fraus ipsa detegi non ampliùs potuerit?

Est & alia conciliandorum horum testimo-
niorum ratio, quam Launoïus ipse loco su-
prà citato innuit: cùm ait dubitare se admo-
dum, num Padolironensis ille Codex, qui sibi
Parisiis anno 1652. exhibitus est, idem fuerit
cum eo qui Romæ anno 1641. Naudeo fue-
rat exhibitus; immò conijcere se, idque mul-
tis argumentis, alium prorsus ac diversum
fuisse: sic enim scribit. *J'ay principalement trois
raisons qui me persuadent que le manuscrit qui
m'a esté présenté n'est pas celuy duquel le sieur
Naudé porte jugement dans sa relation. La pre-
mière, est que le sieur Naudé dit qu'on lit ces
trois vieilles lettres Jho, qui étoient dans le titre
du manuscrit qu'il a veü; ce qu'on ne lit point
dans celuy que j'ay veü. La seconde, que le sieur
Naudé dit que le mot de Cancellarii étoit dans
le même titre; ce qui ne se peut dire en aucune
façon du manuscrit dont je parle. La troisième,
que le sieur Naudé ne fait point de doute qu'à
la fin du manuscrit qu'il a veü, il y avoit au-
paravant Joannis Gerson; mais dans celuy que
j'ay veü ces mots là n'y furent jamais. Quæ si
à Launoïo verè dicuntur, uti par est credere,
quidni & alius similiter dubitet? num idem
Padolironensis Codex anno 1671. clarissimis
viris exhibitus sit, qui anno 1652. Lanoïo
fuerat ostensus?*

Atque ex his omnibus quæ de uno solo
Padolironensi Codice hætenus narravimus,

P R Æ F A T I O.

facile videre est illud, quod initio dicebam: à Clarissimis viris, si aut iis vacasset, aut libitum fuisset dijudicare, an ullus manuscriptorum horum Codicum Gersenis jus asserat, aut Thomæ incommodet, perfacile statim deprehendi potuisse nihil omnium minùs effici. Sed contrà: cùm in plerisque fraus ipsa, quâ loco *Gersonis*, *Gersenis* nomen inculcatum est, manifestè appareat, hinc Gersenis istius causam prorsus labefactari. Sciunt enim verò verissimè & elegantissimè dictum à Tertulliano: *Quidni falsum, cujus testimonium quoque ex falso est? quomodo credam non mentiri eum, qui mentitur, ut credam?* Tertul. l. de anima. Gravioribus itaque rebus occupati Thomæ Kempensis & Pseudogersenis causam illis quorum intererat disceptandam prorsus dimisere.

Mirum tamen quàm superbos exinde triumphos egerint adversarii. Incredibile, quantum conati sint apud incautos ingentibus tantorum virorum nominibus illiberaliter abuti. Continuo quippe sermonibus crebris ubique sparsum ac divulgatum est, quidquid in hac almâ Parisiorum Civitate litterarum domicilio, eruditorum esset, partes Gersenis in celeberrimo confessu tandem amplexatos esse. Illicò instrumentum publicum hoc de confessu, in quo M. SS. Codices librorum de Imitatione Christi coram Illustrissimo Archiepiscopo Parisiensi ventilati atque discussi fuisse dicuntur confectum. Nova statim librorum de Imitatione Christi nomina

PRÆFATIO.

Johannis Gerseni Abbatis Benedictini editio, magnis sumptibus adornata : illi editioni instrumentum hoc magnificentissimis verbis præfixum. Ex eo instrumento eruta, aut potius conficta argumenta, quibus non Thomam Kempensem, sed Johannem Gersensem, libri controversi autorem esse demonstraretur. Hoc semel & iterum libris hac de re editis evulgatum : & quæ tandem in Græcorum levitate fuisse dicitur perversitas, qui maledictis insectabantur eos à quibus de veritate dissentiebant : Sapientissimi ac Religiosissimi viri Thomæ de Kempis memoria bonorum omnium quotquot hætenus trium penè retrò sæculorum ævo extiterunt, laudibus semper celebrata, contumeliis ac probris onerata est. Scriptum quippe est in variis horum librorum locis, ipsum sic proprio penicillo posse depingi. *Scolaris Daventriensis, qui scribere ac legere utcumque noverat, immò librarius & libellio, ita præclarus ut erratorum myriades admitteret, quæ nemo grammaticus committeret : & quæ essent hominis non in rectâ tantùm scribendi ratione aberrantis, sed haud planè capientis quid scriberet. Vitæ spiritualis adeò rudis, ut nisi post exactum toto sexcennio tyrocinium nuncupandis votis idoneus non fuerit ob animi levitatem & ingenii tarditatem.*

Nemo profectò non videt officii nostri fuisse, injurias viro innocentissimo inter asceticos Autores de Christianâ Republicâ omnium optimè semper merito, tam malè illatas pro-

P R Æ F A T I O.

pulsare: prudentiæ que acvigilantiæ nostræ simul exitisse, tendiculas non ex insidiis, sed apertè & palàm tanto studio ab adversariis comparatas prospicere, omnique ope, ne incautos irretiant, sicque fructus & gloria pietatis & industriæ alienæ ad eos transferantur, providere.

Istud ego, amicorum precibus adductus, & quorundam autoritate permotus, in his Vindiciis præstare conatus sum. Quas Vindicias jam abhinc biennio confectas, & clarissimis quibusdam viris lectas, nec improbatas, diu est quod evulgassem. Sed causa differendi fuit; tum propterea quòd in eis M. SS. quorundam Codicum fide & testimoniis uret: qui Codices cùm ex inferiori Germaniâ huc advehendi essent, jamdiu interclusis ob bella in hisce regionibus grassantia itineribus, seriùs asportari potuerunt; tum propterea quòd, quantumvis licet amicitia duceret, autoritate permoveret, veritate denique compelleret, nonnisi tamen invitus ad has Vindicias accesserim; quippe qui semper existimaverim, *honorem*, quod prudenter ait Sapiens, *esse maximum homini, qui separat se à con-* Prov. c. 24.
v. 3.
tentionibus.

Harum porrò Vindiciarum tres erunt omnino partes. In primâ multis argumentis, tum extrinsecus, tum ex ipso libello erutis, Thomam de Kempis Canonicum Regularem libri controversi autorem esse demonstrabitur.

PRÆFATIO.

In secundâ, discutientur argumenta, quibus RR. PP. Benedictini nuper usi sunt, ut probarent Thomam Kempensem horum librorum autorem non esse.

In tertiâ denique ostendetur nullum totis quadringentis annis testimonium extare, Joannem Gersenem de Canabaco in humanis unquam & usquam egisse; solventurque ea omnia, quæ ipsi dicuntur adminiculari. *Aderit operi Deus, quod in quodam libello suo dicebat Augustinus, nec me deseret, si nihil fingo, si officio ducor, si veritatem amo, si amicitiam diligo, si multum metuo ne alii fallantur.*

*Aug. lib. de
util. cred. c. 2.*





T A B U L A

C A P I T U M.

P A R S P R I M A.

Thomam de Kempis Canonicum Regularem domus Sanctæ Agnetis prope Zwollas librorum de Imitatione Christi authorem esse.

CAPUT I. *Thomæ de Kempis librum de Imitatione Christi adscribunt authores omnes coævi, superiores & recentes ad nostram usque ætatem.* pag. I

CAP. II. *Editiones omnes veteres & recentes favere Thomæ de Kempis.* 13

CAP. III. *M. S. S. Codices plerosque adscripti Thomæ de Kempis.* 21

CAP. IV. *Patriam, ætatem, vitæque au-*

T A B U L A

toris institutum in unum Thomam convenire. 39

CAP. V. *Trium primorum de Imitatione Christi librorum doctrinam omnem, sententias & præcepta ex Joannis Voossii de Huesden Superioris in Windefsem Generalis libello sumpta esse.* 58

CAP. VI. *Excerpta ex epistolâ Joannis de Huesden Superioris in Windefsem Generalis, de modo proficiendi in Religione, seu libello de Vita & Imitatione Christi.* 65

CAP. VII. *Quartum de Imitatione Christi librum ex ejusdem Joannis de Huesden & aliorum Devotorum exemplis & dictis sumptum esse.* 81

CAP. ULTIMUM. *Vitam, mores, ingenium, eruditionem, stilum, & atatem auctoris librorum de Imitatione Christi, à Thoma Kempensi perfectissimè referri.* 98



C A P I T U M.

P A R S S E C U N D A.

Discutiuntur argumenta quibus utitur
Delfavius ut probet Thomam de Kem-
pis non esse librorum de Imitatione
Christi autorem.

CAPUT I. *A*N liber de Imitatione Christi
Doctoribus Angelicis, Bona-
ventura ac Thoma familiaris
fuerit, adeoque Thoma Kempen-
si antiquior. 116

CAP. II. Solvuntur argumenta Delfavii,
quibus autores nihilo Thomam
juvare contendit. 136

CAP. III. Respondetur argumentis quibus
contendit vetustiores editiones
non favere Thomae. 151

CAP. IV. Respondetur argumentis quibus
contendit M. S. S. Codices suos
adversari Thomam. 152

CAP. V. Respondetur argumentis, quibus
contendit M. S. S. Codices nostros
adversari Thomam. 155

CAP. UL- Solvuntur rationes quibus ait li-
T I M U M. brum ipsum adversum Thomam
se se vindicare. 167

TABULA CAPITUM.

PARS TERTIA.

Joannem Gersensem de Canabaco librorum de Imitatione Christi non esse autorem.

CAPUT I. *N*Ullum totis quadringentis annis testimonium extare Joannem Gersensem de Canabaco in humanis unquam & usquam egisse. 186

CAP. II. *D*iscutiuntur argumenta, quæ Joanni Gerseni extrinsecus adminiculari dicuntur. 191

CAP. III. *D*iscutiuntur reliqua argumenta, quæ extrinsecus Gerseni de Canabaco favere dicuntur. 201

CAP. UL- *D*iscutiuntur argumenta quæ ex TIMUM. ipso libello erui, & Joanni Gerseni favere dicuntur. 209

Extrait du Privilege.

PAR Lettres Patentes du Roy données à Paris le 4. May 1676. signées d'ALENCE', & scellées du grand Sceau de cire jaune, il est permis au R. P. N. Chanoine Régulier de la Congrégation de France, de faire imprimer, en tel volume, marge & caractère qu'il voudra, le livre qu'il a composé, & qui est intitulé, *Vindiciæ Kempenses*; & ce pendant le temps & espace de dix années consecutives. Avec défenses à toutes personnes, &c.

Achevé d'imprimer le 30. jour de Juin 1677.

Permissio R. P. Generalis.

NOS Frater Paulus Beurrier, Abbas Sanctæ Genovefæ Parisiensis, & Canoniorum Regularium Congregationis Gallicanæ Præpositus Generalis, facultatem fecimus R. P. Ph. T. S. G. & A. P. C. typis mandandi librum à se exaratum, cui titulus est, *Vindiciæ Kempenses adversus R. P. Franciscum Delfau Monachum ac Presbyterum Congregationis Sancti Mauri*. In cujus rei fidem præsentibus signo sigilloque nostris munitas fieri mandavimus. Datum Parisiis die vigesimâ secundâ Junii anno Domini millesimo sexcentesimo septuagesimo-septimo.

F. P. BEURRIER.

De mandato Reverendissimi
P. Præpositi Generalis,
F. DOUFRERE.

VINDICIÆ



VINDICIÆ KEMPENSES

ADVERSUS

R. P. FRANCISCUM DELFAU

MONACHUM CONGR. S. MAURI.

PARS PRIMA.

THOMAM DE KEMPIS

Canonicum Regularem domus Sanctæ Agnetis prope Zwollis librorum de Imitatione Christi authorem esse.

CAPUT I.

THOMÆ DE KEMPIS

*librum de Imitatione Christi adscribunt
authores omnes coevi, suppare & recen-
tes ad nostram usque ætatem.*

NUNQUAM tot, neque tam certa
in facti alicujus veteris controver-
siâ, apud æquos judices dirimendâ, pro-
ferri posse testimonia crediderim; quor
& quàm explorata pro libris de Imita-
tione Christi Thomæ de Kempis Ca-

A

nonico Regulari vindicandis, & iisdem Joanni Gerseni, ut vocant, de Canabaco abdicandis argumenta militant. Ecce enim Thomæ nostro sacratissimum hunc libellum, flosculum devotarum mentium, verè delibatum, & Christianæ Religionis medullam, plerique omnes authores coævi, suppare & recentes adscribunt. Favent editiones quotquot abhinc ducentis retrò annis, innumeræ propemodum ubique terrarum ipsismet etiam R R. P P. Benedictinis sæpè illas procurantibus, excusæ sunt. M. S S. Codices adstipulantur. Patria denique authoris, ætas, vitæ institutum, doctrina, stilus, reliquæque omnes, quæ ex ipso libello eruuntur circumstantiæ, in ipsum mirificè & singulariter conveniunt. Contrà verò eadem hæc omnia Joannem istum Gersenem Italo-Benedictinum de Canabaco vel de Cavaagliâ, ut commentum quoddam & otiosi otioque suo intemperantissimè abutentis hominis alicujus, figmentum omnino rejiciunt.

Quod ut ab omnibus partium præjudiciis & studio liberis, tam videatur clarè & apertè quàm quod ab ipsis in

meridianâ luce conspicitur. Primum omnium æquum est ut graves hac in parte & omni exceptione majores, authores benè multos inclito agmine triumque penè sæculorum sibimet succedentium contestatione continuâ, istud ipsum testificantes, audiamus. Est enim hæc Augustini, immò sensus ipsius & naturæ, in his controversiis dirimendis prima & certissima lex atque præscriptio. Unde constat, inquit, quid cujusque sit? Nisi quia his temporibus, quibus sua quisque opera scripsit, ea quibus potuit insinnavit atque edidit, & indè in alios atque alios continuatâ notitiâ latiusque firmatâ, ad posteros etiam usque ad nostra tempora pervenerunt. Itaut interrogati, cujusquisque liber sit, non hæitemus quid respondere debeamus. Platonis, Aristotelis, Ciceronis, Varronis, aliorumque ejusmodi authorum libros, unde noverunt homines quod ipsorum sint? nisi eâdem temporum sibimet succedentium contestatione continuâ.

August. l. 33.
contra Faust.
c. 6.

Agmen hoc ducet author anonimus vitæ Thomæ de Kempis, cui vel ipsimet adversarii meritò aiunt majorem quàm cæteris omnibus adhibendam esse fidem; tùm propterea quòd Kempensi

Testimonium
Canonicorum
Regularium
montis Sancti
Agnæ, qui
cum Thoma
de Kempis vi-
xerunt anno
circa 1430.

*Vita hac
Thomæ de
Kempis ab
anonimo scri-
pta, vulgò ha-
betur in fine
librorum de
Imit. Chr.*

4

VINDICIA

penè coævus fuit, tùm propterea quòd
cùm ea dumtaxat narrare se scribat quæ
à fratribus montis Sanctæ Agnetis, qui
cum Thoma vixerant, audierat; quod
de Thoma refert non tam unius homi-
nis testimonium censerì debet, quàm
communis universi hujus Conventus ac
Monasterii vox & testificatio scriptis hu-
jus authoris consignata. En igitur quod
domestici illi & quotidiani convictores
de sodali sibi Thoma testantur. *Iste bo-
nus Pater (Thomas scilicet) solitus erat
dicere quando fuit cum Conventu spatiando
cum aliis, quando sensit inspirationem divi-
nam, quando sponsus ejus voluit cum sponsâ
loqui, tunc humiliter petiit licentiam dicen-
do: Dilecti fratres, oportet me ire, unus
enim me exspectat in cellâ. Et fratres pie
annuentes petitioni ejus multùm edificati
fuerunt, & sic impletum fuit in eo illud:
Ducam eum in solitudinem, & loquar ad
cor ejus: & ipse Thomas ad Dominum illud
dicebat, Loquere, Domine, quia audit servus
tuus. Quid tunc loquebatur Domino, &
quid loquebantur ad invicem, habemus in
tractatu qui de internâ Christi locutione est
ad animam fidelem, qui tractatus (is jam
est liber 3. de Imitatione Christi) habet*

*hoc idem pro themate in 2. Capitulo, Lo-
quere, Domine, quia audit servus tuus.*

Cum Canonicis montis Sanctæ Agne-
ris Thomæ convictoribus, præerit etiam
agmini Buschius Chronici Windefe-
mensis author. Vir, ut Trithemius &
Andreas Valerius referunt, ingenio,
eruditione, & pietate clarus; qui unâ
cum Thoma in eodem Canonicorum
Regularium ordine, & in Monasterio
quod à Monte Sanctæ Agnetis, quem
inhabitabat Kempensis, uno aut altero
non ampliùs milliario distabat, totis qua-
draginta & ampliùs annis quàm fami-
liariter vixit. Ambo iisdem dediti stu-
diis, ambo varia pietatis edentes opuscu-
la, ambo Monasteriorum suorum Chro-
nica conscribentes, ambo denique suas
sibi mutuò, quod ex multis apparet,
schedas communicantes. Hic igitur in
hac qua de agitur causâ testis tam ido-
neus & tam oculatus in Chronico suo
Windefemenfi, quod anno 1464. id est
septem circiter annis ante mortem Tho-
mæ, complevit, hæc refert. *Contigit, in-
quit, ante paucos dies obitus Joannis de
Huesden, ut duo Patres notabiles de monte
Sanctæ Agnetis propè Zwollis Ordinis nostri*

*Florebat Bus-
chius tempo-
ribus Thomæ,
& anno circi-
ter 1440.*

dictum Priorem nostrum super certis rebus consulturi in Windefem advenirent, quorum unus frater Thomas de Kempis, vir probata vite, qui plures devotos libros composuit, videlicet, *Qui sequitur me, de Imitatione Christi*, cum aliis, nocte insequuta somnium vidit presagium futurorum.

Florebat Mauburnus in Monasterio montis Sanctæ Agnetis anno circiter 1488.

Coævis & oculatis duobus hisce testibus comes adierit Joannes Mauburnus, & ipse domesticus, qui recens ab illorum ætate fuit & à Trithemio, Posservino, & Andrea Valerio egregiè commendatur tanquam ingenio clarus, scientiâ sublimis, & cælestis affectibus, qui in eodem ac Thomas montis Sanctæ Agnetis Monasterio vixit, ipsique suppar & penè coævus fuit. Hic igitur in Roseto suo spiritali 1. p. c. 4. membro 1. in quo de celebratione Missarum agit, hæc habet. *Teneatur, inquit, hac in re honestatis medium; hinc monet devotus Thomas noster Kempis lib. scilicet 4. cap. 10. non sis in celebrando nimis prolixus aut festinus; sed serva bonum communem modum eorum quibuscum vivis.* Idem testatur eadem 1. p. tit. 6. c. 2. membro 1. Denique idem Mauburnus, ut à Trithemio, Gesnero, Andrea Valerio, & aliis refertur, scripsit

librum de Viris illustribus Canonico-
Regularium, quod opus M. SS. habetur
in Bibliothecis multis, & extat in Sange-
novesana, in quo libro hæc de Thoma
refert. *Thomas de Kempis inter cetera opus-
cula quæ fecit, composuit libellum, Qui sequi-
tur me, quod opus falsò quidam Domino
Gerson attribuunt.*

Quartus iis accedet Jacobus Philip-
pus Bergomensis, nobilissimus ac dili-
gentissimus Historicus, qui cùm in fine
supplementi sui testetur se anno 1434. na-
tum esse, Thomæ Kempensi se coævum
pariter significat. Hæc autem vir illè
clarissimus ad annum 1406. refert. *Tho-
mas, inquit, natione Teutonicus, Ordinis Ca-
nonicorum Regularium, vir in divinis Scri-
pturis admodum studiosus atque eruditus, vi-
tâ & conversatione valdè insignis, hac tem-
pestate clarus existens, scripsit ad instructio-
nem multorum subjecta opuscula, & primò
de contemptu mundi libros quatuor, incipit
que, Qui sequitur me.*

Quintus succedet Joannes Giler, vir
ætate suâ celeberrimus, qui, ut refert
Simlerus, magnis sumptibus & labore ma-
gno opera Joannis Gersonis Cancellarii
collegit, ac in tres tomos edidit. Multa

*Florebat is
anno circiter
1470.*

*Claruit anno
1488.*

etiam ipse composuit opera, inter quæ illud est cui *Navicula fatuorum* nomen fecit, in quo hæc habet: *Quantò natura amplius premitur & vincitur, tantò major gratia infunditur, ut ait Thomas de Kempis lib. 3. de Imitatione Christi c. 54.*

Claruit etiam
eodem anno
1488.

Sextus erit Petrus Scottus Canonicus Argentoratensis, vir, ut Trithemius refert, doctissimus simul & elegantissimus, qui anno 1488. hortatu Joannis Keiserbergii vitæ & operum Joannis Gersonis encomium adornavit, quod editioni operum omnium ejusdem Cancellarii Argentinensi anni 1488. & aliis deinceps penè omnibus præmittitur. In hujus encomii fine hæc ait Scottus: *Alii autem tractatus, qui Gersoni nonnunquam tribuuntur, sed tamen alium authorem certum habent, ut est libellus de contemptu mundi, quem constat esse à quodam Thoma Canonico Regulari editum, non sunt operibus Joannis Gersonis inserti.*

Florebat in
anno circiter
1490.

Septimo loco Thomæ suffragabitur ipsemet Trithemius, Abbas Ordinis Sancti Benedicti, maximi meritò inter cruditos nominis, qui libro de Scripturis Ecclesiasticis hæc refert. *Thomas de Kempis, natione Teutonicus, Ordinis Cano-*

K E M P E N S E S .

nicorum Regularium Sancti Augustini montis Sanctæ Agnetis propè Zwollis in Diœcesi Trajectensi, vir in Scripturis divinis studiosus & eruditus, scripsit libros quatuor de contemptu mundi, Qui sequitur me, &c. Idem refert in libro de illustribus Germaniæ viris.

Octavum illustre admodum & fide, ut opinor, apud Benedictinos Sancti Germani à Pratis dignissimum nobis testimonium exhibebunt trium, ut verbis Ascensii Badii dicam, pietatis Christianæ & Religiosæ observationis Ordinum Proceres; Benedictini scilicet Sancti Germani à Pratis, Carthusiani à Pomeriis Parisiensibus, & Celestini Villænovæ apud Sueffionem. *Qui*, inquit Badius in epistolâ suâ editioni operum Thomæ anni 1523. præfixâ, *convenerunt me, suo quique jure obnixè postulantes, ut pientissimi & optima memoriæ fratris Thomæ à Kempis opera melliflua & ad veram Religionem maximè conducentia* (inter quæ libri de Imitatione Christi primo loco habentur) *prælo nostro iterum divulganda committerem, Benedictini quidem commemorantes quod superiore anno quadam prædicti Patris opuscula præter cætèra pia & paranetica in en-*

*Editiones illæ
anno 1521. &
1623. præcur-
ta sunt à
R. R. P. P.
Benedictinis.*

chiridia & tomulos nostra opera curaverint imprimenda, operumque exemplum, quod ex Alamannicâ impressione unicum habebant, in eorundem impressionem absumendum offerebant.

*Florebat anno
1545.*

Nonus inter testes illos enumerabitur Conradus Gesnerus, qui in Bibliothecâ suâ universali hæc habet. *Thomas de Kempis, natione Theutonicus, Ordinis Canoniarum Regularium Sancti Augustini montis divæ Martyris & Virginis Agnetis propè Zwollis in Diœcesi Trajectensi, scripsit multa de quibus feruntur de contemptu mundi libri quatuor, Qui sequitur me, &c.*

Anno 1555.

Decimus addetur Josias Simlerus, cuius est hoc testimonium in epitome suâ. *Thomas de Kempis, natione Germanus, Ordinis Canoniarum Regularium Sancti Augustini, scripsit libros quatuor de contemptu mundi.*

Anno 1565.

Undecimus suffragabitur Guillelmus Eifengrenius, qui in catalogo testium veritatis ad annum 1407. hæc refert. *Thomas de Kempis, Germanus, Ordinis Canoniarum Regularium Sancti Augustini, vir doctrinâ & sanctitate conspicuus, composuit de Imitatione Christi, & contemptu mundi libros quatuor.*

Denique duodecimus agmen hoc claudet vir longè doctissimus Aubertus scilicet Miræus, qui in auctuario suo de Scriptoribus Ecclesiasticis, c. 478. hæc habet. *Thomas Kempensis scripsit varia, inter quæ eminet verè aureus de Imitatione Christi libellus.*

Floruit nostra ætate.

Cæterum contineo me ab authoribus pluribus supparibus & recentibus; Joanne, inquam, Groppero Cardinali, Ludovico Granatenſi, Henrico Spondano, Abrahamo Bzovio, & aliis innumeris; aut enim hoc testium fatis est, aut nescio quid sit fatis.

Nec est quòd tam incliti tot testium agminis fidem ullo modo elevari posse quisquam putet: neque enim, quod ab adversariis fieri solet, authores protulimus, qui aut nunquam fuerunt, aut jam non sunt; vel in obscuro positos, & M. S.S. tantum codicibus contentos, quibus homines fallere ac ludificari facile possis; vel quorum sententiæ in hac quæ de agimus controversiâ incertæ sint, vel levi aliquâ opinatiõne conjectæ atque interpretatæ, aut demùm etiam mirâ confidentiâ confictæ. Sed toti Orbi scriptis suis illustres vi-

Adversarii pro Gersene suo novos prorsus homines proferunt, & Joannis Baptiste Modena testimonium M. S.S. quodam codice contentum, & Parisiis nuper confictum.

ros adduximus in luce publicâ positos, graves, antiquos, ab omni partium studio liberos; & qui in hac qua de agimus causâ sententiam iis temporibus protulerunt, quibus eos cuiquam malè vel adversari, vel favere voluisse, nemo, nisi temerè, potest suspicari: uno verbo tales adduximus, quibus si vel unum parem ab anno 1220. quo vixisse volunt Gersensem de Canabaco ad nostram usque ætatem, quâ Gersensem istum è cerebro suo produxit Cæteranus: si, inquam, vel unum parem toto illo quadringentorum annorum spatio proferant adversarii, sponte causâ cadimus, & magnum deinceps cum illis Gersensem prædicamus. Quod quamdiu ab illis non erit præstitum, patiantur nos cum prudentibus & eruditis suum istum de Canabaco Gersensem interim habere pro fabulâ.

Unum enim hic addo, quod prudentes omnes maximè movere debet, nulli scilicet prorsus authorum, qui ante Thomam Kempensem vixerunt, libros de Imitatione Christi, licèt totis ducentis jam antè annis illos extitisse velint adversarii, laudatos aut cognitos fuisse;

contrà verò à Thomæ Kempensis tempore ubique terrarum statim innotuisse, ipsique ab omnibus prorsus authoribus coævis, supparibus & recentibus, quorum aliquos modò appellavimus, tototrium sæculorum ævo ad nostram usque ætatem, & Caietanum, qui nescio quem suum Joannem Gersenem de Canabaco, vel de Cavagliâ Benedictinum, horum librorum authorem, commentus est, adjudicatos fuisse. Quo vel uno sòlo argumento quis non videat invictissimè demonstrari Thomam de Kempis horum librorum verum ac germanum parentem esse, obstinatæque admodum ac perpugnacis mentis habendos, qui contradicunt.

C A P U T I I.

*Editiones omnes veteres & recentes favere
Thomæ de Kempis.*

QUOD plerique omnes omnium Ordinum authores, tanto tamque inclito agmine toto illo trium retrò sæculorum ævo palàm sæpè testati sunt, nempe Thomam de Kempis, verum

ac legitimum librorum de Imitatione Christi parentem esse; istud etiam à ducentis annis, ex quo ars Typographica adinventata est, in Alamanniâ, Flandriâ, Galliâ, Italiâ, Hispaniâ, cæterisque suis omnibus regionibus ac Provinciis, Europa ipsa universa nonaginta & ampliùs horum librorum nomine Thomæ excusis editionibus, & factis versionibus omnibus penè linguis, publicâ quasi voce sæpiùs comprobavit. Ut propterea verissimè profectò & elegantissimè Bernardus Bauhausius Societatis Jesu, vir elegantissimus, in suis Epigrammatibus scripserit.

*Memnonide, lampas quos delia prima colorat
Et pharetratorum gens Othomannigenum
Et tincti moro Mauri, ferrugine Iberi,
Et violâ tinctus Sarmata, Belga rosâ
Kempensem cuncti Thomam noruntque leguntque,
Dumq; erit aura, solû, Flamma, Salumq; legent.
In tenebris, Thoma, te non sinet iste libellus,
Qui sequitur me non ambulat in tenebris.*

Neque verò est quòd harum omnium editionum ac versionum numerum innumerabilem hîc incamus. Cùm de his satis inter nos & adversarios constet, & illas omnes doctissimus Hæserus S. J. in

dioptrâ suâ recensuerit, & harum ple-
ræque passim in Bibliothecis, imprimis-
que Sangenovefanâ existent, è vetustio-
ribus ac præcipuis quasdam dumtaxat
profero.

Prima itaque, quæ in noticiam no-
stram hætenus quidem venerit (quin
enim priores aliæ extiterint vix ullus
dubito) ea est quæ in illustri Biblio-
thecâ amplissimæ Reipublicæ Augusta-
næ asservatur, in cujus editionis fine
ista verba habentur. *Viri egregii Thoma-*
montis Sanctæ Agnetis in Trajecto Regula-
ris Canonici libri de Christi Imitatione nu-
mero quatuor finiunt feliciter per Zeinthe-
rum Zainer ex Reutlingen progenitum lit-
teris impressum æheneis. Quo anno Zin-
therus prælo suo libros hos subjecerit,
annotare pro more aut pro incuriâ illius
 sæculi neglexit, præfert tamen in fron-
te codex luculentum senii sui testimo-
nium, illud nempe. *Liber iste emptus est*
à Conventu Augustensi Fratrum Carmelita-
rum anno 1486. immò ex antiquissimo
necrologio Canonorum Regularium
Ordinis Sancti Augustini ad Sanctam
Crucem Augustæ Windelicorum (quo
loci sibi Zintherus anniversario Sacro

parentari voluit) constat ipsum diem suum obiisse 14. Aprilis anno 1475. unde etsi Zintherus librum hunc nonnisi ultimo vitæ suæ anno excudisset, is quarto post mortem Thomæ anno esset editus, obiit enim Kempensis anno 1471.

Porro quod de isto codice à nobis relatum est, item de Typographi obitu Reverendissimus D. D. Gaspar Episcopus Adrumetinus, Episcopatus Augustani in spiritualibus Vicarius Generalis, inspexit, legit, & publico confirmavit instrumento, quod extat in Bibliothecâ Sangenovese fanâ.

Sed hoc loco facere non possum quin doctissimi Heferi dignam sanè animadversionem referam : ait igitur dioptræ suæ parte 1. c. 7. cùm idem urgeret argumentum, incidisse se in Roderici Episcopi Zamorensis speculum vitæ humanæ ab eodem Zeinthero impressum, cujus hæc verba exscribit. *Finit liber dictus, Speculum humanæ vitæ, &c. à Zeinthero Zainer ex Reutlingen cive progenito anno 1471. Idus verò Januariæ 3. Est autem, inquit Heferus, idem prorsus hujus speculi typus ac character,*

raçter, qui librorum de Imitatione Christi nomine Thomæ ab eodem Zeinthero editorum; unde non sine verisimilitudine iudicatur opus de Imitatione Christi excusum esse ante Speculum vitæ humanæ. Videntur enim desiderasse Lectores, ut indicaretur ubi & quando liber aliquis esset editus; aut etiam ipsimet notasse Typographi apponendum esse annum editionis ab iis absolutæ. Quòd si placebit hæc conjectura, ut revera cordatis omnibus & candoris amatoribus placere debet; ecce habemus librorum de Imitatione Christi codicem, adhuc vivente Thomæ ejus nomine typis publicè editum.

2. Editio est Martini Flach, Argentiniæ, anno 1487.

3. Eodem loco, anno 1489.

4. Lugduni, anno etiam 1489. quæ extat apud Sanctam Genovefam.

5. Parisiis, per Joannem Lambert, anno 1493. Extat etiam in Bibliotheca Sangenovefana.

6. Est Norimbergensis, anno 1494. à Pirkamero Visitatore Ordinis Carthusiensium, & Petro Danhauser viro doctissimo procurata. Extat in multis Bibliothecis.

7. Parisiis, anno 1523. quam per Ascensium Badium, trium illi, ut suprâ diximus, pietatis Christianæ Ordinum Proceres R.R. scilicet P.P. Benedictini D. Germani à Pratis, Carthusienses & Celestini tam piâ sollicitudine procurarunt.

8. Venetiis, anno 1535. apud Stephanum Sabiensem.

9. Parisiis, anno 1541. ab Achilla Statio.

10. Ulisipponæ, anno 1542. à celeberrimo Ludovico Granatenfi procurata.

11. Parisiis, anno 1549. à doctissimo Putherbeo procurata.

12. Antuerpiæ, anno 1574. ex Typographia Philippi Nutii.

Supersedeo pluribus aliis editionibus Thomæ nomine ubique penè terrarum excusis, longâ & minùs necessariâ (cùm hac de re palàm constet) serie recensendis. Unius certè unici Caietani Italo-Benedictini nostrâ memoriâ commentum fuit, ut libri de Imitatione Christi anno 1616. Gersenis de Canabaco nomine hætenus inaudito, & omnibus retrò seculis incognito, primùm prodierint in lucem.

Equidem unum hîc omittere non possum, neque verò debeo è vetustioribus scilicet editionibus, unam aut alteram clarissimi Joannis Gersonis Parisiensis Cancellarii, aut etiam Divi Bernardi nomen præ se ferre; sed istud nedum causam Kempensem quidquam incommodet, immò juvat plurimùm.

Nam Bernardum quod spectat, res est in promptu, non ipsum horum librorum authorem esse posse, cùm in eorum tertio, capite 50. disertè laudetur B. Franciscus, qui totis 80. annis Bernardo posterior fuit.

Et meritissimum quod attinet Cancellarium, ex ejus etiam parte res est in vado, cùm is numquam vitam Religiosam aut Monasticam professus sit, cui tamen se addictum piissimus librorum de Imitatione Christi autor, nec obscure, nec semel declarat l. 3. c. 18. 56. &c.

Immò, ut dixi, hinc mirificè causa Kempensis promovetur. Cùm enim, ut Gersonis nomine libri de Imitatione Christi à quibusdam Typographis ederentur, non fuisset commissum, nisi vel ut ipsâ tanti famâ Cancellarii, qui in

Concilio Constantiensi usque adeò super-
excellens Doctor dictus fuerat, qualis vix
in tota Christianitate reperiri poterat, faci-
lius libri illi divenderentur : aut certè,
quod verisimilius est, propterea quòd
in nonnullis M. S. S. Codicibus (cujus-
modi etiam nunc plerique visuntur)
Opuscula quædam Gersonis nomine ip-
sius insignita, ut liber *de meditatione*
cordis, aut *de considerationibus*, cum li-
bris *de Imitatione Christi* sine nomine at-
texebantur: unde contingebat, ut co-
dex integer nullo discrimine sub uno
& eodem Gersonis nomine à quibus-
dam Librariis autorem operis de Imi-
tatione Christi ignorantibus ederetur.
Statim pro Thoma ab omnibus doctis,
Badio, inquam, Petro Danhauser, Mau-
burno, & quod maximè ad rem nostram
facit, Petro Scotto, qui vitæ & operum
Gersonis anno 1488. elogium texuit, &
à Joanne Geilero, qui ejusdem Cancel-
larii opera omnia in tres tomos edenda
procuravit; statim, inquam, pro Tho-
ma huic quorundam Typographorum
errori reclamatum est. Unde factum est,
ut deinceps in multarum, quæ priores
has consecutæ sunt, editionum initio

vel fine, hæc verba frequenter legantur : *quamvis iste libellus dicatur Joannis Gersonis, autor tamen ipsius fuit Thomas de Kempis, Canonicus Regularis.*

C A P U T I I I.

M. SS. codices plerosque adstipulari Thomæ de Kempis.

NON priùs M. SS. ullos codices, magno licèt numero, Thomæ nostro, vel ipso adhuc in vivis agente, nominatim adstipulantes profero, quàm unum imprimis hîc observandum, & quod erit posthac sæpiùs utendum præmifero. Nempe Canonicis Windesemenfibus, itidemque Montis Sanctæ Agnetis id moris & instituti fuisse, ut à primis conversionis suæ annis, otium malorum omnium fontem prorsus averfati, quod ex Divinorum & Ecclesiasticorum officiorum ritibus peractis, reliquum erat temporis, istud omne vel Sacris Libris lætitandis, vel in communem usum describendis (nondum quippe Arte Typographorum adinventâ) vel denique proprio ingenio com-

*Idem Chron.
Vind. l. 1.
c. 26. & ali-
bi.*

ponendis sedulò impenderent. Dicam-
que non reverens, aut assentandi suspi-
cionem, aut aliorum invidiam paucos
seculo 14. quo floruerunt, Religiosos
majori quàm ipsos Ecclesiæ ornamēto
& utilitati fuisse.

Sed quod in rem præsentem impri-
mis venit, est illos cùm aliorum libros
à se descriptos in lucem ederent, iis au-
torum nomina semper apponere: con-
trà verò cùm opuscula sua divulgarent,
nomina sua præ modestiâ celare, aut
immutare, aut saltem communi *Reli-
giosi*, aut *Canonici Regularis*, aut *peregrini*
nomine tegere consueſſe. Horum
primum patet ex multis Buschii capiti-
bus, sed maximè ex l. 2. c. 37. Alte-
rum vero cùm ex plurimis ex eodem au-
tore desumptis exemplis probari etiam
possit; tum verò hæc in præſenti suffi-
cient.

Sic enim Joannes de Huesden Superior
in Windensem Generalis libellum suum
de *Vita & Passione Domini*, sive, ut ap-
pellat Trithemius, *de modo proficiendi in
Religione* (de quo mox plura dicemus)
primo conversionis suæ anno composuit;
qui libellus ex hoc tempore inter omnes

Canonicos Regulares & Fratres devotarum Congregationum passim divulgatus est, sed nullo auctoris nomine præfixo, ut colligitur tum ex Buschio, tum ex Sandero, qui illum referunt, sed sine auctoris nomine. Unde & Trithemio errandi occasio fuit, ut illum Arnoldo Buschio tribueret.

Sic de Henrico Mandé l. 2. c. 43. hæc refert idem Buschius: *Quatuordecim*, inquit, *de vita spirituali & interna in Deum contemplatione edidit libellos, revelationes sibi factas continentes, sed tanquam de alio quodam, quos in Franceno & Teuthonico propriâ manu pulchrè descriptos, Librario Teutonicorum librorum in Windesem reliquit, ut debuit, custodiendos, cunctisque petentibus fratribus & externis benignè accommodandos.*

Sic de Gerlaco Petri c. 54. refert, quòd in ipso Clericatu suo, id est nondum sacris Canonorum Regularium initiatus, & ætatis suæ circiter 19. aut 20. multos libellos composuit, in quibus, inquit, *optimum spiritualis vitæ speculum, & veræ perfectionis regula novitiis & tironibus Deo servire cupientibus apertè monstratur; sed in iis nomen propter Laicos eos*

habentes, noscitur immutatum; & mihi modò ante oculos obversatur M. SS. Codex Monasterii Canonicorum Regularium in Tongris, in quo codice plura diverforum Canonicorum Regularium Opuscula, nullis autorum nominibus insignita continentur. Primi titulus sic habet: Soliloquium cujusdam Regularis à cordis multiplicitate ad unum summum bonum continuò se colligentis: incipitque, In spiritu humilitatis. Et alterius titulus sic habet: Brevilquium seu exercitium vite spiritualis: incipitque, In tumultibus & accidentiis exterioribus niti esse quietus, &c. quæ duo Opuscula constat esse Gerlaci Canonici Regularis Windesemensis.

Sic Joannes Mauburnus, vir eruditissimus, in conversionis suæ exordiis varia pietatis Opuscula composuit, quæ, quibusdam ea efflagitantibus, utenda commodavit; sed nullo suo nomine insignita; immò cùm ab iis postea cum hac inscriptione, *Canonici cujusdam Regularis Rosetum*, Basileæ anno 1491. edita essent, succensuit illis vir modestissimus. *Malletem, inquit in præfatione suâ, has lucubrationes meas innomines & incognitas esse.*

Sic denique Thomas de Kempis, *vir ille*, ut meritò ait Langius, *Angelicæ doctrinæ*, adderet, & *modestiae*, plures quidem composuit eximios & verè aureos pietatis tractatus, quos & aliis faciliè utendos, sed nullo suo insignitos nomine concessit. Extat etiamnum Antuerpiæ, in domo Professæ Patrum Societatis Jesu, & thesauri instar asservatur Codex unus, partim papiraceus, partim membraneus, Thomæ manu exaratus, in quo plura ejus continentur Opuscula: sed nulli prorsus eorum nomen suum tanquam auctoris studuit præfigere; immò, quoad ab illo fieri potuit, se autorem eorum esse nos celavit. In ejus enim codicis primo folio hæc dumtaxat præmittitur inscriptio: *Liber Monasterii Canonorum Regularium in monte Sanctæ Agnetis Virginis ac Martyris prope Zwollis*; & in tertio folio habetur indiculus eorum quæ in toto codice continentur in hunc modum.

Admonitiones ad Spiritualem vitam utiles, aliàs de Imitatione Christi, Qui sequitur me.

Admonitiones ad interna trahentes, Regnum Dei intra vos est.

De Sacramento altaris, Venite ad me omnes.

De interna Christi locutione, Audiam quid loquatur.

De Disciplina Clausralium.

Epistola devoti ad quemdam Regularem.

Recommendatio humilitatis.

De mortificata vita.

De bonorum pacifica vita.

De elevatione mentis.

Brevis admonitio ab exterioribus.

In fine verò Codicis habentur hæc verba minio descripta. *Finitus & completus anno D. 1441. per manus fratris Thomæ de Kempis, in monte Sanctæ Agnetis Virginis & Martyris prope Zwollis; quæ subscriptio, ut optimè advertit Delfavius, nullo modo autorem designat. Quod usque adeo verum est, ut vel ipse Thomas totidem verbis nomen suum subtexuerit Missarum libro ac sacris Bibliis, quæ hodieque etiam visuntur Colonia & Lovanii, teste Rosweido in notis ad vitam Thomæ n. 7. & 8. Finitus & completus anno Domini 1439. in Vigilia Sancti Jacobi Apostoli per manus fratris Thomæ de Kempis in monte Sanctæ Agnetis, ut luce clarius pateat, Virum*

modestissimum primi codicis subscriptione adeo communi, quantum ab illo fieri potuit, celare nos voluisse de se autore horum Opusculorum, cum non inde se magis habendum esse eorum autorem optimè videret, quàm Evangeliorum aut Epistolarum Pauli cum utrisque pari forma parique ratione subscripserit.

Idem Lovanii, in Monasterio Sancti Martini, extat Codex alter partim etiam papiraceus, partim membraneus, uti superior etiam Thomæ Kempensis manu exaratus, in quo hæc ejus continentur Opuscula.

Soliloquium animæ.

Admonitiones ad vitam Spiritualem utiles, aliàs de Imitatione Christi, Qui sequitur me.

Admonitiones ad interna trahentes, Regnum Dei intra vos est.

De interna Christi locutione, Audiam quid loquatur.

De elevatione mentis ad inquirendum summum bonum.

Brevis admonitio Spiritualis exercitii.

De Sacramento Altaris.

Et nullum prorsus nomen auctoris;

immò nec amanuensis in hoc codice, aut in principio, aut in fine indicatur, nisi quòd in ejus primo folio hæc habentur: *Hic liber est scriptus manu & characteribus Reverendi & Religiosi Patris Thomæ de Kempis Canonici Regularis in Monasterio Sanctæ Agnetis prope Zwollis, qui est autor horum libellorum devotorum.* Joannes Ulimmerius Prior subscripsi 1586.

Neque verò tantùm librorum de Imitatione Christi & Opusculorum aliorum novem, quæ unà cum illis habentur in his codicibus, autorem esse se communi illâ, aut etiam nullâ subscriptione nos celavit Thomas, sed & in aliis operibus suis, sermonibus inquam ad novitios & vitâ Beatæ Liduvinæ idem etiam solo *Peregrini* nomine assumpto præstitit; illos enim sic inscripsit: *Sermones ad novitios fratris Peregrini.* Hanc verò sic: *Vita Beata Liduvinæ Virginis per fratrem Peregrinum.*

Atque ex iis jam palàm est omnibus nihil esse prorsus quòd miremur tot Librorum de Imitatione Christi M. SS. codices sine ullo auctoris nomine in variis Bibliothecis Belgicis, Gallicis &

Italicis extare, cùm illi ex anonimis Thomæ de Kempis codicibus exscripti sint, non esse mirum in uno Mellicensi Monasterio codices hujusmodi. anonomos numero XI. reperiri simul cum uno Norimbergæ impresso anno 1494. qui nomen Thomæ de Kempis præfert. In Sancti Udalrici apud Augustam Windelicorum Monasterio, in Vingarrensi, in Cavenfi, in Tongrensi, in Parisiensi P P. Celestinorum, denique in innumeris aliis Monasteriis ac Bibliothecis tales sæpè inveniri.

Sed neque jam etiam clàm quemquam est, tantum abesse tot M. SS. Codices nullo auctoris nomine insigniti, quidquam Thomæ Kempensi & causæ ejus hac nostrâ ætate ut incommodent, ut contrà potiùs vehementer illi suffragentur.

Nam ut de unis illis duobus codicibus à Thoma exscriptis, Antuerpiensi, inquam, & Lovaniensi dicam, fitne aliqui verisimile, Thomam de Kempis auctoris librorum de Imitatione Christi nomen unquam omisurum, si alterius fuisset? Immò caditne in ullius mentis & conscientiæ suspensionem, virum Ange-

licæ prorsus modestiæ, sicut & doctrinæ, qui hominum usque adeo gloriam ex operibus suis, eximiis licet, aucupari non affectabat, ut ea sine suo nomine divulgaret, istud unquam commissurum fuisse, ut semel & iterum in fronte & in medio operum suorum libros de Imitatione Christi insereret, & adscriberet, sibi que sic arrogaret, nisi verus & legitimus eorundem, sicut & aliorum parens esset? quis ita desipiat, ut hoc sapiat? poterat igitur certè unis illis duobus codicibus, si non egregiè dissimularent adversarii, lis tota dirimi; cùm enim fide omnium autorum, qui jam olim operum Kempensis indices texuere constet, reliqua octo opuscula, quibus hæc quatuor de imitatione Christi in hoc Autuerpiensi & Lovaniensi codice juncta sunt & inserta, à Thoma ipso composita esse, cur de solis illis quatuor de Imitatione Christi dubitabimus?

Quamquam verò in Bibliothecis Belgicis ac Catalogis earum non desunt etiam librorum de Imitatione Christi M. SS. alii codices plurimi, vel ipsius Thomæ ætate exarati, qui no-

men ejus tamquam autoris præferant. Id, ut refert Bollandus, R. admodum Pater Joannes Hasius, multis in Societate Jesu per Germaniam perfunctus muneribus, testatus est in Epistolis suis, qui & addebat plures hujusmodi codices in Bibliothecis Germanicis, maximè que Confluentix in Collegio eorum cui obvenerant plerique codices à devastato Regularium Monasterio se vidisse. Quod idem etiam testatur vir doctrinæ & probitatis famâ inclitus Dominus Chifflet, in Epistola sua Gallicè edita anno 1651. Parisiis ex editione Cramosianâ his verbis. *Comme je vis la controverse tellement opiniastrée, & les scandales de l'imposture qui vouloient avoir le dessus, je crûs que Dieu permettoit ce desordre, pour en faire naître la verité; & pour m'en éclaircir davantage, il n'y a manuscrit de cet Auteur dans les dix-sept Provinces des Pais-Bas & aux environs que je n'aye fait devoir de recouvrer, en ayant veû & leû & collationné plus de vingt avec grande curiosité & patience, & reconnu qu'une partie venoit du Mont Saint Agnès où a vescu Thomas, & des Monastères aujourd'huy occupez par les Hé-*

rétiq̃ues , où ces braves Disciples de M. Florent & de Gerard le Grand ont fleuri durant cent ans ; & entre autres j'ay tenu plusieurs mois les originaux mêmes de nôtre Thomas avec respect & consolation. J'ay aussi eû communication de plusieurs Inventaires & Catalogues des livres de ce tems-là , où ceux de Thomas à Kempis , & spécialement ceux de question , sont spécifiẽz sous son nom , en sorte qu'il n'en reste aucun doute.

Neque verò res est nobis factu admodum difficilis plures hîc recensere.

Primò enim ex illis 22. qui in Monasterio Mellicensi extant , nonnullos , ne dicam fortè undecim esse antiquissimos , qui Thomæ nomen præ se ferunt non levis est suspicio. Sed , opinor , hîc se circumveniri clamant adversarii. Quî enim , inquiunt , scimus id ita esse ? Hinc nempe , 1º. namque Prosper Farandus Canonicus Regularis Mediolanensis id sibi compertum esse testatur , inter tot M. S S. codices unum nomine Thomæ inscriptum jam ab anno 1421. extitisse , nec istud unquam inficiari ausus est Caietanus , aut Quadrimarius. 2º. Ex tot M. S S. codicibus undecim
dumtaxat

dumtaxat hætenus in lucem producti sunt ; undecim verò reliqui , etsi unà cum aliis in eadem Bibliothecâ , ut fateretur Quatremarius, suis integris numeris, litteris & loculis signati contineantur ; nunquam tamen , ut in medium prodirent , à RR. PP. Benedictinis potuit impetrari. Cumque semel , iterum & tertio , ut viderentur, efflagitatum esset, toties ab illis responsum est, nec dum illos inveniri posse. Scilicet perfectè scitur quibus numeris, litteris & loculis signati includantur, & tamen ubi sint nescitur. Certè non est quòd in hac responsione diutiùs immorer. Nimium est enim quod ex eâ à prudentibus & minimè etiam malis hominibus intelligitur.

2º. Augustæ Windelicorum in Monasterio Sanctæ Crucis Canonorum Regularium Sancti Augustini asservantur codices duo de Imitatione Christi; alter in folio, in cujus fine hæc subduntur: *Compiler hujus Opusculi fuit quidam frater Thomas nomine de Conventu & Ordine Canonorum Regularium montis Sanctæ Agnetis Trajectensis.* Alter in quarto, in cujus fine hæc habentur: *A magno*

Lapsatore absolutus anno 1440. Porro antiquarii utrumque codicem ejusdem esse manus judicarunt, ut liquet ex instrumento hac de re publico, quod extat in Bibliothecâ Sangenovefanâ.

3°. Bruxellis in Bibliothecâ Carthusianorum servatur codex antiquus, cujus sibi per plures menses usuram factam fuisse ait clarissimus Abbas Chiffletius, continetque libros quatuor de Imitatione Christi, hoc scilicet ordine, ut qui nobis jam tertius est, in eo sit primus; & è contrâ, qui nobis tertius, sit in eo primus; & in ejus fine hæc verba manu ipsius exscriptoris habentur: *Explicit devotus tractatus cujusdam Regularis de interna locutione Christi ad animam fidelem, scriptus per manus fratris Jacobi Baenst, finitus in anno M. cccc. lxxiii. die mensis Octobris.*

4°. Codex quo usus est Zeintherus cum nomine Thomæ adhuc ipso in vivis agente libros de Imitatione Christi ante annum 1470. typis aheneis edidit; codex, inquam, ille certè nomen Kempenensis præ se ferebat.

5°. In illustri Augustanæ Reipublicæ Bibliothecâ extabat etiam non ita pri-

dem librorum de Imitatione Christi codex nomine Thomæ inscriptus, ut habetur in Catalogo Eliæ Ehingeri, impresso Augustæ anno 1633. sed jam in illo codice à quibusdam annis à folio 25. ad 48. omnia sunt excisa, adeo ut annus quo libri de Imitatione Christi scripti sunt, à Mathia Farinatore Ordinis Carmelitarum & Sacræ Theologiæ Lectore ejus codicis exscriptore, resciri non possit. A quibus flagitium istud sit perpetratum, viderint adversarii : certè non à nobis, quorum imprimis interesset monumentum istud conservari. Cæterum tamen annus ille facilè colligitur. Nam in eodem codice continentur alia multa Opuscula tomis duobus contenta, & in fine prioris habetur scriptum ipsum esse anno 1472. in fine verò posterioris anno 1475. Porro inter priora Opuscula libri de Imitatione Christi nomine Thomæ Kempensis inscripti continebantur, ut Illustrissimus D D. Proepiscopus Augustanus, qui hæc omnia vidit, instrumento publico testatus est, quod extat in Bibliothecâ Sangenovesanâ.

6°. Admodum R. D. Paulus Scofh,

C ij

Prior Rubræ Vallis, & Canonorum Regularium Congregationis Windefemensis Superior generalis, penes se habuit ex Monasterio majore Maseikensi librum de Imitatione Christi nomine Thomæ anno 1477. ut Bollandus refert.

7°. Reinsbergæ in Monasterio Canonorum Regularium membraneum codicem perantiquum haberi refert idem Bollandus, qui eodem nomine Thomæ de Kempis præfixo libros de Imitatione Christi continet.

8°. Denique, ut multis aliis recensendis supersedeam, Sanderus in Bibliothecâ sua M. S. S. codicum Belgii plures perantiquos nomine Thomæ cum aliis suis operibus in variis diversorum Monasteriorum etiam Ordinis Sancti Benedicti Bibliothecis extare refert.

Primâ parte pag. 136. in Bibliothecâ Sancti Martini Tornacensis.

Pag. 193. in Monasterio Dunensi Ordinis Cisterciensium.

Secundâ parte pag. 3. in Monasterio Sancti Lamberti Lætiensis Ordinis Sancti Benedicti.

Pag. 88. in Bibliothecâ Trajectinâ ad Rhenum.

Pag. 150. in Monasterio Affliginienſi
Ordinis Sancti Benedicti.

Pag. 168. in Bibliothecâ Ecclesiæ Par-
cenſis Ordinis Præmonſt.

Pag. 196. & 198. in Bibliothecâ Tun-
grenſium Canon. Reg.

Et pag. 224. Lovanii in Valle Sancti
Martini.

Reſtat unum hîc ſubjiciendum, nem-
pe amanuenſes quosdam in describen-
dis nonnullis è primis illis codicibus
anonimis, iis quædam initio, aut in fine
Joannis Gerſonis aut Bernardi Opuscu-
la nomine eorum inſignita attexuiſſe,
ut de Gerſone liquet, vel ex Mellicenſi
codice anni 1434. & innumeris aliis,
& de Bernardo ex altero Mellicenſi
1421. & pluribus aliis. Verùm qui poſteà
hos codices exſcribebant, jam nullo
habito diſcrimine & Opusculis & libris
de Imitatione Chriſti, etiam cùm ſoli
deſcribebantur, Joannis Gerſonis, aut
divi Bernardi nomen apponebant; hinc-
que, ut jam diximus, quibuſdam Typo-
graphis errandi facta eſt occaſio. Inde
verò ſumpta à Caietano fabulam ador-
nandi ætate noſtrâ, quam exinde riſus
& admurmuratio ſpectatorum non me-

diocris sæpè consecuta est : nactus enim unum aut alterum ex recentioribus illis codicibus Joannis Gersonis nomine inscriptis , immutatoque exiguâ gladioli operâ *o* in *e* , jam personatum Joannem Gersenem pro autore librorum de Imitatione Christi magno conatu scenam suam ac fabulam adornans , intrudere tentavit , quem præterea Benedictinum oriundum de Canabaco , Abbatemque Sancti Stephani Vercellensis finxit , & hominibus persuadere contra fidem omnium retrò sæculorum ineptè molitus est , sed exitu prorsus infelici : nam statim Heribertus Rosveïdus Belga Societatis Jesu scriptor diligentissimus , & Gabriel Naudeus Parisinus , vir non minùs veritatis amans , quàm doctrinâ celebris , fraude & corruptelâ horum codicum apertè denudatâ , choriagium omne disturbaverunt ; immò re ad Senatum Parisiensem delatâ anno 1652. Pseudo-Gersen iste Monachus Benedictinus limine pulsus est , & in medium deinceps prodire solemnè edito prohibitus.



CAPUT IV.

Patriam, ætatem, vitæque auctoris institutum in unum Thomam convenire.

QUI strictim à nobis summatim-
que antecedentibus tribus capi-
tibus libata tum veterum scriptorum,
tum editionum antiquarum, tum deni-
que vetustissimorum M. SS. codicum
testimonia legerint: quibus extrinsecus,
ut ita dicam, aurei de Imitatione Chri-
sti libelli, unus ac legitimus auctor Tho-
mas de Kempis, tam certò asseritur:
satis, opinor, admirari non poterunt
fuisse aliquem hac nostrâ ætate tantâ
confidentiâ prædictum, ut tam illis om-
nibus contraria sentiret, hominique ad
hunc diem incognito, Joanni scilicet
nescio cui de Canabaco, vel de Cava-
gliâ, sacratissimum illud opus contra
trium retrò sæculorum fidem, adeoque
contra sensus ipsius communis existima-
tionem tribuere auderet. Verùm istud
tum demùm multò facient magis, cum
quæ ex visceribus causæ, patriâ inquam,
ætate, vitæ instituto, doctrinâ, stiloque

*Argumento
sumptis ex
ipso libello
probatur au-
torem ejus esse
Thomam de
Kempis.*

authoris eruuntur argumenta, viderint; has enim omnes circumstantias non in fictitium Gersensem Italo-Benedictinum de Canabaco, Abbatem Sancti Stephani Vercellensis, quem anno 1220. unà cum Sancto Francisco vixisse fabulantur, sed in Thomam de Kempis Canonicum Regularem montis Sanctæ Agnetis prope Zwollis in Diœcesi Trajectensi, qui florebat anno 1410. convenire, usque adeò palàm, & oculis omnium qui hæc paulò diligentius examinant apparet, ut hac de re non plus dubitari posse videatur, quàm sol ne in meridie luceat addubitemus. Res, quod attinet ad patriam, tempus, vitæque autoris institutum, sic clarè conficitur.

*Autorem
Flandrum
fuisse, & ex
Germania in-
feriori oriun-
dum.*

Primò enim voces Teutonicæ, Flandricæque phrascs, quas singulis librorum de Imitatione Christi capitibus habet autor, & usurpat semper, quem alium ipsum quàm Flandrum ac Teutonem indicant? âge, quasdam hîc describamus.

Quem alium innuit hæc libri primi c. i. phrasis adeo peregrina, *si scires totam bibliam exterius*, quis unquam & usquam Latinarum, Italarum, vel alia-

rum gentium *memoriâ aliquid tenere* dixit *exteriùs scire*? hæc phrasis solis Flandris est usitata, unde Florentius Daven- triensis in epistolâ quadam quam refert Buschius l. 2. c. 39. *Consulo tibi, inquit, quòd habeas speculum Bernardi, & discas exteriùs.* Et infrà : *Libellum scis exteriùs, id est memoriâ.* Et c. 33. *Laicis in publico faciens collationem quiddam exteriùs, id est ex memoriâ, ut moris est, dixit; sed continuò scrupulo tactus dixit, oportet me librum respicere.* Certè hoc purum putum Flandricismum esse, vel ipse Delfavius satis advertit, cùm ab editione suâ (quâ fide viderit) phrasim hanc uti & multas alias tam diligenter amovit, ne scilicet vel ex primo operis hujus capite statim ab omnibus deprehenderetur, librum hunc non esse Italo-Benedictini, sed Flandri & Teutonici. Quemadmodum olim Pollio deprehendebat in Livio patavininitatem.

Quem alium, quàm Flandrum, arguit hæc phrasis? l. 1. c. 2. *Hæc est altissima & utilissima cognitio, de seipso nihil tenere.* Sic etiam Flandri loquuntur. Unde Thomas de discip. claustr. c. 13. *Verè & beatè vivit, qui magis in Christo quàm*

in seipſo manet, nihil de ſeipſo tenens. Et Joannes de Huesden in Regulâ ſuâ: Nimis multum non teneas de teipſo. Quem alium, quàm Teutonem declarat hæc loquendi formula? l. 2. c. 10. Non ponas te ad multam requiem, ſed ad patientiam. Et l. 4. c. 11. Oportet ut me ponam ad magnam patientiam. Hæc etiam phraſis Teutonica eſt; unde Thomas Sermone ad novit. p. 2. S. 1. Ponat unusquiſque ſe ad patientiam, ſi vult habere cordis tranquillitatem. Et Opuſc. 10. Oportet te ad pacem ponere. Et Buſchius l. 2. c. 24. Frater ille putavit jam ſimpliciter ipſum ad pacem ponere ſe debere. Quem denique alium, quàm Flandrum, indicant hæc phraſes, & voces l. 1. c. 7. Ne ſtes ſuper teipſum. Et l. 2. c. 4. Quando homo ſtat ſuper ſeipſum. Et l. 3. c. 41. Fili, noli tibi attrahere, ſi videas alios honorari. Et l. 4. c. 10. Propter aliquam turbationem parvam vel gravitatem ſacram, ne dimittas communionem.

Superſedeo innumeris aliis hujusmodi peregrinis phraſibus, quibus ita paſſim autor ille abundat, ut qui Latinè & Flandricè ſcit, videat ipſum non Latinè magis quàm Flandricè loqui: cùm enim plures habeat Teutonicas voces

ac phraſes, tum verò quas habet Latinas, non Latinè, ſed prorſus Flandricè eloquitur, non quidem ingenii vitio, quod illi fuit admodum eximium, ſed quòd vel ſæculi ſui barbarie & patriæ peregrinitate infuſcatus fuerit, vel quòd cùm ſcribat ſapientiâ duce, comite eloquentiâ, illam ſequens, hanc ducens rerum quas ſcribit curam & ſollicitudinem habet, verborum & compoſitionis eorum non item.

Quemadmodum igitur olim Aſcenſius Badius in illâ editione quam R. R. PP. Sancti Germani à Pratis anno 1521. edendam procuraverunt, aiebat libros de Imitatione Chriſti Joanni Gerſoni Cancellario Pariſienſi Gallo perperàm adſcribi, cùm totus ſtilus Teutonicam redolet phraſim; ita nos illud idem etiam jam adverſum ipſos Benediſtinos dicimus, perperàm eoſdem libros Joanni Gerſeni Italo-Benediſtino de Canabaco adſcribi, cùm totus ſtilus Teutonicam redolet phraſim.

2°. Autoris ætas Gerſeni, quem anno 1220. vixiſſe fingunt, imprimis repugnat; ab eo enim integro duorum ſæculorum intervallo diſtat; & contrà,

*Auctorem non
vixiſſe niſi
circa annum
1410.*

in Thomam de Kempis, qui anno 1410. post inchoatas *Devotorum* Congregationes & instituta Canonorum Regularium Windesemensium Monasteria florebat, mirificè convenit. Ut enim omit- tam, cùm l. 3. c. 50. laudetur Sanctus Franciscus, qui nonnisi anno 1228. San- ctorum Catalogo ascriptus est, hinc li- quere impossibile esse hoc opus jam ab anno 1220. ut volunt adversarii, compo- situm esse. Ut, inquam, hoc omit- tam, ecce autor, cùm sæpè Congregationum *Devotorum* mentionem faciat, tam disertè innuit se nonnisi anno circiter 1410. scri- pisse, ut hinc dubitandi locus non su- perfit. Verùm argumentum istud, ut perfectè intelligatur, quædam ex histo- riâ Daventriensi eruenda sunt.

Autore Gerardo Grotio cive Daven- triensi, ingenti sanctitatis & prædicatio- num suarum famâ *Magno* appellato, & Florentio Radwino, pietate etiam ad- modum inclito, anno post Christum natum circiter 1376. primùm Daven- triæ, deinde per totam Alamanniam, Flandriam, & Hollandiam institutæ sunt Sodalitates quædam *Devotorum*, seu Clericorum in communi viventium, un-

de postea Canonorum Regularium
Windefemensium Monasteria prodie-
runt. De harum Sodalitatum origine
scripsere Buschius, Thomas de Kempis,
Andreas Valerius, Jacobus Revius in
historiâ Daventriensi, & Joannes Linde-
bornius in notitiâ Episcopatus Daven-
trienfis. Et quidem Buschius de origi-
ne harum Congregationum c. 2. cujus
hic est titulus : *Quomodo vita communis
omnium Congregationum moderna devotio-
nis primum suum sumpsit exordium à
Venerabili Christi Levita Gerardo Magno,*
*hæc habet : Hujusmodi occasione, Gerardi
scilicet & Florentii, cum suis Clericis in
vita communi viventium omnes ubique Con-
gregationes Devotorum, Presbyterorum,
Clericorum, & sororum primum susce-
pisse dignoscuntur exordium per orbem jam
Alammanicum plurimum dilatata. Et Tho-
mas in vita ejusdem Gerardi Magni
c. 15. cujus hic est titulus de devotis
Congregationibus & Monasteriis à Gerardo
Magno exortis : Benedictus, inquit, Deus,
qui auxit populum suum, ut de paucis gra-
vis converfis surgerent multe Congregatio-
nes Devotorum. Et Andreas Valerius :
Gerardus Magnus, vulgò Groot, Clericos sive*

fratres vite communis, id est Devotos, instituit. Idem & alii referunt.

Porro hujusmodi Sodalitates *Devotorum*, ut à cæteris Religiosorum Collegiis, quæ Monasteria dicuntur, distinguerentur, vulgò *Congregationes*, nomine sibi singulari, in his locis & temporibus appellabantur, ut jam liquet, & ex his videri potest, quæ habet Thomas in unâ Epistolarum suarum: *Quid obloquimini, quia servi Dei mundum fugiunt, & Monasteria vel Congregationes Devotorum intrant?* Et in vita Joannis Gronde c. 1. *Eximie Congregationis primus fundator extitit Florentius.* Cap. 2. *Cum primis fratribus Congregationis.* Cap. 3. *Mansit cum fratribus in Congregatione.* Et c. 28. *Fundatis quamplurimis Congregationibus & Monasteriis.*

Harum verò Congregationum Sodales appellabantur *Devoti*, ut à Thoma frequentissimè in Chronico montis Sanctæ Agnetis c. 4. *Dominus Gerardus Canonicus in Trajecto magnus Devotorum amicus.* Et cap. 6. *Vir valdè honestus & potens, armiger in Hosselt, integer amicus Devotorum.* Et cap. 18. de Frederico Trajectensi Episcopo loquens: *Fuit amicus omnium Devotorum.*

Aliquando appellabantur *Fratres Devoti*, ut c. 10. *Hic primum Daventria cum devotis fratribus stetit.* Et c. 26. *Exiit ira Dei contra Devotos & devotas Congregationes Fratrum & Sororum.*

His prænotatis, ecce tibi autorem librorum de Imitatione Christi, de iisdem omnibus disertè mentionem facientem.

Et de *Congregationibus* quidem l. 1. c. 17. n. 1. *Non est parum in Monasteriis vel in Congregatione habitare.*

De *Devotis* verò ac *Fratribus devotis* eodem l. 1. c. 18. n. 6. *Utinam in te penitus non dormiret profectus virtutum, qui multa sapius vidisti exempla Devotorum.* Et l. 4. c. 14. *cujus titulus, de quorundam Devotorum ardenti desiderio ad corpus Christi.* Quando, inquit, recordor Devotorum tuorum Domine, tunc erubescō. Et l. 2. c. 9. n. 6. *Sive adsint homines boni, sive Devoti fratres.* Et l. 3. c. 3. *Ego sum remunerator omnium Devotorum.* Et c. 52. n. 2. *In veritate confiteor, quoniam sum dignus omni ludibrio, nec decet me inter Devotos tuos commorari.* Et l. 4. c. 9. n. 5. *Offero tibi omnia pia desideria Devotorum.* Et c. 14. n. 3. *Licet tanto desiderio, tam*

Specialium Devotorum tuorum non ardeo. Denique, ut omittam innumera alia loca, in quibus *Devotorum* meminit, c. 17. n. 3. *Omniū Devotorum jubilationes ardentes, affectus, mentales excessus, ac supernaturales illuminationes ac calicas visiones tibi offero.* Quorumnam Devotorum in particulari fuerint illi ardentes affectus, mox dicam.

Tandem hîc omitti non debet Religiosos mendicantes his *Devotorum* Congregationibus, ac vitæ eorum communi statim ab initio vehementissimè adversatos fuisse; unde, ut videre est in primo tomo operum Gersonis Cancellarii, unus illorum frater *Mathæus Crambon*, in Concilio Constantiensi ausus est multas adversus eos propositiones pestíferas, ut loquitur Gerson, blasphemias, injuriosas, ac hæreticas proferre; nempe *non licere illis devotis vitam communem ducere, cū religiosi non essent; facere eos contra jura Canonica; peccare mortaliter, tria vota, paupertatem, castitatem, & obedientiam voventes; peccare similiter eos omnes, qui hos consilio & auxilio juvarent.* Quod probare nitebatur quibusdam Joannis 22. extravagantibus, ac
D.

D. Thomæ, & Magistri Sententiarum doctrinâ. Verùm harum Congregationum à Cardinali Cameracensi & Joanne Gersone & aliis Theologis in hoc sacrosancto Concilio agente Joanne de Huesden Canonorum Regularium in Windesem Priore & præcipuo *Devotorum* amico, qui huic Synodo intererat, defensione susceptâ, coactus est *Mathæus iste Crambon*, propositiones suas solemniter ejurare. Idem refert & Buschius lib. 1. de origine harum Congregationum, tum cap. 2. in quo narrat cùm Florentius Gerardum Magnum aliquando sic affatus esset : *Prædilecte Magister, quid noceret quòd ego & Clerici isti in communi pariter viveremus ?* Respondisse Gerardum, *communia, communia. Isti de ordine Mendicantium nullatenus sustinebunt, sed totis viribus suis resistere, & omnino se opponere tentabunt.* Tum cap. 3. cujus titulus est, *de fratribus mendicantibus communem vitam modernorum Devotorum reprobare conantibus*, sed à Gerardo Magno publicè convictis : in quo capite hæc fusè exequitur ; primò, quot in Cœnobiis horum Religiosorum, qui tum temporis, id est sæculo 14. à pri-

stina regulæ & morum disciplinâ longè defecerant, fierent mala. 2°. Quot scandala apud populum excitarent, moventes quæstiones de Extravagantibus & Clementinis, quibus vitam communem *Devotorum* impugnabant, his dudum reprobata & anathematizata causantes. 3°. Denique sequenti capite narrat quomodo horum Religiosorum disputationibus ac dissensionibus commoti Cives Campenses, amici priùs Gerardi Magni ac discipulorum ejus, quosdam *Devotos fratres* ex urbe ejecerint.

Et ecce autorem librorum de Imitatione Christi de iisdem Religiosorum Mendicantium scandalis impugnationibus ac dissensionibus querentem, statim initio libri primi c. 3. *O si tantam adhiberent diligentiam ad extirpanda vitia, & virtutes inferendas, sicuti ad movendas quæstiones, non fierent tanta mala & scandala in populo, nec tanta dissolutio in cœnobiiis.* Et c. 14. n. 2. *Propter diversitatem sensuum & opinionum satis frequenter oriuntur dissensiones inter amicos & cives, inter Religiosos & Devotos.*

Ex quibus omnibus quis non clarè videat; cùm igitur in libris de Imita-

tione Christi tam frequens ac disertā
Devotorum fratrum, Congregationum, ac
 impugnationis eorum Mendicantibus
 factæ occurrat mentio : hinc colligen-
 dum esse, impossibile prorsus esse ut li-
 ber ille anno 1220. à Gersene de Ca-
 nabaco compositus sit, cùm constet illas
 Congregationes *Devotorum* nonnisi anno
 1380. incepisse.

Tertiò, vitæ auctoris institutum Ger-
 seni repugnat, & Thomæ de Kempis
 convenit : nam, ut omittam auctorem
 libri de Imitatione Christi se inter *De-
 votos* & in eorum Congregatione vitam
 egisse testari. Unde & eorum exemplo
 ad virtutis profectum sese incitat & ac-
 cendit. *Utinam*, inquit l. 1. c. 18. *in te
 penitus non dormiret profectus virtutum,
 qui multa sæpiùs vidisti exempla Devoto-
 rum.* Et l. 4. c. 14. *Quando recorder De-
 votorum, tunc erubesco.* Quod in Gersenem
 non potest cadere, & in Thomam
 mirè convenit, qui de seipso narrat in
 vita Arnoldi Sconoviensis : *Eodem tem-
 pore, adjuvante Domino Florentio, & con-
 sulente, domum ejus inhabitare cæpi, &
 ferè per annum in Congregatione illâ per-
 mansi.* Et in vita Joan. Gronde, c. 1.

*Auctorem in
 his Devoto-
 rum Congre-
 gationibus in-
 stitutum fuisse
 & Canonicum
 Regularem
 Vindeljemensem.*

Nunquam priùs tales homines tam Devotos vidisse me memini.

Ut taceam similiter eundem autorem, postquàm etiam vitam religiosam professus esset, scribere tamen se adhuc inter *Devotos* commorari. Lib. 3. c. 52. n. 2. *In veritate confiteor, quoniam non decet me inter Devotos tuos commorari:* quod etiam in Thomam mirè convenit; & quo solo testimonio tota de autore librorum de Imitatione Christi controversia posset dirimi, nisi egregiè dissimularent adversarii. Nam hinc luce meridianâ clarius patet autorem horum librorum fuisse Canonicum aliquem Regularem Vindeſemensẽ. Nam Canonici Regulares Capituli Windeſemenſis hoc nomine appellabantur; unde & in singulis ferè capitibus Chronici sui hoc nomine Canonicos Windeſemenſes Buschius appellat, ut cùm ait cap. 15. *Patres Devoti, in Windensẽ;* & cap. 8. *Fratres Devoti in Windensẽ,* & *frater Devotus Joannes de Huesdem. Frater Devotus Gerlacus Petri. Frater Devotus Joannes Scutken.* Triplici autem de causâ hi Canonici Regulares *Devoti* appellabantur: tum proptereà quòd à

Florentio Patre omnium *Devotorum* Monasterium Windeslense originem habuit, & qui primi in eo commorati sunt in schola Florentii prius instituti fuerant; unde autor Chronici Vinde-
sensis l. 2. de origine modernæ devotionis c. 10. *Magnus ille, inquit, pater familias Dominus Florentius, in Daventria omnium Devotorum pater & patronus, primus Monasterii nostri in Vindesem inchoator, sollicitator & promotor fuit: omnes enim ejus erant discipuli, & in sancto proposito ab ipso instituti, atque de ipsius consilio, auxilio & favore totius Monasterii nostri & structura ejus pendebat effectus.* Tum propterea quod diu lex illa in Vindelem & aliis Monasteriis viguit, ut nullus Sacris Canonorum Regularium initiaretur, nisi prius in domo Florentii inter *Devotos* diu probatus fuisset: unde idem autor Chron. Vind. c. 19. *Nullus, inquit, à fundatione Monasterii nostri per sexdecim & eo amplius annos ad Canonorum Religionem susceptus est in Vindelem, qui non primò apud Patres istos Devotos exercitatus fuerat & probatus.* Tum denique propterea quod tanta semper *Devotos* inter domus Florentii

& Canonicos Vindefemenfes servata eſt unio, ut omnia prorsus illis eſſent communia, ac in nullo differrent. Unde idem autor Chron. Vindefem c. 15. *Dominus, inquit, Florentius, ceterique patres Devoti, & fratres nostri primitivi, quibus per omnia cor unum & anima una erat in Deo, in nullo penitus præterquam in habitu, qualemcumque differentiam præferebant.* Unde & cap. 17. *Dominus, inquit, Florentius & alii Presbyteri domus suæ à nullis tractatibus communibus aut privatis fratrum nostrorum in Vindefem excludi consueverunt, sed ad omnia eorum consilia, & Monasterii negotia, tanquam in propriis suis domibus, libenter sunt suscepti.*

Ut, inquam, hæc omittam, ecce ipsismet verbis quibus autor ille librorum de Imitatione Christi utitur, ut se vitam Religiosam & Monasticam professum esse significet, clarè & apertè se unum ex illis *Devotis* & Canonicis Regularibus Capituli Windesemensis innuit. Hoc ut palàm omnibus illucescat, antequàm professionis ejus exprimendæ formulam afferò, priùs animadverti velim *Devotos* & primitivos, ut loquuntur,

Canonicos Windesemenfes, ut fe fuos-
que ad vitam Religiofam, & in eâ con-
ftantiam, fervorem ac perfeverantiam
vehementiùs accenderent & inflamma-
rent, hac uti cohortationis formulâ so-
litos fuiſſe; nempe attentiffimè cogi-
tari, & animo diligenter expendi vole-
bant, verè vitam boni Religiofi ac Mo-
nachi Crucem eſſe, ſed ducem Para-
diſi. Hanc Crucem ſibi adeo impoſi-
tam; hanc ſe propter Chriſtum ſuſce-
piſſe; hanc ferventer amplectendam;
retrò abire non licere, ſed in eâ fidelif-
ſimè uſque ad mortem perfeverandum;
Chriſtum porrò, qui dux & præceſſor in
eâ fuiſſet, adiutorem futurum; ipſum
ante eos egreſſurum; ipſum denique
unà cum eis & pro iis pugnaturum.
Hoc ſibi, hoc ſuis Patres illi, quà ver-
bis, quà ſcriptis frequentiffimè itera-
bant, & magnoperè commendabant.

Hinc autor Chronici Wind. l. 2.
c. 4. *Cùm nulla, inquit, noſtra actio in-
terna vel contemplatio poterit eſſe edificato-
ria, niſi paupertatis & obedientia, humili-
tatis & continentia & pœnitentia Crucem
amplecti videamur, & ad eam affici & in-
clinari cunctis indiciis approbemur: ideo*

Patres nostri primitivi in Windesem hanc Crucem pœnitentiæ ardenter se amasse, posterisque suis ferventer amplectendam esse, verbis suis & scriptis docuerunt.

Hinc Joannes de Huesden Superior Generalis Capituli Windesemenfis, libellum suum, de quo mox plura, orditur his verbis : *Dilecte frater, persevera usque in finem, ut salvus fias in æternum cum sanctis, qui non solum benè inceperunt, sed etiam salubriter perseveraverunt, in Sancta Cruce pœnitentiæ, quam propter amorem Dei susceperunt.*

Hinc Chronici Wind. l. 2. c. 59. Henricus Loider suos sic affatur : *Sicci- ne edificatur Crux Christi, ad cujus erectionem solemniter vos ibi estis collocati? amplectimini Crucem Christi.*

Hinc idem c. 67. de Alberto Win- bergen Canonico Regulari in Windesem : *Magnâ, inquit, reverentiâ Crucem Crucifixi gestabat in manibus, sed Crucem pœnitentiæ quâ mundo erat crucifixus, corde & corpore se portare in omni suo apparatu intuentibus se ostendit, quem fratres servi Crucis sunt secuti, pœnitentiæ Crucem deferentes usque in altissima Dei Tabernacula.*

Hinc , ut refert idem autor c. 44. Henricus Mandé , vir altiffimarum contemplationum in Windefem , in quadam revelatione fibi divinitus oftensâ fuper statum Devotorum & Canonico- rum Regularium , *vidit omnes illos cum Gerardo Magno , Florentio , & Joanne de Huesden , Crucem auream lapidibus circumornatam manu fuâ gestantes , pro eo quòd illam , dum viverent , gestaffent .*

Hinc denique Thomas à Kempis Serm. 3. p. S. 2. *Eia , fratres , inquit , dilecti , amplectimini defideranter Crucem . O Religiofe Monache , noli ab assumptâ Cruce in Ordine recedere , fed sustine , & portam usque ad mortem : Christus cum Cruce tibi obviat , & iter ad caeleste regnum , quò pergere debeas , ostendit . Et Opusculo duodecimo .*

Vita boni Monachi Crux est , sed Dux Paradisi .

Jam licet , & libet autorem librorum de Imitatione Christi loquentem audire , ac videre juvat an non etiam iisdem prorsus verbis utatur . Hanc itaque loquendi formulam adhibet , ut se suosque ad vitam Religiosam , & in eâ perseverantiam cohortetur . *Suscepi , in-*

quit l. 3. c. 56. *Suscepi, Domine, de manu tua Crucem. Portabo, & portabo eam usque ad mortem sicut imposuisti mihi verè.*

Vita boni Monachi Crux est, sed Dux Paradisi.

Eia, fratres, pergamus simul; Jesus erit nobiscum. Propter Jesum suscepimus hanc Crucem; propter Jesum perseveremus in Cruce: erit adjutor noster, qui est Dux noster. En praeceptor Rex noster ingreditur ante nos, qui pugnabit pro nobis: sequamur.

CAPUT V.

Triam primorum de Imitatione Christi librorum doctrinam omnem, sententias & praecepta ex Joannis Voossii de Huesden Superioris in Windefsem Generalis libello sumpta esse.

UT ne ab eo, quod suprà institui-
mus, argumento discedamus, quo
librorum de Imitatione Christi autorem
nonnisi post tempus ac ævum quo *Devo-*
torum Congregationes & Canonicorum
Regularium Windefsemensium Mona-
steria à Gerardo Magno & Florentio
instituta sunt, vixisse asseruimus: ecce

alia quædam juvat hîc addere, quæ maximam his omnibus, quæ hætenus diximus, lucem allatura sunt.

Haud dubitans itaque ausim asseverare trium primorum de Imitatione Christi librorum (si pauca quædam, quæ tum ex Scripturis Sacris, tum ex divinorum & Ecclesiasticorum officiorum precibus, tum denique ex D. Bernardo, autor in hoc suum opus transtulit, excipias) reliquam omnem doctrinam, sententias & præcepta ex quodam Joannis Voossii de Huesden Superioris in Windesem Generalis libello, qui maximè inter Windesemeneses Canonicos, & fratres *Devotarum* Congregationum erat in usu, sumpta esse.

Et quandoquidem, hoc à nobis certò & evidenter si erit semel demonstratum, ingens usque adeo causæ Kempeni hinc accedet pondus & momentum, ut ex illo statim inclinata ac prolapsa spes omnis Gersenistarum penitus corruat ac profligatur: pretium aliquod operæ facturi sumus, si argumentum istud paulò fusiùs exequamur, si priùs tamen quis, qualis ac quantus vir fuerit ille Joannes Voossius dixerimus.

Autor Chron.
Vind. l. 2.
c. 10.

Fuit Joannes Voossius oriundus Huesden, quod nobile ac perantiquum oppidum est in Hollandiæ Brabantiaque confinibus, situm tertio ferè lapide à Silva Ducis, unde ei quoque deinceps cognomen factum.

Is admodum adolescens, Daventriam, ubi tunc temporis bonæ artes imprimis florebant, studiorum causâ, venit. Quibus dum sedulus operam uti & pietati navat, Gerardi Magni ac *Devotorum*, ad quos frequentius adibat, consuetudine delectatus, tandem iis adhærere, ac vitæ eorum institutum sectari statuit.

Gerardus, ut erat acerrimus ingeniorum æstimator, bonæ indolis & honestæ frontis adolescentem, verecundum, humilem, industrium, & in omnem virtutem flecti cæreum ac facilem intuitus, ingenti admodum in hoc pii juvenis proposito exultavit lætitiâ; & quasi animo præsagens, *iste est homo*, inquit, *quem quæsi*, cum quo bona in terra operabor; Spiritu enim Sancto revelante, inquit autor Chronici Windefemensis, *cognovit eum Patrem & patronum futurum omnium Devotorum & Canoniorum Regularium reformandarum.*

Verùm cùm non ita multo postea tempore Gerardus omnino caruisset rebus humanis, mansit Voossius noster in schola Florentii, à quo scientiâ & pietate auctus, tandem pro solito more in Windesem anno 1388. id est biennio post hoc Monasterium fundatum, & ætatis suæ anno 25. deductus est, ibique sacris Canonorum Regularium initiatum, tantos brevi temporis spatio in virtutibus omnibus processus effecit, ut anno 1391. & ætatis suæ 28. votis omnium ita fieri ultrò efflagitantibus, in Superiorem Generalem sit electus.

*Autor Chron.
Wind. l. 2.
c. 12.*

Incredibile est quanta hinc vicinis omnibus provinciis facta sit lætitia, quippe, inquit autor Chronici Windesemensis, *toto orbi Alamannico Joannes de Huesden morum ac virtutum excellentiâ, alterum Bernardum, alterum Malachiam, plenus scientiâ & gratiâ coram Deo & hominibus perfectissimè referebat.* Elucebat in moribus ejus modestia, in incessu gravitas, in verbis sapientia, in actionibus insignis quidam honestatis splendor, prudentia in consiliis, in negotiis gerendis dexteritas & sagacitas, in dignitatibus exercendis humilitas, in prof-

*Autor Chron.
Wind. l. 1.
c. 19.*

peris & adversis æquabilitas; denique ore & vultu sic cunctis gratiam exhibebat, ut omnes ad sui observantiam ac venerationem simul alliceret.

Prior Generalis electus, ut sedium patrum suorum dignus haberetur, & novellum hoc germen nuper inchoatæ devotionis, & Monasticæ in Windensem institutionis à Deo sibi creditum, inter crebras hujus mundi & humani generis inimici procellas & tempestates in omni charitate, pace & religione diligenter foveret, fructuique sanctæ conversationis in Ecclesia erga omnes ferendo accommodum perduceret, Lutetiam Parisiorum venit, ut *antiquum*, inquit Autor Chronici Wind. *Religionis habitum & Ordinis disciplinam à Canonicis Regularibus Sanctæ Genovefæ & Sancti Victoris perfectius edoceretur, ac in suos fratrumque suorum mores transferret. Quæ* res adeo illi feliciter cessit, ut brevi tempore omnis Monasterii in Windensem antehac exercita regularis observantia licet magna & fervens extitisset, usque ad hæc tamen primi regiminis sui tempora, modica valdè & nonnisi veræ reformationis initia, & scintillæ

*Autor Chron.
Wind. l. 2.
c. 36.*

L. I. c. 19.

ipsius fuisse, à nonnullis viris Religiosis putaretur.

Propterea Joannes de Huesden ce-
lebris admodum nominis ac famæ effe-
ctus, ac Martino Quinto Summo Pon-
tifici, Petro de Halliaco Cardinali Ca-
meracensi, multisque aliis Principibus
ac Magnatibus viris notus probatusque,
Congregationem suam Windefemen-
sem per universam Flandriam, Ala-
manniam & Hollandiam, faventibus ul-
trò omnibus, latè propagavit. Neque
verò idem minùs quàm suorum, Con-
gregationum etiam *Devotorum* curam
gessit, utpote qui in iis tuendis ac pro-
movendis Gerardo Magno & Florentio
successerat.

L. 1. c. 41.

*Autor Chron.
Vind. l. 2.
c. 15.*

Is igitur talis ac tanti inter suos me-
ritò nominis primis conversionis suæ
annis libellum, sive, ut appellat, Regu-
lam devotissimorum exercitiorum se-
cundùm quæ à Gerardo Magno & Flo-
rentio fuerat institutus, Teutonicâ lin-
guâ composuit; qui libellus ex hoc
tempore tum in Monasteriis Canoni-
corum Regularium Windefemensium,
tum in Congregationibus *Devotorum*
maximè fuit in usu. Illum propterea

adhuc in variis eorum Bibliothecis Belgicis extare ait Sanderus, huncque integrum ex Teutonico in Latinum vertit; & refert Buschius in fine Chronicorum *de origine modernæ devotionis*. Hujus libelli titulus sic habet: *Epistola de Vita & Imitatione Domini nostri Jesu Christi, & aliis devotis exercitiis, secundum quæ fratres & laici in Windesem se solent exercere*, incipitque, *Qui perseveraverit*; & in fine hæc subduntur: *Juxta hunc modum fratres Devotarum Congregationum se solent exercere*; & Autor Chronici Wind. in vitâ hujus Joannis de Huesden cap. II. cujus titulus est, *de devotis exercitiis fratris Joannis de Huesden, in initio Religionis, & antequàm ad ordines sacros promotus esset*: Pro compendiosa, inquit, *Vitæ & Passionis Christi Domini forma menti suæ facilius imprimenda, cuncta sua quotidiana formavit exercitia, in libello, Qui perseveraverit*; quem libellum nobis filius & fratribus suis pro devotis exercitiis acquirendis plurimum recommendans, ea nobis persuasit assumenda. Venit itaque apud nos in usum optimum, ut tam fratres quàm conversi Clerici & Laici ejus usque hodie exemplum imitantes, in dictis exercitiis

exercitiis sedulo se exerceant, non parvum devotionis fructum, & divina dulcedinis saporem exinde consequentes. Et in viciis illustrium in Windesem virorum multos refert, qui hoc exercitio ad mortem usque usi sunt.

Jam diximus libellum hunc à Trithemio *epistolam de modo proficiendi in Religione* appellari. Age ergo, jam quædam ex hac epistolâ excerpamus, & cum tribus primis de Imitatione Christi libris, de quarto postea dicturi, comparemus, ut quivis videat quàm sit illud verisimile, quod prædiximus, horum librorum autorem doctrinam suam omnem & sententias ex præceptis epistolæ hujus Joannis de Huesden, quibus diu innutritus & exercitatus fuerat, mutuatum esse.

C A P U T V L

Excerpta ex epistolâ Joannis de Huesden Superioris in Vindeſem Generalis de modo proficiendi in Religione, seu libello de Vita & Imitatione Christi.

INITIO epistolæ suæ Joannes de Huesden fratres, sive in Monasteriis, sive

in Congregationibus *Devotorum* comorantes, ad perseverantiam cohortatur his verbis. *Qui perseveraverit usque in finem, hic salvus erit. Dilecte frater, habeas præscripta verba ante cordis tui oculos, & persevera usque in finem in sancta Cruce pœnitentia, id est, in vita Religiosa & Monastica (sic enim appellabant Devoti) quam propter amorem Jesu Christi suscepisti.*

Et ecce Autor librorum de Imitatione Christi l. 3. c. 56. n. 4. iisdem se & alios verbis ad perseverantiam in vita Religiosa quam professi fuerant, cohortatur. *Domine Jesu suscepi, suscepi de manu tua Crucem : portabo, & portabo eam usque ad mortem sicut imposuisti mihi : verè vita boni Monachi Crux est, sed Dux Paradisi. Eia, fratres, propter Jesum suscepimus hanc Crucem, propter Jesum perseveremus in Cruce.*

Deinde monet Joannes de Huesden discipulum suum, ut faciliùs perseveret in vita Religiosa, intueatur exempla Sanctorum Patrum, convertat se ad Apostolos & Martyres, ad Confessores, Virgines, & ad reliquos omnes Sanctos. *Eorum inspice, inquit; multiplices*

& pergraves labores, & quàm perfectè Deo obtulerunt amicos & cognatos omnes & possessiones, temporalia bona, & mundi honores.

Et Autor librorum de Imitatione Christi l. i. c. 17. cùm suos ad perseverantiam cohortatus esset his verbis: *Non est parvum in Monasteriis, vel in Congregatione habitare, & inibi usque ad mortem fideliter observare: beatus qui ibidem benè vixit, & feliciter consummavit; statim capite sequenti: Intuere, inquit, Sanctorum Patrum vivida exempla. O quàm multas & graves tribulationes passi sunt Apostoli, Martyres, Confessores, Virgines, & reliqui omnes! omnibus divitiis, dignitatibus, honoribus, amicis & cognatis renunciabant.*

Ait ibidem Joan. de Huesden hosce Sanctos datos esse in exemplum, monerque diligenter discipulum suum vitet exemplum Religiosorum tepidorum, qui professionis, inquit, vinculo sese obligaverunt, & ad infelicem mundum corpore quidem non possunt redire, corde tamen illuc revertuntur.

Similiter Autor lib. de Imit. Chr. ibidem, *Dati sunt, inquit, Sancti Patres*

in exemplum omnibus Religiosis, & plus provocare nos debent ad benè proficiendum, quàm tepidorum numerus ad relaxandum. Religiosus tepidus habet tribulationem super tribulationem, & ex omni parte patitur angustiam, quia interiori consolatione caret, & exteriorem quærere prohibetur.

Paginâ 3. hortatur discipulum suum ut salubriter perseveret; summum ejus studium sit in Vita Domini nostri Jesu Christi exerceri. *Vita Domini nostri Jesu Christi*, inquit, *quâ nos præcessit, fons est omnium virtutum, quâ mediante ad omnes virtutes citiùs pervenitur, sine qua ad veras virtutes & ad suum amorem pervenire non valemus.* Et Autor librum suum de Imitatione Christi voluit inscribi, quem statim ab his verbis orditur; *Qui sequitur me, non ambulat in tenebris: hæc sunt verba Christi, quibus admonemur, quatenus vitam ejus & mores imitemur, si velimus veraciter illuminari, & ab omni cordis cecitate liberari: summum igitur studium nostrum sit in Vita Jesu Christi meditari.*

Addit: *Et quia exercitium & cognitio pariunt amorem; idcirco necesse est ut priùs in ea exerceatur, & qui ista negligit, quam-*

vis haberet & sciret omnem Bibliam, & Scripturam, & legem unquam positam, aut conscriptam, id minimè sufficeret. Et Autor lib. de Imitat. Chr. Qui autem, inquit, vult plenè & sapidè Christi verba intelligere, oportet ut totam vitam suam illi studeat conformare. Si scires totam Bibliam exterius, & omnium Philosophorum dicta, quid totum tibi prodesset?

Eadem paginâ promittit, si intentè in ea sese exerceat, sic futurum ut citò & sufficienter doctus evadat. *Si ad breve tempus, inquit, perseveraveris in hoc exercitio sanctissimæ Vitæ & Passionis Domini nostri Jesu Christi, ista præcepta & multò majora quàm tibi scribi poterunt, quietè & citò adjicientur. Et Autor de Imit. Chr. l. I. c. ultimo. Religiosus qui se intentè & devotè in sanctissima Vita & Passione Domini exercet, omnia utilia & necessaria sibi abundanter ibi inveniet; nec opus est ut extra Jesum aliquid melius quærat. O si Jesus Crucifixus in cor nostrum veniret, quàm citò & sufficienter docti essemus!*

Addit: *Quid dulcius, ô dilecte frater, quid securius, quid simplici columbæ salubrius, quàm in petra foramine, hoc est in Christi Jesu vulneribus delitescere, & re-*

quiescere. Et Autor lib. de Imit. Chr. l. 2. c. 1. requiesce in Passione Christi, & in sacris vulneribus ejus libenter habita: si enim ad vulnera ejus devotè confugies, magnam consolationem senties.

Monet tamen paginâ 18. dum mente & cogitatione cælestia tractabit, futurum ut turba cogitationum carnalium importunè animo occurrat. *Verum, inquit, cum ita te exercere conaberis, multa forsân mala desideria, & diversæ cogitationes tibi occurrent, & grave & laboriosum tibi videbitur in principio, sed immò non desistas: clama in cælum pro adjutorio; quare, pete, pulsa.* Et Autor lib. de Imit. Chr. qui in his sese exercens, hæc in se experiebatur, vide quo ardore consilium magistri sui secutus, clamet in cælum, quærat, petat, pulset. *O quid, inquit l. 3. c. 48. intus patior, dum mente cælestia tracto! & mox carnalium turba cogitationum occurrit oranti. Deus meus, ne elongaveris à me, neque declines in ira à servo tuo. Fulgura coruscationem, & dissipa eas; emitte sagittas tuas, & conturbentur omnes inimici; recollige sensus meos.*

Paginâ 20. *Considera, inquit, ubi sunt qui Domini & Principes terræ extiterunt;*

ubi est omnis delectatio eorum. Et Autor l. de Imit. Chr. l. 1. c. 3. *Dic mihi, inquit, ubi sunt modò omnes illi Domini, quos benè nosti, dum adhuc viverent, & studiis florere in vita sua? aliquid videbantur, & modò de illis tacetur. O quàm citò transsit gloria mundi!*

Paginâ 21. *Ad externa officia nullatenus, frater dilecte, aspires, nec aliquam praelaturam affectes.* Et Autor lib. de Imit. Chr. eodem l. 1. c. 9. *multò tutius est stare in subjectione, quàm in praelatura.*

Paginâ 22. *Libenter, cùm potest fieri, solus sis.* Et Autor l. de Imitatione Christi lib. 3. c. 53. *Pete secretum tibi; ama solus habitare tecum.*

Paginâ 23. *Nihil penitus agas sine consilio; & plus semper expertis, quàm tibi ipsi, credas.* Et Autor lib. de Imit. eodem l. 1. c. 4. *Cum sapiente in conscientioso consilium habe, & quare potius à meliori instrui, quàm tuas adinventiones sequi.*

Paginâ 25. *Humilis corde sis, & apparatu, & nimis multum non teneas de te ipso.* Et Autor lib. de Imit. eodem lib. c. 2. idem præceptum & eandem phrasim Teutonicam nihil tenere de seipso habet, cùm ait: *Hac est altissima & uti-*

lissima lectio, sui ipsius vera cognitio, & despectio, de seipso nihil tenere.

Addit Joannes de Huesden : *Multò enim aliter sæpè est quàm nos putamus de nobis ; sed cùm parùm tangunt adversitates, tunc nos & alii quales sumus, experimur. Et Autor lib. de Imit. c. 16. Quanta virtutis quisque fuerit melius patet occasione adversitatis : occasiones namque hominem fragilem non faciunt, sed qualis sit ostendunt.*

Paginâ 26. *Ama nesciri, & ab aliis contemni opta. Et Autor lib. de Imit. eodem l. c. 2. Ama nesciri, & pro nihilo reputari.*

Paginâ 27. *Istud ultimum noli negligere, quia cùm cognoveris quantum in notiâ defectuum tuorum profeceris, tantum in Dei cognitione proficies. Et Autor lib. de Imit. eodem lib. c. 3. Quanto aliquis magis sibi simplificatus fuerit, tantò plura & altiora sine labore intelliget.*

Ultimâ paginâ libellum suum Joannes de Huesden his verbis & admonitionibus concludit. *Quamvis autem, inquit, tibi, dilecte frater, regulam ad sancta quidem exercitia citiùs perveniendi signavi, noveris tamen quòd omnibus homi-*

nibus non æqualiter ista conveniunt, quia dona Sancti Spiritus secundum suam qualitatem hominibus concessa multiformia sunt: uni autem sic, alteri verò aliter. Et ecce Auctor librorum de Imitat. Chr. lib. 3. c. 47. similiter inducit magistrum sic erudentem discipulum suum: Aliis loquor communia, aliis specialia, aliquibus in signis & figuris dulciter appareo, quibusdam verò in multo lumine revelo mysteria: una vox librorum, sed non omnes aequè informat, quia intus sum doctor veritatis, scrutator cordium, distribuens singulis sicut dignum judicavero.

Pergit Voossius: Deus noster, inquit, cum magnus sit, & potens, diversis modis vult sibi serviri: unus enim in Christi vulneribus requiescit, quod est securius; alter in ineffabilibus & mirabilibus operibus ejus jubilat, & exultat. Proba autem, frater carissime, an hæc interna inspirationi tue conveniunt. Et similiter idem admonet Auctor lib. de Imitat. Chr. l. 1. c. 19. Non possunt, inquit, omnes habere unum exercitium, sed aliud isti, aliud illi magis deservit. Et lib. 2. c. 1. Si nescis speculari alta & celestia, requiesce in Passione Christi, & in sacris vulneribus ejus libenter habita.

Hinc est, inquit idem Vooffius, quòd oportet hominem strenuè cum David clamare, & ad quid vocetur considerare, dicendo: Audiam quid loquatur in me Dominus Deus. Et Autor lib. de Imitat. secutus hanc regulam, ex qua in primo & secundo libro suo penè omnia mutuatus est, tertium instituit de locutione interna, incipientem ab hac Davidis voce: Audiam quid loquatur in me Dominus Deus.

Si quis tamen, inquit Joan. de Huesden, in his defecerit, hoc Spiritus Sanctus perfectius te docebit, quàm aliquis id te posset edocere. Et Autor lib. de Imitat. sæpè idem repetit, imprimisque l. 3. c. 47. ubi inducit magistrum sic alloquentem discipulum suum: Ego sum qui doceo hominem scientiam, & clariorem intelligentiam parvulis tribuo, quàm ab homine possit edoceri. Et infrà: Ego sum qui humilem in puncto elevo mentem, ut plures æternæ veritatis capiat rationes, quàm si quis decem annis studuisset in scholis.

Denique idem Joannes de Huesden, finitâ hac suâ de modo proficiendi in Religione Regulâ, additamenti loco hæc duo discipulo suo diligenter præcipit.

Primum est. *Præter hæc, inquit, præcepta, frater carissime, à me tibi hætenus tradita, interdum semper memineris, ex Divinis & Ecclesiasticis Officiis aliquid, aut Hymnum videlicet, aut Antiphonam, aut Orationem animo revolvere, quoniam hæc omnia cor hominis mirabiliter illuminant, vanasque & noxias cogitationes sæpè multum interturbantes sensim amoveant & expellunt.* Atqui hoc exercitium Autori librorum de Imitatione Christi familiare admodum fuisse evidenter patet; passim enim ex Ecclesiasticis Officiis in suum opus multa transfert: nam ut ex pluribus pauca quædam proferam, sic l. 4. c. 13. n. 2. Antiphonam quæ ad Magnificat in Officio Sacratissimi Corporis Christi præcinitur, integram habet. *O quàm suavis est, Domine, Spiritus tuus, qui ut dulcedinem tuam in filios demonstrares, pane suavissimo de calo descendente illos reficere dignaris!* Sic eodem lib. 13. habet hunc Versum ex Officio Sabbati Sancti. *O mira circa nos pietatis tue dignatio!* Sic porro l. 3. c. 55. n. 6. hanc orationem habet: *Tua me, Domine, gratia semper præveniat & sequatur, ac bonis operibus jugiter præstet esse intentum. Per Jesum*

Christum Filium tuum amen. Quâ oratione utitur Ecclesia in Dominica 16. post Pentecosten.

Alterum, quod diligenter discipulo suo præcipiebat Joannes de Huesden, sic habet. *Prandio, inquit, facto, cum tibi vacaverit, alia assumes exercitia tibi timorem incutientia. Meditare de omnibus Dei beneficiis, de extremo judicio, de morte, de pœnis inferni, de Passione Domini, de peccatis, de regno cælorum.* Atqui Auctor lib. de Imitatione Christi idem omnino etiam præcipit. Nam lib. 1. c. 20. *Quære, inquit, aptum tempus vacandi tibi, & de beneficiis Dei frequenter cogita; tales perlege materias, quæ compunctionem præstant.* Tum in sequentibus capitulis agit de morte, de judicio extremo, de pœnis inferni, de Passione Domini, de peccatis, & de regno cælorum.

Quibus omnibus tam fusè lateque à nobis explicatis, factâ scilicet necessitate, ut verbis Augustini dicam, copiosius dicendi res tam claras, velut eas non spectantibus, intuentes, sed quadammodo tangendas palpatibus & conniventibus offeramus. Si adhuc adversariorum aliquis librorum de Imitatione Christi Autorem dis-

cupulum unum aliquem Joan. de Huesden Canonorum Regularium Vinde-
femensium Superioris Generalis extitisse,
& ab ejus epistolâ doctrinam suam
omnem & sententias mutuatum esse ne-
get, dabit veniam si ipsum ego in eo-
rum habeam numero, quos loco cita-
to describit Augustinus; *Qui nempe irra-
tionabiles motus suos etiam post rationem
plenè redditam quanta homini ab homine
debetur sive nimîâ cecitate, qua nec aper-
ta cernuntur, sive obstinatissimâ pervicaciâ,
qua & ea quæ cernuntur non feruntur tan-
quam ipsam rationem veritatemque defen-
dunt.*

Neque enim jam inficiari potest ho-
rum alterum ab altero opus suum ex
maximâ parte mutuatum esse: non enim
aliud nos opinari tanta in utroque præ-
ceptorum, doctrinæ ac sententiarum si-
militudo ac consensus patitur.

Neque etiam potest contendere non
autorem librorum de Imitatione Chr.
à Joanne de Huesden, sed contrâ po-
tiùs Joannem de Huesden ab autore li-
brorum de Imitatione Christi Epistolæ
sux de modo proficiendi in Religione
præcepta sumpsisse.


Primò quidem, quoniam nemini prorsus è primis *Devotis*, & tempore quo Epistolam hanc suam scripsit Joannes de Huesden, id est anno circiter 1390 liber de Imitatione Christi cognitus fuit, quod sic facilè demonstratur: nam apud Thomam Kempensem in vita Gerardi Magni primi *Devotarum* Congregationum cum Florentio autoris, ipse Gerardus longum admodum librorum piorum sibi familiarium catalogum texit, & nusquam librorum de Imitatione Christi meminit. Similiter Thomas in vitâ Florentii & aliorum primorum *Devotorum*, refert qui libri essent ipsis in usu; & ipse Florentius in Epistolis suis, quæ passim apud Buschium leguntur, multos libros pios enumerat, & nullibi librorum de Imitat. Christi mentionem facit. Denique Buschius, qui tot annos in Vindeſem unâ cum Joanne de Huesden, cui imprimis carus erat, vixit, & hortatu ejus *de origine moderna devotionis, & de viris in Vindeſem illustribus*, duos libros edidit, in quibus tam copiosè vitam ipsius Joannis de Huesden descripsit. Qui porrò Regulam hanc ejus qua de agimus, ex Teutonico in Latinum

vertit, refert quidem quinam libri initio conversionis suæ, quo tempore Regulam hanc suam scripsit, illi familiares fuerint, sed nusquam tunc librorum de Imitatione Christi meminit: quod certè nunquam tacuisset, si ex his libris Regulam suam mutuatus esset Joannes de Huesden. Unde hoc? nisi quia nondum extabant; nam nonnisi viginti circiter post hanc Regulam annis editi sunt.

2^o. Quoniam Regula hæc Joannis de Huesden de modo proficiendi in Religione, in Congregationibus *Devotorum*, & in Monasteriis Vindefemensibus erat, uti jam suprà diximus, maximè in usu. Unde autor Chron. Vindef. in fine hujus Regulæ ait: *Juxta hunc modum Fratres Devotarum Congregationum & Fratres in Vindefem se solent exercere.* Autor autem librorum de Imitatione Christi in singulis suis libris vixisse se & commoratum fuisse in his *Devotorum* Congregationibus & Monasteriis apertissimè testatur, cum ait l. i. c. 18. n. 6. *Utinam in te non dormiret profectus virtutum, qui multa sapius vidisti exempla Devotorum.* Et l. 3. c. 52. n. 4. *In veritate confiteor, Domine, quod non decet me inter Devotos tuos com-*

morari. Et l. 4. c. 14. Quando recorder, inquit, Devotorum aliquorum, tunc sapius in meipso confundor & erubesco. Unde certa res est ipsum ex Regulâ Joannis de Huesden, in quo diu & multum, dum in his Congregationibus & Monasteriis commoraretur, versatus & exercitatus fuerat, trium primorum librorum suorum doctrinam omnem & præcepta desumpsisse.

3°. Denique, quoniam non solum præcepta Regulæ Joannis de Huesden in suum opus autor librorum de Imitatione Christi derivat, sed, quod rem planè conficit, facta etiam ejus & aliorum quorundam *Devotorum* tum in Vindefem, tum in monte Sanctæ Agnetis Joanni de Huesden coævorum imitanda, in lib. 4. sibi passim proponit, & eorum exemplo pietatem suam acuit & accendit, quod capite sequenti demonstramus.



CAPUT VII.

Quartum de Imitatione Christi librum ex ejusdem Joannis de Huesden & aliorum Devotorum exemplis & dictis sumptum esse.

TANTA erat nominis Joannis de Huesden, & aliorum *Devotorum*, sive in Monasteriis, sive in Congregationibus commorantium fama, tanta virtutis eorum opinio, ut quemadmodum libellus Joannis de Huesden vitæ religiosè instituendæ Regula habebatur, ita ipsius & aliorum primorum *Devotorum* vita, morum, & pietatis exemplar perfectum existimaretur: *In ea enim*, ut ait Buschius, per plures annos horum quæ scribit testis oculatus, *vera virtus, vera vita sanctitas elucebat.*

Hinc Autor operis de Imitatione Christi quemadmodum tres primos suos libros ex Joannis de Huesden epistolâ de modo proficiendi in Religione mutuatus est, ita & 4. de Sacramento Altaris ac sacrâ Communionem scripturus, non aliud sibi & aliis exemplar perfe-

ctius proponi posse existimavit, quàm si quæ fuissent Joannis de Huesden & aliorum quorundam è primis *Devotis* ad sacram Communionem dispositiones, qui ardentes affectus, quis usus eorum, quæ denique gratiarum actiones referret, ut iis exemplis se & alios ad pietatem & fervorem erga augustissimum hoc Sacramentum incitaret.

Quæ res ut omnibus palàm fiat, ecce de primorum illorum *Devotorum* ardentibus ad Corpus Christi desideriis & affectibus, sensibili cordis amore & fletu, mentalibus excessibus, supernaturalibus illuminationibus, ac cælicis visionibus, quædam autor Chronici Vindefemensis & Thomas in vitis primorum *Devotorum* narrant, quæ cùm autor librorum de Imitatione Christi in quarto suo libro, qui de Sacramento Altaris est, pariter referat, hæc passim laudet, extollat, prædicet, & horum recordatione affectus suos ad sacram Corporis Christi participationem accendat, profectò nonnisi horum *Devotorum* tempore vixisse se, & ab illis doctrinam suam omnem mutuatum esse apertè declarat.

Audi itaque illum lib. 4. c. 14. cujus titulus est, *de quorundam Devotorum ad Corpus Christi ardenti desiderio*. O quam magna, inquit, multitudo dulcedinis tue, Domine, quam abscondisti timentibus te! Quando recordor Devotorum aliquorum ad Sacramentum tuum, Domine, cum maxima devotione & affectu accedentium, tunc sæpius in meipso confundor & erubesco. Quod non ita vehementer sum attractus, & affectus, sicut multi Devoti fuerunt, qui præ nimio desiderio Communionis & sensibili cordis amore à fletu se non poterant continere; sed ore cordis & corporis pariter ad te Deum fontem vivum medullitus inhiabant, suam esuriem non valentes aliter temperare & satiare, nisi corpus tuum cum omni jucunditate & spiritali aviditate accepissent. Et n. 3. Licet tanto desiderio tam specialium Devotorum tuorum non ardeo, tamen de gratiâ tuâ illius magni inflammati desiderii desiderium habeo. Et c. 17. n. 3. Omnium, inquit, Devotorum jubilationes, ardentes affectus, mentales excessus, & supernaturales illuminationes ac cælicas visiones tibi offero & exhibeo. Et c. 9. n. 5. Offero tibi omnia pia desideria Devotorum.

Vis tu, Lector, jam rescire quorum-

nam *Devotorum* fuerint pia illa & ardentia ad Corpus Christi desideria, quorum illi mentales excessus, quorum lachrimæ & fletus, quorum supernaturales illuminationes ac cælicæ visiones, quinam denique *Devoti* ad Sacramentum Altaris ita medullitus inhiabant, ut suam esuriem aliter temperare non valerent, nisi Corpus Christi cum omni jucunditate & aviditate accepissent, audi quid de primitivis *Devotis*, Florentio inquam, Joanne de Huesden, Willelmo Vorneken, Arnoldo Kalker, Petro de Gouda, Henrico Mandé, & Gerlaco Petri, in vitis eorum Thomas, qui cum illis omnibus diu familiarissimè vixit, & autor Chronici Vindeſemenſis referant.

De *Devoti* itaque Patris Florentii, qui à Gerardo Magno circa annum 1380. conversus, pater fuit omnium *Devotorum*, ardentibus ad Corpus Christi affectibus hæc refert Thomas in ejus vita c. 3. *Devotus Pater Florentius, dum divina Mysteria celebraret, Christus cor ejus & animam spiritualis lætitiæ vino potissimum replevit, ut omnia interiora ejus divini amoris incendio ferverent, atque in voce*

exultationis cum Propheta jubilaret, dicens: Cor meum & caro mea exultaverunt in Deum vivum. Tunc enim intra se totus collectus, & supra se in spiritu raptus, semetipsum Hostiam viventem ac Deo placentem obtulit: in quo sacro Convivio deificam in suo fonte dulcedinem gustans, & præ magnitudine divinæ largitatis amorosè liquefactus, cum magnâ gratiarum actione hæc mystica verba ruminabat: O quàm magna multitudo dulcedinis tuæ, Domine, quam abscondisti timentibus te!

Et de Devoto Joanne de Huesden, qui anno etiam circiter 1380. à Gerardo Magno conversus, in domo Florentii plures annos egit, à quo postea in Windesem ductus, sacris Canonico-
rum initiatus est, & per 33. Superior Generalis ibidem fuit, hæc autor Chron. Vind. l. 2. cap. 12. refert. Devotus, inquit, frater Joannes de Huesden jussus est ad altiora conscendere, & ad sacros Ordines promoveri. Sed, ô Deus, quot suspiria, singultus & lamenta tam humilis & verecundi fratris! Factus Presbyter, frater Devotus, omnem animæ suæ profectum in hoc sciens consistere, si rem tantam, prout est in veritate, dignè ponderaret, & se-

ipsum sanctum & immaculatum ab hoc seculo de cetero conservaret, ne os suum & lingua, quibus Deum in hoc vivifico sancti Altaris Sacramento frequenter esset suscepturus, quicquam loqueretur, in quo Deo displiceret; ne digiti illi & manus quibus Verbum Dei incarnatum quotidie contrectaret, facerent omne malum etiam levissimum, quo oculos amantissimi Patris utcumque posset offendere. Ne cor suum, in quo Deus de cælo descendens, ut sponsus in thalamo deberet requiescere, aliquâ malâ actione, pravâ delectatione, immundâve affectione aliquando commacularetur, sed ut Templum Dei vivi verissimum mundissimè custodiendo, Sacramenta Christi veneranda reverendissimè frequentando, in Dei amorem & cognitionem continuè proficeret. Abstractus igitur à mundo in intima sua solus intravit, ibique Christo Domino cœnaculum grande construxit, habitans secum in latitudine celi & cordis sui solitus deambulare, mentemque à terrenis suspensam Deo & Sanctis ejus in cælo quotidie presentem exhibebat, claritate aspectus interioris, & dulcedine affectus divini super omnes hujus mundi delicias vatede delectatus: vidit enim quid sibi esset Deus, quàm bonus & suavis sit animæ quæ-

venti eum prægustavit; & quod in patria Sanctis promittitur, à longè conspiciens, in via salutavit.

Et de *Devoto* Wilhelmo Vorneken, qui Thomæ nostri per annos 17. Superior in Monasterio Montis Sanctæ Agnetis fuit, & postea Superior Generalis in Vindeſem electus. est, hæc idem autor l. 2. cap. 49. refert : *Pater iste Devotus, circa Eucharistiæ venerabile Sacramentum, valdè fuit timoratus. Et l. 1. c. 33. Devotus Pater Wilhelmus Worneken omni modo, & admodum reverenter & devotè afficiebatur ad venerabile Sacramentum, maximè quando celebrabat.*

Et de *Devoto* Arnoldo Kalker, hæc idem autor l. 2. c. 23. habet. *Hic Devotus Pater frequenter sic afficiebatur, ut futura vitæ gaudia præ dulcedine Dei & decore domus ejus, quem dilexit in hac valle miseria, sapiùs prægustare, eumque devotissimè à longè salutare cerneretur; ita ut ejus desiderio fruibilique præſentiâ, & longa dilationis ejus expectatatione inter Missarum solemnias, multarum lacrimarum gratiâ eum sæpè perfusum videremus.*

Et de *Devoto* Petro de Gouda, quàm semper ardentes fuerint ejus ad Corpus

Christi affectus, quæ supernaturales illuminationes ejus, colligimus ex eo quod c. 42. refertur. Cùm enim aliquando à Wilhelmo Vorneken increparetur, quòd non interdum à tantis Christi misteriis abstineret, respondit: *Pater mi, ego quidem in nullâ re mundi amplius condelector in hac mortali vitâ, nisi in Deo solo, vivo, vero, eterno, & in hac sanctissimi Corporis & Sanguinis ejus communicatione.* Addit autor Chronici Windesl. *Cujus vita virtuosa cum verbis prædictis concordabat, qui secretum suum sibi in cellâ continuè scribendo, & apertis cæcis cordis sui oculis, Dei præsentiam sentiendo, inter Angelos in cellâ suâ secum præsentem, aut eos in calo contemplando, quotidie conversabatur: tamen pro merito obedientie à tantis suis delitiis aliquando postea se subtraxit affectu & desiderio; conatus perficere, Missam audiendo, quod libenter egisset divina celebrando.*

Et de Henrico Mandé, ac de ardentibus ejus ad Corpus Christi desideriis & cælicis visionibus, hæc referuntur: *Sapè, inquit, spiritu raptus gloriam Filii Dei & Sanctorum ejus aspexit in calo, crebrâque revelatione celestia contemplatus,*

gloriam cali & inhabitantium in eo descripsit. Magna enim fuit devotionis & extatica contemplationis, ut nunquam à lacrimis Missam audiendo se contineret. Flebat autem uberrimè, Dei liquefactus amore, & offensionis suæ timore, præsertim cum ad Eucharistiæ venerabile Sacramentum erat accessurus, tum totus in lacrimas videbatur resolutus, ut chori pavementum & corporis indumenta lacrimis inundaret.

Denique de Devoto Gerlaco Petri, & de ardentibus etiam ejus ad Corpus Christi affectibus ac mentalibus excessibus hæc referuntur. Inter Missarum solemnia, inquit, Officiaque divina, sancta illa gaudebat anima de sponsi sui præsentia; fervebat desiderio, ardebat amore, flagrabat affectu, & per mentales excessus etiam corpus suum videbatur sustollere. Gaudens gaudebat in Domino, capere se non valens, præ gaudio de divina bonitatis influentiâ, quâ Spiritus abundavit, dicens cum Psalmistâ: Concaluit cor meum intra me. Item: Cor meum & caro mea exultaverunt in Deum vivum. O quàm magna multitudo dulcedinis tuæ, Domine, quam abscondisti timentibus te!

Confer jam, Lector, cum iis omnibus ea quæ suprâ ex libro 4. operis

de Imitatione Christi retulimus, nempe ex c. 14. *cujus titulus est, De quorundam Devotorum ardenti desiderio ad Corpus Christi, & cujus initium est, O quàm magna multitudo dulcedinis tuæ, Domine, quam abscondisti timentibus te! Quando recordor Devotorum aliquorum ad Sacramentum tuum Domine cum maxima devotione & affectu accedentium, tum sæpius in meipso confundor.* Confer quod n. 3. ait. *Licet tanto desiderio tam specialium Devotorum tuorum non ardeo, tamen de gratiâ tuâ illius magni desiderii desiderium habeo.* Confer denique quod ait c. 17. *Omnium Devotorum jubilationes, ardentes affectus, mentales excessus, ac supernaturales illuminationes, ac calicas visiones tibi offero, & exhibeo, facilè profectò deprehendes autorem hunc ad Devotorum, quos suprà appellavimus, ardentes ad sacram Communionem affectus & mentales excessus alludere.*

Neque verò tantùm *Devotorum* exempla imitanda sibi proponit, sed & consilia ac præcepta eorum circa dispositiones ad hoc Sacramentum necessarias, & circa usum ejus sacræ Communionis planè sequitur.

Nam dispositiones ad sacram Communionem & Sacerdotium quod spectat, jam suprà diximus has Joannem de Huesden præcipuè à se & suis voluisse, ut scilicet quilibet *Devotus* factus Presbyter, rem tantam, prout est, in veritate ponderaret, ut seipsum sanctum ab hoc sæculo & immaculatum de utero conservaret, ne os suum & lingua, quibus Deum in hoc vivifico altaris Sacramento frequenter esset suscepturus, quicquam loqueretur, in quo Deo displiceret, ne digiti illi & manus, quibus Verbum Dei incarnatum quotidie contrectaret, facerent omne malum etiam levissimum, quo oculos amantissimi Patris utcumque posset offendere, ne cor suum, in quo Deus de cælo descendens, ut sponsus in thalamo deberet requiescere, aliquâ malâ affectione commacularetur.

Et autor libri de Sacramento Altaris c. 11. n. 6. easdem dispositiones iisdem verbis requirit. *O quàm Magnum, inquit, & honorabile est officium Sacerdotum! O quàm mundæ debent esse manus illæ, quàm purum os, quàm sanctum corpus, quàm immaculatum cor erit Sacerdotis, ad quem to-*

ties ingreditur autor puritatis. Ex ore Sacerdotis, nil nisi sanctum & utile procedere debet verbum, qui tam sæpè accipit Christi Sacramentum. Oculi ejus simplices & pudici, qui Christi Corpus solent intueri; manus ejus pure, quæ Creatorem cali & terra solent contrèctare.

Addebat Gerlacus Petri ideò semper novâ mentis renovatione ad hæc Sacramenta debere quemlibet *Devotum* sese disponere, proptereà quòd attentè considerandum esset charitatem Christi nunquam minui, sed quali affectu & charitate Dominus noster *Jesus Christus* incarnari propter nos voluit, quali incomprehensibili affectu seipsam obtulit eterno Patri, in Cruce pro nobis *Hostiam sanctam & immaculatam*, tali affectu & non minori offerret quotidie seipsam pro nobis, præcipuè in Altari, & quamvis prædicta semel exhibita sunt ad extra; tamen quotidie ita recenter fiunt, sicut quando ad extra ostendebantur, & tali nihilominus affectu à nobis quotidie suscipi deberent, ac si jam in instanti fierent, quæ Dominus noster *Jesus* ad salutem nostram tempore suo exhibere dignatus est.

Et ecce etiam autorem nostrum eandem iisdem penè verbis consideratio-

nem addentem c. 2. n. 6. *Charitas*, inquit, *Christi* nunquam minuitur, & magnitudo propitiationis ejus nunquam exauritur: ideo semper novâ mentis renovatione ad hæc te disponere debes, & magnum salutis misterium attentâ consideratione pensare, ita magnum, novum, & jucundum tibi videri debet cùm celebras, aut Missam audis, ut si eodem die *Christus* primùm in uterum *Virginis* descendens, homo factus esset, aut in *Cruce* pendens pro salute hominum pateretur & moreretur.

Usum sacræ Communionis & celebrationis quod spectat, tria *Devoti* imprimis observabant. 1º. ut frequens esset, unde licèt tunc temporis mos is esset in omnibus penè Religiosorum domibus, ut qui Sacerdotes non erant; singulis dumtaxat quindecim diebus sacro *Christi Domini Corpori* participarent, ita tamen ut propter festa solemniora Communio anticipari, vel differri posset: qui verò Sacerdotes erant, singulis diebus non celebrarent. Tamen *Joannes de Huesden*, ut frequentius *Devoti*, nisi legitimè præpediti essent, sacro *Christi Corpori* participarent, præcipiebat, propterea quòd hoc utile ad-

modum esset, & multa bona devotè communicantibus præstarentur. *Vellem*, inquit in libello suo, *si esset possibile, ut post hujusmodi exercitia, cum Superiorum tuorum consensu semper ad octo dies communicares, quia sic mirabilem gratiam, & specialem acciperes fortitudinem contra omnes inimici tentationes, & ego sperarem id Deo valdè acceptum.* Unde & frequentis Communionis uti & multorum aliorum sanctissimorum exercitiorum *Devoti* non immeritò autores habiti sunt.

Et ecce similiter autor lib. de Sacramento Altaris multis capitibus idem præcipit, & docet c. 3. cujus titulus, *Quòd utile sit sæpiùs communicare.* Cap. 14. *Quòd multa bona præstantur devotè communicantibus.* Cap. 10. *Frequenter*, inquit, *recurrendum est ad fontem gratiæ & divinæ misericordiæ, quatenus contra universas tentationes & fallacias diaboli fortior atque vigilantior effici merearis.*

2º. Interdum tamen à sacrâ Communionem & Missarum celebratione abstinendum esse volebant, reverentiæ causâ: unde Buschius de Joanne de Huësdén c. 14. hæc refert. *Licet ita sæpè aliquando celebraret, ut hinc mirarentur sui,*

quòd sapiùs reverentiæ causâ non abstinere-
ret, per humilem tamen aliquando vel se-
mel in hebdomadâ ab hujusmodi mysteriis
divinis subtractionem quasi mente renova-
tus vehementiori desiderio ad eorum celebra-
tionem peragendam ardentius iterùm in-
flammabatur. Et de Wilhelmo Vorneken
Thomæ nostri per 17. annos Superiore,
hæc idem autor refert. *Licet omnium re-* L. 1. c. 49.
ligiosorum exercitiorum finem esse sapiùs
diceret, gustare & videre in Sacramento
Altaris quàm suavis est Dominus, tamen ipse
nunquam continuè celebrare præsumpsit, nec
fratres suos in hoc esse quotidianos unquam
sibi complacuit, quin & eos propterea nota-
bat. Unde, ut suprâ vidimus, increpa-
vit Petrum de Gouda, quòd interdum
à celebratione non abstineret, qui, in-
quit Buschius, pro merito obedientiæ à
tantis delitiis suis aliquando postea se sub-
straxit.

Et ecce autor lib. de Sacram. Altaris
capite citato, istud etiam approbat:
Quàm felix ille esset, & Deo acceptus, qui
sic vivit, & in tali puritate conscientiam cu-
stodit, ut etiam omni die communicare para-
tus sit, & benè affectatus esset, si ei liceret,
& sine notâ agere posset: si quis tamen inter-

dùm abstinet, humilitatis gratiâ, aut legitimâ impediēte causâ, laudandus est de reverentiâ.

3°. Denique hoc *Devotus* quilibet à Gerardo Magno consilium acceperat, ut si legitimè præpeditus sacramentaliter Corpus Christi non sumeret, saltem spiritualiter passionem ejus devotè animo revolvens, quotidie manducaret. Unde & de Petro de Gouda additur: *Affectu & desiderio conabatur perficere Missam audiendo quod libenter egisset divina celebrando.*

Et ecce autorem lib. de Imit. Chr. illud idem capite citato consulentem. *Cùm verò, inquit, legitimè præpeditus est Devotus, habebit semper bonam intentionem communicandi, & sic non carebit fructu Sacramenti. Potest enim quilibet Devotus omni die ad spiritualem Christi Communionem & sine prohibitione accedere, & tamen certis diebus, & statuto tempore Corpus sui Redemptoris cum affectuosâ reverentiâ sacramentaliter debet suscipere: nam toties mysticè communicat, quoties Incarnationis Christi misterium Passionemque devotè recolit, & in amore ejus accenditur.*

Atque jam ex his omnibus habes,
Lector,

Lector, quod initio diximus, 4. de Imitatione Christi librum uti & tres priores ex exemplis & dictis *Devotorum* sumptum esse. Habes autorem illorum librorum fuisse haud dubiè Canonicum aliquem Regularem Capituli Vindefemensis, cùm de seipso jam habitum religionis induto disertè dicat, quod nunquam satis ad rem nostram inculcari potest, *Non sum dignus inter Devotos commorari l. 3. c. 42.* quod unis & solis Canonicis Vindefemensibus convenire suprà ostendimus; immò habes Canonicum hunc Regularem haud dubiè non alium esse à Thoma Kempensi, qui cum omnibus *Devotis* suprà enumeratis, sive in domo Florentii, sive in Vindefem, sive in monte Sanctæ Agnetis, diu quàm familiarissimè vixit, ut ipse de seipso narrat in vita Joannis Gronde c. 1. Cùm igitur, inquit, *studii causâ in annis adolescentiæ Daventriam pervenissem, quæsi vi iter pergendi ad Regulares in Vindefem, ibique inventis fratribus Canonicis Regularibus cum Germano meo, hortatu illius inductus sum adire summa reverentiæ virum magistrum Florentium. Adjunctus tam devoto viro & Devotis ejus*

fratribus, quotidie devotam eorum conversationem attendi nunquam prius tales homines vidi tam devotos. Quæ omnino sanè conveniunt cum his verbis auctoris de Imit. Chr. l. 1. Utinam in te non dormiret profectus virtutum, qui multa sæpè vidisti exempla Devotorum. Et l. 4. Quando recordor Devotorum, tunc in me erubesco. Sed hoc posterius, nempe Canonicum hunc Regularem non alium esse à Thoma Kempensi, ex omnibus vitæ Thomæ ipsius circumstantiis (simul utique non seorsim & separatim sumptis) collatisque cum circumstantiis vitæ auctoris lib. de Imit. Christi, quantum ex ipso ejus opere erui possunt, in sequenti ultimo capite fusiùs ostendimus.

CAPUT ULTIMUM.

Vitam, mores, ingenium, eruditionem, stilum, & aetatem auctoris librorum de Imitatione Christi, à Thoma Kempensi perfectissimè referri.

REM in præsentia demonstratu quidem facillimam aggredimur: sed quâ tamen momentum & pondus argu-

mentorū hactenus à nobis pro causa Kempensi congestorū vehementer au-
gescit, nisi si potiùs hac cumulatissimè
tandem compleatur. Autorem itaque
librorum de Imitatione Christi à Tho-
ma de Kempis, vitâ, moribus, inge-
nio, stilo, notis denique suis omnibus
& indiciis perfectissimè referri conten-
dimus; & verò sic palàm & in oculis
omniū, ut appareat, efficimus.

Nam vitam quod spectat Thomæ, sic
vita erat. Oriundus anno 1380. Kempis,
quod permodicum est in agro & Dice-
cesi Colonienſi oppidum, unde ei co-
gnomen posthac adhæsit. Parentes ha-
buit, si sæculum spectes, nullo quidem
generis splendore, nullâ divitiarum opu-
lentiâ conspicuos, sed pauperes, humi-
les, atque huic mundo despectos. Exactâ
sub parentum oculis ætate primâ, Da-
ventriam Belgarum tunc temporis Athe-
næum, studiorum causâ venit; & ibi
per septennium inter *Devotos* commo-
ratus, demùm à Florentio ad montis
Sanctæ Agnetis propè Zwollis Canoni-
corum Regularium Monasterium mis-
sus est, ut ipse Thomas narrat in Chro-
nico suo: *Anno, inquit, 1399. veni letus*

*Comparatur
vita Thomæ
Kempensis
cum vita Au-
toris librorum
de Imitatione
Christi.*

ad montem Sanctæ Agnetis, fecique instantiam pro mansione in eodem loco, & fui misericorditer acceptatus.

P. 1. c. 4.

Atqui eadem omnia de seipso innuit Auctor librorum de Imitatione Christi, ac primò Flandriâ se oriundum tot Flandricis vocibus ac phrasibus, quas passim usurpat, palàm, ut suprà vidimus, indicat. 2°. Parentibus ortum se pauperibus prædicat. Lib. 3. c. 22. cùm de seipso loquens, *Domine Deus*, inquit, *pro magno reputo beneficio non multa habere, unde exteriùs & secundùm homines laus & gloria apparet, quia tu Deus pauperes & humiles, atque huic mundo despectos tibi elegisti in familiares & domesticos.* 3°. Inter Devotos habitasse se declarat, cùm lib. 1. c. 18. *Utinam in te non dormiret profectus virtutum, qui multa sæpiùs vidisti exempla Devotorum.* Tum 1. 3. c. 52. n. 4. cùm ait: *In veritate confiteor, quòd non decet me inter Devotos commorari.* Denique de ingressu suo in Monasterium ac vitæ religiosæ professione eodem penè modo atque Thomas loquitur 1. 3. c. 10. *Quid retribuam, inquit, tibi, Domine, pro gratiâ istâ? Magnum mihi & mirandum apparet, quòd tam pauperem*

*& indignum dignaris in servum recipere,
& dilectis servis tuis adunare.*

Sic mores erant Thomæ. *In principio* Comparantur
mores utriusque.
conversionis suæ sustinuit, inquit Continua-
tor Chron. Montis Sanctæ Agnetis, *ab*
exordio Monasterii magnam penuriam, ten-
tationes & labores: fuit etiam multum amo-
rosus in vitâ & passione Domini, & mi-
rè consolativus tribulatis & afflictis. Cellæ
tanquam dilectæ sibi amicæ, lectionis
sacrorum Codicum velut unici solatii
sui, sine quibus erat illi vita admodum
intolerabilis; denique Christi Jesu tam
ardenter, & ut ita dicam familiariter
amans erat, ut hoc ejus esset simbo-
lum: *In omnibus requiem quæsi, & nus-*
quam inveni nisi in angello, & cum li-
bello, vel ut alii referunt, nisi in Cellâ,
Codice, Christo, hoc sæpius ore profe-
rebat, hoc libris suis inscribebat, nar-
ratque Franciscus Tolensis vidisse se
Zwollis in tabulâ aliquâ effigiem ejus
admodum antiquam cum hoc simbolo
depictam.

Atqui sic omnino etiam mores suos
fuisse autor librorum de Imitatione
Christi passim testatur. Ac primò labores
& tentationes quod attinet, lib. 3. c. 5.

Pauper sum, inquit, & in laboribus à juventute meâ, & contristatur anima mea nonnunquam usque ad lacrimas, quandoque etiam conturbatur ad se propter imminentes passionēs. Et n. 5. Gratias tibi ago, Domine, quia non pepercisti malis meis, sed attrivisti me verberibus multis amarīs, infligens dolores, & immittens angustias foris & intus. Et lib. 4. c. 4. n. 5. Ego laboro in sudore vultus mei, tentationibus inquietor, & multis malis passionibus implicor. Quantum verò Vitæ & Passionis Christi Domini studiosus fuerit, patet ex his ejus verbis l. 3. c. 56. n. 3. Exerceatur, inquit, servus tuus in vitâ tuâ, quia ibi est salus mea & sanctitas vera; quidquid extra eam lego, vel audio, non me recreat, vel delectat plenè. 3°. Quantum tentatis & afflictis consolandis valeret, cum ex multis liquet, tum ex eo quod ait de seipso loquens lib. eodem cap. sequenti: Benè etiam consulis, & alios nosti roborare verbis. 4°. Quantum amans esset cellæ suæ in principio conversionis, liquet ex l. 1. c. 20. cujus hic est titulus, De amore solitudinis & silentii: Si in principio, inquit, conversionis tuæ benè cellam incolueris, & custodieris, crit tibi postea

dilecta amica. 5°. Sacrorum Codicum quàm studiosus esset, cùm ex multis constat, tum ex lib. 4. c. 11. cùm ait: *Habeo etiam libros sanctos pro solatio & vitæ speculo, sine quibus mihi insupportabilis foret ista miserabilis vita.* Denique quàm familiariter amans esset Jesu, patet ex l. 2. c. 8. cui titulus est, *de familiari amicitia Jesu.* Et l. 3. c. 21. &c.

Sic Thomæ erat ingenium, ut Trithemius, Franciscus Tolensis, & Rosveidus referunt in ejus vita, *prestans nempe*, ita tamen ut ejus sermo omnis de Deo esset & sacrâ scripturâ, ac coram divitibus ac magnatibus viris, cùm præsens aderat, si forensia, aut mundana agitarentur, continuò, inquiunt, Thomas velut mutus ac elinguis sedebat, nec respondebat, ne rogatus quidem, nisi insigni alicujus rei commoditate illectus, quasi ignarus rerum omnium de quibus commentabantur. Porro si de Deo rebusque cælestibus haberetur sermo, mox postulatus sententiam, velut limpidissimus fons perpetuis verborum rivulis scaturiens loquebatur, aut potius profluebat; eâ enim dicendi facultate facilitateque pollebat, ut com-

Comparatur Thomæ ingenium cum ingenio Autoris librorum de Imitatione Christi.

plures sæpenumero ex urbibus locisque remotioribus fama ejus exciret, & certatim ad montem Sanctæ Agnetis confluerent, quos cum audiendi cupido incesſerat.

Atqui istum hunc ipsissimum fuisse ingenii sui characterem autor librorum de Imitatione Christi palàm profitetur, cùm initio operis sui lib. 1. cap. 9. ait: *Cum divitibus noli blandiri, & coram magnatibus non libenter appareas; cum humilibus & simplicibus, cum devotis & morigeratis sociare, & que edificationis sunt pertracta;* quod & capite sequenti repetit: *Caveas*, inquit, *tumultum hominum, quantum potes; multum enim impedit tractatus secularium gestorum: citò enim inquinamur vanitate, & captivamur; si loqui licet & expedit, que edificabilia sunt, loquere.* Quantâ verò, quàm promptâ simul ac sanâ eloquentiâ ac dicendi facilitate autor ille profluat, in explicandis ac persuadendis rebus divinis, nemo, opinor, à me expectat ut ostendam. An non enim certatim ad hoc opus legendum boni omnes concurrunt, quemadmodum olim omnes undequaque audiendi Thomæ gratiâ ad montem San-

etæ Agnetis confluebant? An non libros ejus, uti de Paulini epistolis, dicebat olim Augustinus : *Quotquot legunt, rapiunt, quia rapiuntur, cum legunt? quid enim amoris sanctissimi spirant? quantam opulentiam sinceri cordis exastuant? quas agunt gratias Deo? quas impetrant à Deo? Blandiores sunt, an ardentiores? luminosiores, an fecundiores?*

Sic erant Thomæ studia primis vitæ suæ annis, ut Trithemius, Franciscus Tolensis, & Rosveidus referunt. Erat Scripturarum Divinarum imprimis studiosus, & in his admodum eruditus; in operibus etiam divi Bernardi egregiè versatus erat: amabat insuper Divinorum & Ecclesiasticorum Officiorum libros; unde & supersunt, inquit, etiamnum universa Biblia in quatuor tomos dispartita, ingens præterea liber Missarum & Sancti Bernardi Opuscula præcellenti arte & industriâ manu Thomæ descripta. Denique in libello seu Regulâ Joannis Voossii de Huesden, multum & sæpè versatus erat, in eâ enim tum toto septennio, quo Daventriæ consuetudine Florentii & *Devotorum* usus est; tum altero illo septennio, quo

*Comparantur
utrinque studia.*

inter Clericos & Novitios in monte Sanctæ Agnetis meruit, diligentissimè se exercuerat, immò diu cum Joanne de Huesden, Willelmo Vorneken, Petro Gerlaci, cæterisque in Windefem præcipuis *Devotis* quàm familiariter vixerat.

Atqui hoc etiam autoris librorum de Imitatione Christi studium fuisse patet ex eo quòd nihil prorsus in quatuor libris suis habet, ut suprà demonstravimus, quod totum ex his quatuor fontibus, Scripturâ, inquam, Bernardo, Regulâ Joannis de Huesden, & exemplis *Devotorum* in Windefem & monte Sanctæ Agnetis haustum non sit.

*Comparatur
stilus Kempen-
sis cum stilo
Autoris libro-
rum de Imita-
tione.*

Stilum verò quod attinet, is tribus quibus constat facilè dignoscitur. Imprimis scribentis in tractandis ac repræsentandis rebus ingenio ac modo, certoque quodam animi charactere, qui in diversis ferè diversus est: ut enim norunt omnes, est in ingeniis incredibilis quædam varietas, nec pauciores animorum penè quàm corporum sunt formæ: unde tantùm inter se distant autores, ut nemo sit alteri similis. Is autem erat Thomæ in scribendo modus

& ingenii character, animi scilicet nitidi & candidi, & quodammodo præ se ferentis in scribendo & dicendo nobilitatem quandam, innocentis simul & pietate ferventis, Deo quàm maximè familiaris, mundi ac pomparum ejus hostis, solitudinis, silentii, ad interiora reditus, Crucis denique unicè amantis. Qui res ipsas sic tractet, ac describat, quasi præsentibus agantur; qui frequenter exhortetur per hanc particulam, *Eia*; exclamet per *O quando*; abundet his suspiriis, *O quanta*, *O Domine*; detestetur & queratur per *proh dolor*; *O Ch. teporis*; denique autores haud aliter citet, quàm dicendo *quidam*, quod videre est maximè in *Soliloquio anima*, in *Tribus tabern.* in *Hortulo Ros.* & *Serm. ad Novitios*, &c.

Atqui hanc etiam esse auctoris librorum de Imitatione Christi in scribendo ingenii & animi formam, qui non videt, haud scio, an idem in meridianâ luce quidquam videat.

2°. Ad stilum etiam pertinet propria certarum quarundam sententiarum ac peculiarium apophtegmatum usurpatio: sic enim olim Cæsar, cujus peracre iudicium erat, cùm volumina jam confe-

cisset apophtegmatum, si quid afferretur ad eum pro Cicerone, quod Ciceronis non esset, statim dignoscere consueverat. Nonnulla ex Thomæ familiaribus libet exscribere, & cum autore librorum de Imitatione Christi comparare.

Thomas Opusculo 12. seu canticis spiritualibus.

Vita boni Monachi Crux est, sed Dux Paradisi.

Et autor oper. de Imit. Chr. lib. 3. cap. 56.

Verè vita boni Monachi Crux est, sed Dux Paradisi.

Thomas Soliloq. animæ cap. 12. *Quocumque te vertere disponis, dolores semper invenies, nisi fueris ad Creatorem conversus.*

Autor oper. de Imit. Chr. l. 1. c. 22. n. 1. *Miser es, quocumque te verteris, nisi ad Deum te convertas.*

Thomas de Discip. Claust. c. 11. *Sæpè putatur esse charitas, & est magis carnalitas.*

Autor Oper. de Imitat. Christi: *Sæpè videtur esse charitas, & est magis carnalitas.* Lib. 1. c. 15. n. 2.

Thomas : *Christus multos habet amatores & sodales mensa, sed paucos sectatores abstinentiæ.* Hort. Ros. c. 7.

Autor oper. de Imitat. Christi : *Habet Jesus plures socios mensa, sed paucos abstinentiæ.* Lib. 2. c. 11. n. 1.

Thomas : *Tota vita Christi Crux fuit & Martyrium.* In Cant. spir. c. 8.

Autor oper. de Imitat. Christi : *Tota vita Christi Crux fuit & Martyrium.* Lib. 2. c. 12. n. 7.

Thomas : *Est maxima consolatio animæ religioſe dicere cum beata Agatha, Mens mea solidata est, & in Christo fundata, ideò non curo hæc ima.* De sil. c. 36.

Autor oper. de Imitatione Christi : *O quàm benè sapuit sancta illa anima, quæ dixit, Mens mea solidata est, & in Christo fundata! si ita mecum foret, non tam facile timor humanus me sollicitaret.*

3°. In autoribus præsertim asceticis, qui, ut cum Augustino dicam, morum vitia quàm verborum ampliùs devitant, & cordi casto linguam exercitatam conferre non audent. Ad stilum maximè pertinet propria quædam nationibus suis vocum ac phrasium peregrinitas, quâ eorum ferè perspergi-

tur omnis oratio. Thomas autem, cùm Kempis, quod agri Colonienſis eſt oppidum, oriundus eſſet, Flandriciſmis, ut diximus, & Teutonifmis abundat.

Atqui iifdem etiam autorem librorum de Imitatione Chriſti abundare ſuprà demonſtravimus.

*Conferatur ætas
quâ ſcripſiſſe
fertur Thomas
Kempenſis cum
ætate quâ erat
Autor lib. de
Imit. Chriſti
cùm eos ſcri-
pſet.*

Denique quod ſpectat ætatem, qui de Thoma Kempenſi & operibus ejus ſcripſerunt autores, in hoc plerique omnes conveniunt, libros de Imitatione Chriſti ipſum, cùm admodum adoleſcens eſſet, ſeu non multò poſt emiſſam profeſſionem, & primis converſionis ſuæ vitæque religioſæ annis compoſuiſſe. Iſtud ipſum innuit Trithemius, cùm libro de Scriptoris Eccleſiaſticis ait, Thomam anno 1410. claruiſſe, quo tempore agebat is annum ætatis ſuæ circiter trigeſimum. Guillelmus Eiſingrenius in Catalogo teſtium veritatis refert Thomam ad annum 1407. quo tempore erat 27. annorum. Spondanus in auctuario ſuo, & Jacobus Gordonus annum aſſignant 1412. quo tempore agebat Thomas annos 32. Heſerus parte 1. Diopt. in fine, ait clarum ſibi vi-

deri circa annum 1410. primum, secundum, & tertium de Imitatione Christi librum jam perfectum fuisse; quartum accessisse cùm Thomas initiatus est Sacerdotio, id est, tres primos libros scripsisse cùm 30. annorum esset Thomas; quartum verò anno circiter ætatis suæ 32. aut 34. scripsisse: quam sententiam secutus est Fronto noster in argumento à *Devotis* sumpto. Neque dissentiunt Sommalius & Rosveidus, cùm aiunt Codicem Antuerpianum anni 1441. ita esse Thomæ Autographum, ut tamen primus non sit: quibus ego lubens etiam assentior.

Sic nempe mos erat *Devotorum* & Canonorum Windesemensium, ut jam suprâ diximus, ut primis conversionis suæ annis, otio malorum omnium fontium nunquam indulgentes, vel sacris libris lectitandis, vel in communem usum describendis, vel ingenio suo componendis incumberent.

Sic ut plures alios omittam, Gerardus de Zutphaniâ, unus ex primis *Devotis*, initio conversionis suæ & ætatis suæ anno circiter 22 librum suum *Beatus vir*, qui extat in Bibliot. PP. composuit. Is

enim obiit anno 1398. & ætatis 31. Citatur tamen liber ejus à Joanne de Huesden in Regulâ suâ, quam anno 1389. edidit.

Sic & ipse Joannes de Huesden libellum suum altero, aut etiam primo conversionis suæ anno & ætatis suæ 26. aut 27. divulgavit.

Sic Gerlacus Petri, ut refert Buschius, libros plures, cum admodum adolescens esset, & adhuc inter Clericos in Windesem versaretur, nec dum Religionis habitum indutus, composuit; & cum sacris Canonorum Regularium initiatus fuit, plures etiam alios scripsit. Obiit tamen is anno 1411. & ætatis suæ circiter 30.

Sic denique Mauburnus admodum etiam juvenis, ut refert Trithemius, libros plures, quos tamen Possevinus reliquis Asceticorum operibus longè præfert, composuit.

Atqui autor operis de Imitatione Christi disertè etiam innuit se hos libros non multò post emissam professionem, & tum cum adhuc sub Præpositi ac Prelati dominio ac disciplina exerceretur, composuisse; non autem cum
canâ


canâ senectute & amplâ Abbatis dignitate venerandus esset, ut somniant adversarii, in quo quidem auctoris hujus ac libelli (si dici patiuntur) prorsus ignaros se probant, aut immemores. Nam ut de plurimis locis, in quibus autor ipse apertè indicat, se tres primos libros scripsisse, cùm adhuc sub aliorum esset dominio, quartum verò statim atque Sacerdotio initiatus est, paucos seligamus. Quid hac in re clarius est verbis l. 3. c. 32. ubi ipsum alloquens Dominus: *Utinam, inquit, sic tecum esset, & ad hoc pervenisset, ut ad nutum meum purè stares, & ejus quem tibi praposui patris.* Et c. 49. ejusdem libri: *Quia non audes, inquit ipsi Dominus, resistere altiori potestati sub dominio constitutus, ideò durum tibi videtur ad nutum alterius ambulare.* Quartum denique librum, qui est de Sacramento Altaris, statim ac Sacerdotio initiatus est, ipsum scripsisse fidem facit c. 5. ejusdem libri, in quo de seipso autor loquens, *Attende tibi, inquit, & vide cujus ministerium tibi traditum est per impositionem manus Episcopi. Ecce Sacerdos factus es, & ad celebrandum consecratus. Vide nunc ut fideliter & devo-*


tè in suo tempore Deo sacrificium offeras, & teipsum irreprehensibilem exhibeas, fidem facit. Et c. 6. in quo orat sibi aliquod adeo breve exercitium tradi, quo deinceps inter celebrandum uteretur. Tu doce me, inquit, Domine, viam rectam. Propone breve aliquod exercitium sacrae communioni congruum. Utile est enim scire qualiter tibi præparare debeam cor meum ad recipiendum salubriter tuum Sacramentum, seu etiam celebrandum tam magnum & divinum sacrificium.

Quibus omnibus hætenus propositis argumentis, si quis adhuc Thomam de Kempis verum ac legitimum librorum de Imitatione Christi autorem esse neget, cùm tamen jam clarè videat opus istud ipsi trium penè sæculorum sibimet succedentium contestatione continuâ, ab omnibus autoribus coævīs, supparibus & recentibus adscribi; suffragari editiones ferè omnes quotquot abhinc ducentis retrò annis innumeræ prope modum per universam Europam divulgatæ sunt; M. SS. Codices benè multos adstipulari; patriam denique autoris, tempus, vitæ institutum, doctrinam, stylum, ætatem, reliquasque om-

nes quæ ex ipso libello eruuntur circumstantias in ipsum mirificè & singulariter convenire. Et contrà pertinaciter contendat virum omnibus retrò sæculis incognitum, Joannem scilicet nescio quem Gersenem de Canabaco, vel de Cavagliâ, ut aiunt, qui anno 1220. vixisse fingitur, horum librorum autorem esse, hoc dumtaxat jam cum Augustino repono: *Dicant ista, qui ausi fuerint; audiant qui voluerint; credant qui potuerint: ego autem puto, quòd omnes, quorum mentes non obnubilat defendendæ suæ sententiæ pertinacia, hoc sentire non possunt.*

August. lib. 1.
de peccatorum
meritis cap.
36.





PARS SECUNDA.

DISCUTIUNTUR ARGUMENTA
quibus utitur Delfavius ut probet
Thomam de Kempis non esse libro-
rum de Imitatione Christi autorem.

CAPUT I.

*IN LIBER DE IMITATIONE
Christi Doctoribus Angelicis, Bonaventura
ac Thoma familiaris fuerit, adeoque Tho-
ma Kempensi antiquior.*

PROFECTO quantò magis magis-
que cogito, haud quaquam mente
satis assequi possum, quì factum sit, ut
tam mobiliter ferventerque anno pro-
ximè elapso ad renovandam jamdiu so-
lemniter dijudicatam de autore libro-
rum de Imitatione Christi controver-
siam, animum appulerit Delfavius, li-
bellumque istum suum, quo non Tho-
mam Kempensem, sed Joannem nescio
quem Gersensem aurei illius operis auto-

rem esse post Caietanum, Walgravium, & Quadrinarium contendit; tantâ tamque magnificâ ostentatione ac jactatione semel & iterum evulgare gestierit. Dicam enim, non reverens bonorum ac eruditorum reprehensionem, nihil ab illo in hoc famæ suæ ingressu fieri potuit inconsideratius; publicum enim hoc pacto testimonium quæsisse videtur, quàm nullius hac in parte eruditionis esset ac diligentiae in pernoscendis examinandisque rebus iis de quibus tamen ipso milite, ut aiunt, glorioso gloriosius loqueretur ac scriberet.

Equidem diu est quod istud palàm ante oculos omnium à me factum esset, exiguam enim admodum res ista operam exigebat, sed invitus, fateor, ad eam semper accessi: nam si quisquam est qui placere se studeat bonis quamplurimis, & minimè multos amet lædere, in iis ego certè nomen profiteor meum. Quare diu sum animo reluctatus, donec quotidiano penè amicorum convicio, qui istud ipsum ut facerem, efflagitabant; tandem victus, quod imponebatur oneris, utcumque spontè suscepit.

Itaque jam breviter quinque aut sex frequentibus capitibus, in quibus ordinem ab illo institutum, quoad fieri poterit, tenebo, ita tamen ut à nostro etiam non multum recedam, palam omnibus facere tentabo: in tot tamque magnificis verbis & argumentis, quibus toto suo libello adversus Thomam Kempensem depugnat Delsavius, veritatem, eruditionem, constantiam in dictis, uti & prudentiam ejus multum desiderari.

Initio igitur libelli sui asserit librum de Imitatione Christi Doctoribus Angelicis Bonaventuræ ac Thomæ familiarem fuisse, adeoque Thoma Kempensi centum & amplius annis antiquiorem. Nota enim res est, inquit, beatum Bonaventuram, qui cælos petiit anno 1273. aut 74. octo supra centum annis ante natum terris Kempensem Collatione 7. ad Novitios librum de Imitatione Christi his verbis laudasse, ut patet in devoto libello de Imitatione. Quis igitur Thomas poterit esse atque haberi autor Opusculi à Doctore Seraphico tot ante annos laudati?

Nescio quomodo semper errare ma-

*Dissert.
parie 1.
sect. 2.*

lunt adversarii, eamque sententiam, quam semel temerè adamarunt, pugnacissimè defendere, quàm sine pertinaciâ quid verissimè & constantissimè dicatur exquirere, etiam ubi istud facillimè fieri potest. Quid enim magnum erat ex multis indiciis deprehendere istud quod adeo *notum esse* vult Delsavius, nempe has collationes esse Divi Bonaventuræ, dubium admodùm, immò & evidenter esse falsum.

Dubium, inquam, unde & doctissimus Lanoïus in dissertatione suâ de auctore librorum de Imitatione Christi: *Utrum verò, inquit, ad Bonaventuram illæ collationes pertineant, donec antiquius adhuc & certius testimonium repererim, propter Ubertini citationem, dubitare me non negabo.*

Et certè, qui primus omnium Collationes has Divo Bonaventuræ tribuit, is fuit Marianus Florentinus. Atqui magnâ illum negligentîâ & inscitîâ in recensendis Seraphici illius Doctoris operibus usum fuisse nemo non facilè videt. 1^o enim non coram se habebat opera Bonaventuræ cùm ea recenseret, immò nec unquam fortè legerat, ut

paret ex eo quod nescire se testatur, quod sit initium præcipuorum quorumque operum quorum indicem texit. 2º. Innumera prætermittit opuscula, quæ haud dubiè sunt Bonaventuræ, cujusmodi sunt *91. Collationes*, in gratiam juniorum, *Speculum anime*, *Epistole*, &c. 3º. Unum & idem opus bis in Indice suo sub vario nomine sæpè recenset, tanquam si duo forent diversa opera. 4º. Librorum initia alio sæpè modo refert quàm quo reverà sunt. 5º. Multa tribuit Bonaventuræ, quæ non sunt ejus: nam ut omittam, *Misticam Theologiam*, *Compendium veritatis Scripturæ*, seu *Bibliam pauperum*, de *puritate conscientia*, de *sex aliis Cherubim*, & de *speculo disciplinæ*; de quibus dubitatur an sint Bonaventuræ, certè *Alphabetum Monachi*, quod illi à Mariano tribuitur, non est ejus, sed Thomæ Kempensis.

Causam erroris in Collationibus recensendis hanc fuisse Mariano crediderim, quod fortè fando audierat, aut legerat Divum Bonaventuram Collationes quasdam ad juniores & Novitios composuisse, quod verissimum est: sed Marianus, qui hoc opus nunquam vide-

rat, Collationes 7. seu potius centonem nescio quem indignum prorsus Divo Bonaventuræ in Bibliotheca aliqua nactus ei tribuit, & egregium aliud opus Collationum 91. quæ verè sunt Scraphici illius Doctoris prætermisit. Idem & peccavit in Alphabeto Monachi; nam quod erat Thomæ Kempensis, asseruit Bonaventuræ, & quod Bonaventuræ vulgò tribuitur, omisit.

Verùm has de quibus controvertitur Collationes Bonaventuræ nullo modo tribuendas esse, & hoc quod *notum esse* vult Delfavius, non dubium modò, sed & prorsus falsum, duplici ratione facilè demonstratur.

1º. enim harum Collationum prima tota quanta est, ex Ubertini libro, cui titulus, *Arbor crucifixa vita Jesu*, desumpta est, immò & in eâ nomen Ubertini citatur. Atqui librum hunc Ubertinum non inchoasse ac perfecisse, nisi anno 1305. Ubertinus ipse in primo prologo testatur his verbis: *Mense Septembri terminavi in vigilia Michaelis Archangeli anni presentis 1305. à felicissimo ortu veri solis Jesu, à meâ verò vili conversione anno 32. & à die 9. Martii in Quadragesimâ, in*

Festo 40. Martyrum incoatus est iste liber.
 Quì igitur ex hoc libro potuit Collationem unam concinnare D. Bonaventura, qui obiit anno 1273. aut 1274. id est penè triginta antè annis quàm librum suum inchoasset Uberrinus?

2º. In his Collationibus frequentissimè citatur Sanctus Climacus : atqui ante annum 1300. aut fortè etiam multò seriùs asceticis ac scholasticis opera illius fuisse cognita posse demonstrari non facilè existimaverim. Certè Magistro Sententiarum, Magistro de Hales, Guillelmo Parisiensi, Hugoni à Sancto Victore, Richardo, Bernardo, Alberto, Thomæ, Bonaventuræ, si excipias has Collationes, & unum aut alterum opusculum, quod ipsi falsò etiam attribuitur, cognita fuisse nusquam apparet. Unde Matthæus Raderus in Isagoge suâ ad Scalam Sancti Climaci tradit, primum omnium interpretum Climaci fuisse Angelum de Cingulo è Sancti Francisci contubernio, Patrum Clare-norum conditorem, qui sub annum Christi 1294. florebat. Et Lucas Wadingus ad annum 1289. *Frater*, inquit, *Angelus Clarensis de Cingulo divinitus edo-*

etus, idioma Græcum in nocte Nativitatis Domini sub anno 1300. plures elucubrationes latinitate donavit, præsertim unum & alterum opusculum Joannis Climaci. Crediderimque autorem Collationum quæ habentur in Divo Bonaventurâ, hac Clarenî versione usum fuisse, quamquam istud non multum affirmo. Sed ad id inducor, propterea quod versio Clarenî obscura, verbum è verbo reddens, & non ex genio Latinæ linguæ dicatur: quæ certè omnia in eam versionem quâ usus est autor Collationum de quibus agimus, mirificè conveniunt.

Nec est quòd dicatur Wadingum octo has Collationes Bonaventuræ vindicare: nam vir alioquin doctissimus animi longè falsus est; nullaque sunt prorsus, quæ hanc in rem profert argumenta; hæc enim tria sunt: imprimis indiculus Mariani; 2º. stilus; 3º. citatio autorum Bonaventuræ ubique familiarium. De indiculo Mariani dictum supra: quod autem vult ex stilo posse colligi has Collationes esse Bonaventuræ, certè homo est, & humani aliquid patitur. Singulæ enim istæ Collationes, si primam exceperis, quæ tota ad verbum

ex Ubertino sumpta est, & est stili longè dissimilis Bonaventuræ, sunt dumtaxat indigesta quædam trium aut quatuor è diversis autoribus sententiarum vix inter se per particulas, & ac, atque, sic, nunc, colligatarum congeries. Ex quibus v oculis ac particulis stilum auctoris alicujus posse colligi quis in animum inducat? Denique in eo etiam quòd autores qui in his Collationibus citantur, id est Ubertinum, Climacum, & librum de Imitatione Christi familiares fuisse ait Bonaventuræ, tam longè abest à vero quàm qui maximè. Nam ex aliis omnibus operibus Bonaventuræ aut vitâ ejus hos autores ipsi unquam vel levissimè cognitos fuisse, ne dum familiares fuerint, colligi non posse nullus dubito.

Diff. 1. p. „
sect. 2.

Atenim, inquit Delfavius, Ubertinus in prologo Arboris vitæ Crucifixi innuit se sub Joanne Parmensi Generali Minorum ministro tirocinium posuisse, quod ipsum testantur Rodolphus Tossiniacensis lib. 3. hist. Marcus Ulisiponensis, Chron. p. 2. c. 22. Lucas Waddingus, & alii: atqui Joannes de Parma præfecturâ dejectus est anno 1256.

indeque in carcerem trusus, per con-
tinuos 18. annos non erat, opinor, No-
vitiis per id tempus in ordinem coap-
tandis idoneus. Ante annum igitur 1256.
Sacris Franciscanis à Joanne Parmensi
addictum opportuit Ubertinum; nihil
proinde vetat quin Sanctus Bonaventu-
ra, qui anno 1274. diem suum clausit,
aliquid ab Ubertino concionante, seu
familiariter colloquente, seu schedas,
ut fit, inter ascetas communicante, sibi
sublegere potuerit.

Tanta est in his verbis confidentia,
ut quibus Delfavius non est planè no-
tus, non pro verissimis illa statim non
habeant, cum tamen sint omnia falsis-
sima.

1^o. enim ait, *Ubertinum innuere se sub
Joanne Parmensi tirocinium posuisse anno
1256.* En quid innuat de se Ubertinus:
scribit in primo suo prologo annum re-
paratæ salutis 1305. fuisse annum 32.
conversionis suæ, quâ Sacris Francisca-
nis addictus est: *Terminavi, inquit, li-
brum istum in mense Septembri anni præ-
sentis 1305. à felicissimo ortu veri solis Je-
su, à mea vero vili conversione anno 32.*
Igitur, inquam, anno 1273. Religio-

nem ingressus est. Porro idem Ubertinus ait se à parentibus ad Ordinem Sancti Francisci anno ætatis suæ 14. fuisse deductum : *Spiritus Jesu*, inquit, *ex decimo-quarto anno vitæ meæ ad sacratissimum Ordinem per Seraphicum virum Franciscum institutum mirabiliter me adduxit à patre & matre oblatum.* Innuit igitur natum se esse anno 1259. Quò ergo verum esse potest, quod hîc ait Delfavius, Ubertinum nempe innuere anno 1256. id est tribus annis antequàm natus esset, se sub Joanne Parmensi Sacris Franciscanis additum esse?

2º. ait, *Wadingum illud idem testari.* En verba hujus auctoris ad annum Christi 1299. pag. 712. *Floruit*, inquit, *hoc tempore frater Ubertinus, vir pius & doctus, anno 1305. Trium mensium & septem dierum spatio in monte Alverniæ scripsit pium aliquanto tamen pro illius temporis ratione indigestum, & minimè ad incudem redactum opus, quod inscripsit, Arbor vitæ Crucifixi.* In primo prologo operis ait, se anno citato, quo opus complevit, trigessimum-secundum in sodalitiis Minorum transigisse; ex quo conficitur initiatum anno 1273. sub generalatu Sancti Bonaventuræ,

eo ipso anno, quo factus est Cardinalis. Natus itaque est anno 1259. nam in principio prologi ait, anno quarto decimo atatis sue se Minoribus nomen dedisse. Deinde additus studiis Philosophicis, magno conatu spiritualibus se applicuit exercitiis, in quibus dum per 14. annos occuparetur, & visitaret Sanctuaria Romana, descendit ad vallem Reatinam, pia illa loca à Sancto Francisco instituta visitaturus. Invisitque pium virum beatum Joannem Parmensem in Tugurio Gracii, multis annis harentem, à quo se confortatum, absolutum & instructum ad celebrem portiuncula indulgentiam abiisse ad censet. Vides quoniam verum est quod ait Delfavius, Wadingum, testari Ubertinum anno 1256. tirocinium posuisse sub Joanne Parmensi; cum contra probeb nonnisi tribus post annis ipsum natum esse, id est anno 1259. & nonnisi anno 1273. sub Generalatu Divi Bonaventuræ Sacris Franciscanis initiatum esse. Ac denique nonnisi post 14. annos ab ingressu Religionis Joannem de Parmâ invisisse.

3°. ait Marcum Ulfisiponensem id etiam testari. En verba Ulfisiponensis: Ubertinus divina gratia lumine optime informa-

tus, post annos quatuordecim ab ingressu Religionis in quibus sanctis exercitiis delectatus est, piorum hominum consilio (Joannis scilicet Parmensis, & Joannis Olivi, quos tunc invisit) de Christi Vita appellat Arborem Crucifixi, librum composuit. Vides idem testari Marcum Ulisiponensem quod Wadingus. Ait verò aliquando Ulisiponensis Joannem Parmensem Magistrum fuisse Ubertini, non quòd ab ipso Sacris Franciscanis initiatus sit: jam enim ab annis quatuordecim ab alio initiatus fuerat; sed propterea quòd cùm ad illum adiit in rupe sua jam ab annis 30. hærentem, id est anno Domini circiter 1285. ab ipso confortatus, absolutus, & instructus est, ut mox vidimus ex Wadingo, & mox ex ipso Ubertino videbimus. Et si Rodulfus Tossiniacensis aliud contendit, errat, nec Ubertini verba satis intellexit.

4°. ait *Joannem Parmensem in carcerem trusum per continuos 18. annos. Levia sunt hæc, & ad causam nostram vix attingent. Non tamen levia diligentia Delavii argumenta; quod enim de sociis tantum Parmensis scriptum est, ipsos nempe per 18. annos in carcere deten-*

tos esse, attribuit Joanni ipsi de Parma, cui tamen potestas facta est eligendi quem vellet locum: *Elegitque*, inquit Wadingus, *devotissimum Evemitorii Gracii locum, quo sanctè potitus est triginta & plurimum annorum curriculo.*

Sed pergit Delfavius, & ad id quod suprà demonstravimus, Ubertinum natum non esse nisi anno 1259. & Sacris Franciscanis initiatum anno dumtaxat 1273. quod cum Wadingo colligebamus, ex eo quòd Ubertinus ipse anno 1305. à conversione sua 32. edidisse se narrat librum Arboris Vitæ: hoc, inquit, ab Ubertino dici ego non infior: verùm Ubertino ea narranti opo-
 pono Ubertinum testantem se sub Joanne de Parma meruisse, cùm in prologo Arboris Vitæ; *Romana*; inquit, *Sanctuaris visitans, & ad Angelum faciei Jesu verè Sanctissimum Joannem de Parma ad rupem scilicet Gracii deveniens, letus, & ab ipso confortatus, absolutus & instructus in die indulgentiæ secundæ diei Augusti intravi Ecclesiam Beatae Mariæ de Portiuncula. Sic de novo genitum alumnis fidelibus spiritum Jesu tradidit nutriendum. Atqui Joannem de Parma præfecturâ deje-*

1. & 2. diff.
1. p. sect. 2.

„ctum esse , indeque in carcerem tru-
 „sum, reliquum vitæ privatum egisse, nec
 „Novitiis per id tempus in ordinem
 „coaptandis idoneum fuisse, testantur
 „Minorum Annales. Ante annum igitur
 „1256. Sacris Franciscanis à Joanne Par-
 „mensi addictum oportuit Ubertinum.
 „Quì igitur coincidit annus conversionis
 „32. cum anno 1305. Tum exultans ac
 „gestiens, *Nodum hunc*, inquit, *dissolvant*
adversarii, ac tam diversa scribentem Uber-
tinum Ubertino concilient, si conciliando
sunt pares ; additque pro singulari suâ
 „in solvendis difficultatibus peritiâ : ac
 „ne controversiam obscurare, aut lites
 „ex lite ferere velle videamur, lucem
 „aliquam his tenebris affundamus, sci-
 „licet Ubertinus non de prima sui à sæ-
 „culo conversione loquitur, sed de suâ
 „in meliorem frugem restitutione post
 „decursum Parisiis Theologiæ studium,
 „*fœdatamque*, ut ipse loquitur, *priorem re-*
 „*formationem*.

Itâne obstinatè adversarium operam
 dare, ut imponat Lectoribus, & idcirco
 ipsum non veritum esse reticere quæ
 huic nodo, si tamen nodus est, sol-
 vendo sufficiunt : hæc scilicet verba

Ubertini, quæ antecedunt, in primis quoque exercitiis sic quasi per 14. annos circa forinſeca Jeſu me ſuus ſpiritus occupabat, nondum me introducens ad altas ſue mentis perfectiones, & inæſtimabiles cordis ſui dolores, ſed tunc Romana Sanctuariorum viſitans, & ad Joannem de Parma deveniens, &c. Quis jam nodus reſtat ſolvendus? An non apertè dicit Ubertinus ſe jam ab annis 14. Sacris Franciſcanis addictum fuiſſe, cùm ad Joannem de Parma Romana Sanctuariorum viſitans venit? Quod. & diſertè, ut ſuprà vidimus, teſtati ſunt Wadingus & Marcus Ulſipponenſis, ac proinde non ab illo initiatum fuiſſe anno 1256. cùm ad illum non venerit, niſi anno 1286. hoc etiam diſertè innuit verbis quæ conſequentur, & quæ prætermiſit Delfavius: *Aſſuit*, inquit Ubertinus, *cum prædictis Magiſtris* (quibus traditum ſe à Joanne Parmenſi commemoravit) *Seraphica ſapientie Doct̃or ſpeculativus* frater Joannes Olivi: Atqui Wadingus teſtatur Joannem hunc Olivi anno ætatis ſux 12. & Chriſti 1259. à parentibus oblatum fuiſſe Sancto Francisco in Conventu Biterrenſi. Què ergo idem potuit eſſe Do-

ctor Seraphicæ Sapientiæ anno 1256. Quo tamen tempore vult Delfavius ipsi à Joanne Parmensi traditum fuisse Ubertinum. Nodum hunc ipsi solvant, & Ubertinum non Ubertino, neque enim diversa scripsit, sed sibi ipsis qui ab illo tam diversa scribunt conciliant, si tamen conciliando pares existunt.

Sed quod addit Delfavius pro suâ peritiâ in solvendis difficultatibus, nempe, *cum Ubertinus narrat annum 32. conversionis suæ cum anno 1305. coincedere, non de primâ sui à seculo conversione ipsum loqui, sed de sua in meliorem frugem restitutione, post decursum Parisiis studium.* 1^o. Quàm ingentes ingenium ejus patiatur angustias, palàm indicat, quòd talia commenta quibus saltèm videri possit effugisse, adinvenire cogitur: quis enim fando audivit unquam conversionis nomine non suam à sæculo conversionem homines Religiosos vulgò intelligere, sed suam in meliorem frugem restitutionem? Certè Wadingus Ubertinum interpretatur de suâ à sæculo conversione. Ait, inquit Ubertinus, *se anno 1305. quo opus suum complet, trigesimum-secundum in sodalitis Mi-*

horum transsegisse, ex quo conficitur initiatum anno 1273. sub generalatu Sancti Bonaventurae.

2°. In idipsum se induit Delfavius, quod timet, & imprudens eò revolvitur, quo minimè vult : nam si Ubertinus non *de prima*, sed *de secunda conversione sua* loquitur, quâ post decursum Parisiis Theologiæ studium à Christo admonitus, mutationem magnam subiit; non ergo anno 1256. & multò minùs *antea Sacris Franciscanis addiētus est*. Quod sic conficitur: narrat enim Ubertinus in prologo Arboris vitæ, hanc immutationem sibi anno 25. ætatis suæ contigisse, id est, annis undecim ab ingressu Religionis; quos annos si ad duos supra triginta, qui ab hac suâ conversione ad annum 1305. intercefferunt addideris, erunt omnes 43. Hos porrò si ab annis 1305. dempseris, erit annus 1262. non ergo anno 1256. & multò minùs *antea à Joanne Parmensi initiatus est* Ubertinus. Et hunc etiam nodum solvat adversariorum quilibet, si tamen solvendo par est.

Hac cùm non succedat, aliâ tentandum existimat viâ. Nam, ut illæ, in-

1. & 2. diff.
1. p. sect. 2.

„quit, Collationes non sint Bonaventuræ,
„ræ, certè sunt hominis Thomæ antiquioris : nam Marianus Florentinus inter opera Sancti Doctoris eas recensuit,
„ac deinceps editio Argentinensis anni
„1495.

Sed satisne justa est ista consecutio ? Id tum quidem restè sequeretur, si aut Marianus antiquior esset Thomâ Kempensi, aut exemplaribus ipso Thomâ vetustioribus usus esset. Horum autem neutrum sic sese habet : non primum, nam vel consentiente Quatremario scribebat Marianus Chronica sua anno 1486. & constat ex Marco Ulisipponensi 3. p. lib. 9. cap. 40. ad annum usque 1528. id est 150. & ampliùs annos post natum Kempensem vixisse, quod idem ex Wadingo colligi potest. Non etiam secundum, neque enim oportuit illa exemplaria antiquiora esse iis quibus usus est, ut alphabetum Monachi assereret Sancto Doctori : hæc autem certo certius Thomâ non fuere vetustiora, cum constet omnium authorum fide opus istud Kempensis esse, non Bonaventuræ. Tantumdem est quod ex editione Argentinensi anni 1495. opponit; nam

& Thomâ longe posterior est, & illi opponimus aliam Argentinensem editionem anni 1489. in qua hæ Collationes non habentur.

Tandem in fine hujus paragraphi ait Delfavius, omnibus à se hætenus dictis robur accedere ex Doctore Angelico Sancto Thomâ, qui pleraque ex lib. 4. de Imitatione Christi derivavit in Officium Sanctissimi Sacramenti: exemplo sit Antiphona quæ præcinitur ad Magnificat, *O quàm suavis est*, &c. Sed respondeo breviter non Doctor Angelicus à Kempensi, sed Kempensis à Doctore Angelico, immò ne quidem ab illo, sed à divinis & Ecclesiasticis Officiis multa in 4. suum de Sacramento Altaris libellum derivavit. Ex iis enim est ille versus cap. 3. *O mira circa nos tue pietatis dignatio!* qui versus ex benedictione cerei Paschalis desumptus est. Ex iis est illa oratio: *Tua me, Domine, gratia semper præveniat & subsequatur, ac bonis operibus jugiter præstet esse intentum.: per Jesum Christum Filium tuum. Amen.* Lib. 3. cap. 55. quæ ex Dominica 16. post Pentec. sumpta est. Porro hoc in aliis omnibus operibus suis idem

sapiùs factitavit Kempensis, ut multa scilicet in iis ex Ecclesiasticis Officiis derivaret. Sic lib. de tribus Tabern. cap. 3. hanc eandem etiam quâ de agimus Antiphonam integram habet: *O quàm suavis est, &c.*

CAPUT II.

Solvuntur argumenta Delfavii, quibus autores nihilo Thomam juvare contendit.

ADVERSUS autores illos omnes, quibus in primo capite partis antecedentis utebamur, hæc habet Delfavius quæ reponat.

*a. diff. p. 1. „
sect. 5.*

1^o. Autorem ait Anonimum, qui in se „ receperat indicem opusculorum Tho- „ mæ contexere, aut fidem non exolvisse, „ aut libelli de Imitatione non meminisse. Immò, inquam, utrumque ab illo egregiè præstitum. Et fidem enim exolvit syllabumque operum Kempensis texuit, quem vir doctissimus R. P. Hesserus Societatis Jesu ex Monasterii Rebdorffensis Canonorum Regularium tribus pervetustis M. SS. Codicibus

erutum in lucem protulit. Et libri de Imitatione Christi in vita Thomæ disertè meminit, quod ejus testimonium suprà exscripsimus. Quì igitur tam confidenter scribit Delfavius, non meminisse libelli de Imitatione Christi? Sed ecce quàm sibi constet, qui enim pagina 71. hæc scribit idem pagina 76. hæc scripsit: *Equidem librum de Imitatione Christi Thomæ asserit iste Anonimus, sed cum superflua & affectata repetitione.* Quì ista simul cohærent? tantumdem fere est quod scribit, Thomæ vitam ab Anonimo illo concinnatam interpolatam esse, novissima enim, inquit, periodus in editionibus Venetis anni 1568. & 1576. desideratur: utpote nuper abs quadam malæ fidei homine confarcinata: sed an non perfectissimè notum est ab illo jam olim hanc ipsam vitam cum hac novissimâ periodo contineri in editione Norimbergensi anni 1494? Quì igitur nuper & in editionibus 1568. & 1576. dicitur confarcinata?

Ad Buschii testimonium ait, vereri se ut risu excipiat lector tam intempestivam, tam ineptam, tam incompositam, tam ambiguum, tam affectatam, tam

« Eadem scilicet »

- „ falsi suspicione non carentem parenthe-
 „ sim illam tam animadvertendam : *Fra-*
 „ *ter Thomas* de Kempis, vir *probata vita*
 „ (*qui plures devotos libros composuit, vide-*
 „ *licet, Qui sequitur me, de Imitatione Chri-*
 „ *sti*) cum aliis nocte *insecutâ somnium vidit*
 „ *præsagium futurorum.*

Ego verò non vereor, ut risu exci-
 piat lector tam ineptum iudicium ejus.
 Quid enim illâ parenthesi aptum magis
 magisque tempestivum, quid minus
 ambiguum ac clarius, quid minus affe-
 ctatum & simplicius, quid denique
 magis suspicione carens?

- „ Sed, inquit, quid huic libro de Imi-
 „ tatione Christi & visioni? Multum fa-
 „ nè. Nempe Thomas testis magnæ rei
 „ advocatur, revelationis scilicet sibi factæ
 „ de morte Joannis de Huesden Superio-
 „ ris generalis in Windesem: prudentissi-
 „ mè itaque à scriptis suis commendatur
 „ Thomas.

- „ Sed quid, inquit, cæteras lucubra-
 „ tiones tacitus præteriit? Unam de qua
 „ controvertitur dumtaxat recenset? Nem-
 „ pe quia hæc sola quæ tam eminet inter
 „ cæteras, tamque omnibus nota erat ad
 „ fidei & authoritatis Thomæ commen-

dationem sufficiebat. An indicem integrum omnium ejus operum in hac parenthesi vellet recensitum esse? Sed quàm verè tunc intempestivè istud factum esset. Quamquam nec cæteras Kempensis lucubrationes tacitus omnino præteriit, sed eas satis innuit, cùm ait : *Thomas, qui plures libros composuit, videlicet, Qui sequitur me, de Imitatione Christi, cum aliis scilicet opusculis benè multis.* Eodem modo Buschius sæpè commendat autores, unum dumtaxat locum ejus profero ex l. 2. c. 40. *In Monasterio, inquit, viridis vallis duo fuerunt magna Ecclesie Dei lumina, videlicet Joannes Ruisbroch Prior ibidem, qui plures devotissimos libros composuit, videlicet, Ecce sponsus, de calculo, de gradibus amoris, & consimiles.*

Lepidum verò omninò illud est, quod hîc vult Delfavius, voces illas *cum aliis*, non de libris intelligendas esse, sed ad visionem referendas, ut sensus sit, *vidit cum aliis.* Cùm tamen & Buschius & Kempensis ipse, uni & soli sibi Thomæ visionem hanc contigisse disertè scribant : *Contigit, inquit Thomas in Chron. Mont. Sanctæ Agnetis c. 19. ante paucos*

dies obitus Joannis de Huesden, ut duo fratres de Monte Sanctæ Agnetis ad colloquendum ei in Windesem venirent, tunc unus illorum eadem nocte tale somnium habuit.

„ Sed Thomas, inquit, ejus somnii meminuit quidem, at eam de sacro libello narrationem non interferit. Quia scilicet modestissimus, unde & nomen etiam suum reticuit.

„ Non temerè igitur, inquit, affirmare ausim hanc parenthesis aliunde accitam. Immò, inquam, nonnisi maximè temerè: nam diu est quod Rosveidus vindiciarum suarum c. 6. vobis hæc respondit: *Ne ulla dubitatio inhereat quasi vel margini vel textui ea verba postmodum fuerint apposita, vel inserta: librum Joannis Buschii habeo ipsâ ætate auctoris scriptum, in quo nullum marginale, nullum addititium apparet, & plura sunt in Belgio talia exemplaria, quæ ubi opus fuerit testimonium dicent.* Et certè extat de ejusmodi codicibus publicum in Bibliotheca Sangenoveseana instrumentum.

„ Addit Delfavius. Sed Franciscus Tolensis disertè profiteretur, nulli eorum, qui cum Thoma vitam agitarunt, curæ fuisse res illius gestas memoriæ pro-

dere. Quasi verò parenthesis illam instituisse sit res omnes gestas Thomæ & vitam ejus memoriæ prodidisse.

Quin &, inquit, Continuator Montis Sanctæ Agnetis ne verbo quidem tenus id innuit. En verba Continuatoris: *Composuit Thomas varios tractatulos ad edificationem juvenum in plano & simplici stilo, sed prægrandes in sententia & operis efficacia: fuit etiam multum amarus in Passione Domini, & mirè consolativus tribulatis & tentatis.* Quibus verbis clarè innui autorem librorum de Imitatione Christi suprà nos satis demonstravimus.

At cedo, inquit, de gradu isto ita licet senserit Buschius, cum ego animi falsum esse contendo. Quibus tandem poterit istud persuadere? ait enim Buschius non scribere se nisi quæ oculatâ fide coram positus vidit & audivit triginta insuper & ampliùs annis unà cum Thoma familiarissimè convixit; operum omnium quæ scribebat Thomas conscius & particeps fuit. Unde igitur haberi potest cum animi falsum esse? *Potuit, inquit, errare;* bellam sanè rationem! Neque verò, inquit, mirandum, si tam turpiter erraverit Buschius, cum “ *Eadem sect.*

» doctissimus Sirmondus in Observatio-
 » nibus ad librum ep. Petri Cell. ep. 2.
 » scripserit utrumque Cœnobium Sancti
 » Crispini Sueffionensis esse Benedictinæ
 » familiæ, cùm tamen eorum alterum sit
 » Canoniorum Regularium: Hoc quid
 » sit? Deus bone, quam non rationis ino-
 » piam patitur, qui talem patitur!

» De Mauburno hæc habet. Equidem,
Eadem scilicet, inquit, Thomæ librum de Imitatione
 » Christi in Roseto suo affingit: *Frater*
 » *Thomas*, inquit, *inter cetera opuscula quæ*
 » *fecit, composuit libellum, Qui sequitur me,*
 » *quem falsò quidam Johanni Gersen attribui-*
 » *buunt.* Sed idem in eo incommodum
 » est quod in Scotto; cùm enim scribit,
 » *librum de Imitatione Christi Joanni Ger-*
 » *soni tributum fuisse*, multò plus officit
 » causæ Kempensi quàm faveat. Cæte-
 » rùm Mauburnum in Monte Sanctæ
 » Agnetis unà cum Thoma Clericum
 » egisse, non comperio.

Hoc incommodè semper accidit Del-
 favio, ut nullam ferè lineam scribat,
 in qua indiligentia ejus ac negligentia
 non appareat. 1º. enim nullo Roseti
 sui loco hæc habet Mauburnus, sed in
 suo de illustribus viris ordinis Canonici

libro. 2^o. Quod ait, *non comperisse se Mauburnum unà cum Thoma Clericum egisse.* Hinc apertè ostendit, se ne levissimè quidem in operibus Buschii, Thomæ, & Mauburni, de quibus tamen tam liberè loquitur, versatum esse. His enim autoribus Clericum agere non est Canonicum Regularem esse, sed aut in Congregationibus *Devotorum* commorari, aut inter Canonicos Regulares, in eo statu quem *proba* appellabant, & in quo per plures annos remanebant, antequàm scilicet initiarentur, exerceri. Unde Thomas desiit Clericum agere anno 1406. Mauburnus verò, ut scribit Trithemius, anno 1495. adhuc juvenis erat. Non igitur potuit unà cum Thoma Clericum agere anno 1406. sed hac de re mox plura. Voluit dicere, non comperisse se Mauburnum unà cum Thoma Canonicum in Monte Sanctæ Agnetis egisse: id tamen facilè posset demonstrari, si res tanti esset. Hoc unum dico, cùm constet Mauburnum Canonicum Regularem fuisse in Monte Sanctæ Agnetis, & certum sit etiam jam ab anno 1491. multa ipsum edidisse, & Thomas non obierit, nisi anno

1471. probabile est admodum uno saltem aut altero anno, unà cum Thomâ Mauburnum Canonicum Regularem in Monte Sanctæ Agnetis egisse. 3^o. An non contra omnem sensus communis existimationem est illud quod asserit; nempe cum Mauburnus cum Scotto & aliis innumeris viris eruditissimis, ait *libros de Imitatione falsò à vulgaribus tribui Gersoni, cum constet esse Thomæ*, istud ipsum multò plus officere quàm proficere *Kempensi*. Quid enim contrà apud omnes eruditos & prudentes magis illi favere potest, quàm quod pro sua causa ab omnibus omnium regionum viris doctissimis, ipsique Thomæ penè coævis contrariæ & temerariæ vulgarium hominum opinioni reclamatum est?

Eadem sect.

Ad Scottum respondet, non palàm & ex instituto, sed obiter & aliud agentem dixisse ipsum in elogio suo, *constare libros de Imitatione Christi, non esse Joannis Gersonis, sed Thomæ*.

En egregiam responsionem. Scottus vir, ut ait Trithemius, doctissimus simul & elegantissimus, hortatu Joannis Keiserbergii anno 1488. de vita & scriptis clarissimi Joannis Gersonis elogium instituit,

instituit, ut illud deinceps omnibus editionibus præfigeretur, in eo diligenter examinat quæ vera, quæ dubia, quæ falsa sint Gersonis opera, aitque, *Constare libros de Imitatione Christi non ejus esse, sed Thomæ*; & idcirco inter opera hujus Cancellarii à se non esse edita, & Delfavius hoc appellat, *non palam & ex instituto, sed obiter & aliud agendo rem dixisse.*

Sed nihil sic juvat, quàm ipsum de Trithemii testimoniis differentem audire. Vult itaque Trithemium librum de Imitatione Thomæ antiquiorem agnovisse, triaque propterea contendit.

Primum est Trithemii sententiam maximè ex libro de illustribus Germaniæ viris petendam esse, utpote edito anno 1495. tertio circiter anno post vulgatum opus de Scriptoribus Ecclesiasticis. Sed hîc sanè, sicut & in plerisque aliis, desideratur ejus diligentia in perpendendis autorum sententiis. Nam contra ubique tum in epistolis suis, tum in præfationibus, tum denique in ipsis libris, testatur Trithemius longè majorem libro suo de Scriptoribus Ecclesiasticis habendam esse fidem, quàm li-

bris de illustribus Germaniæ viris. Idque tribus de causis; 1º. quia posterior esset aliis; 2º. quia majori ac diuturniori labore & operâ compositus; 3º. quia faciliori & meliori ordine quàm in aliis, novoque scribendi modo, ut ait, processisset. Posteriores esse significat, cùm in epistolâ ad Wimphelingum scribit se libros de illustribus Germaniæ viris edidisse anno 1491. In Epistola verò ad Joannem de Dalberg Episcopum Wormaciensem, ait se opus de Scriptori-
bus Ecclesiasticis composuisse anno 1492. immò innuit in fine se illud nonnisi anno 1494. publici juris fecisse; diuturniori verò operâ ac labore opus istud ab eo compositum fuisse declarat, tum in Epistolâ ad Episcopum Wormaciensem, tum in prologo ad Lectorem, cùm ait: *Diu distuli, ne si tam ardua inconsideratè aggredi præsumerem, amulorum odia ex levitate mea provocarem*; tum denique in fine, cùm ait: *Hunc Catalogum de Scripto-ribus Ecclesiasticis jam tertio emendavi, augmentavi, & complevi, per septennium ferme in eo laborans: jam nunc igitur per multos tandem labores operi nostro finem imponamus*. Denique novo ac longè me-

liori in eo ordine usum fuisse quàm quo antea usus fuerat in editione librorum de illustribus Germaniæ viris prædicat, cùm in prologo ait : *Placuit mihi novo scribendi modo procedere, ut lector ipse notitiam librorum ex principiis facilius possit invenire.* Unde & in fine hunc suum libellum ut fœtum ingenii tot laboribus ac sudoribus partum, ac tandem perfectum alloquens, *Eia*, inquit, *liber, egredere confidenter; te laudabunt mille, dum vix unus vituperabit.*

Alterum, quod hîc contendit Del-^{n², edit. p. 55.} favius, est Trithemium scititio Thomæ antiquiori, qui Gerardo magno Daven-^{trientiensi} operam dederat, libellum de Imitatione asserere.

Sed in eo non plus est diligentia quàm in præcedentibus: nam ut omit-^{tam}, quod nulla est jam hæc objectio, cùm ex libro de Scriptoribus Ecclesiasticis sit potius sumenda Trithemii sententia, quàm ex libris de illustribus Germaniæ viris, in quibus hæc habet. Certè in hoc opere non tam suam quàm aliorum quorundam Monachorum domus suæ referre opinionem luce clarius tum ex eo liquet, quod in

eâ referendâ his omnibus vocibus utitur, *Feruntur duo fuisse hujus nominis Thomas. Dicitur, forsitan, putatur, fertur, ferunt; tum ex eo quod addit, quamvis sciam nonnullos in hac re sentire contrarium; id est Thomam unicum fuisse, eumque Gerardo juniorem; quam sententiam postea secutus est in libro de Scriptoribus Ecclesiasticis: in quo jam non dubitans, aut aliorum opiniones de duplici Thoma curans, affirmatè scribit: Thomas de Kempis scripsit de contemptu mundi lib. 4. Qui sequitur me.*

P. 57.

Egregium verò prorsus illud est quod „ tertio loco ait, nempe idcirco venisse „ in mentem Trithemio ut fictitio Thomæ antiquiori librum de Imitatione „ tribueret, quòd Trithemius librum „ hunc nomine Thomæ excusum fuisse „ vidisset Norimbergæ anno 1494.

Ecce hominis constantiam & prudentiam. Suprà aiebat hunc ipsum Thomam senioresem esse, cujus meminit Trithemius in libro de Scriptoribus Ecclesiasticis; huncque librum contendebat editum esse anno 1492. (quin & constat librum de illustribus Germaniæ viris editum anno 1491. Extat enim

etiam nunc talis editio) & tamen modò scribit, idcirco Trithemio venisse in mentem, ut Thomæ antiquiori librum de Imitatione assereret, quia nomini ejus tribui legerat in editione Norimbergensi anni 1494. id est, vult idcirco venisse in mentem Trithemio, ut anno 1491. aut 1492. tribueret libros de Imitatione Thomæ, quia legerat anno 1494. hos illi tribui, qui ista secum & cum sensu communi consentiunt?

Sed Trithemium nunquam fortè, aut certè tunc, cùm utrumque suum opus scriberet, editionem Norimbergensem vidisse, facilè liquet; tum eo quod multa prætermittit opuscula Thomæ in indice suo, quæ in Catalogo Norimbergensi habentur; cujusmodi sunt, liber vitæ Magistri Gerardi Groot, liber vitæ Florentii, liber de discipulis Florentii, &c. Tum ex eo quod addit, Thomam qui dicebatur junior, varia composuisse quæ ad manus suas non venerant: hæc enim tria opuscula haud dubiè Thomæ juniiori tribuisset, si indicem Norimbergensem legisset.

Ad reliquos omnes autores, Philippum inquam Bergomensensem, Joannem

Geilerum, Badium sive RR. PP. Benedictinos Sancti Germani à Pratis Parisiensibus, Carthusianos, & Celestinos, Conradum, Gesnerum, Josiam Simlerum, Aubertum Mireum, &c. ait plaustra fabularum congeri, eorum maximam partem arietem suum secutam esse, aut cæco impetu, aut partium studio ductam.

Sed saltem in hoc agmine, in hoc plauastro Delfavius majores suos RR. scilicet PP. Benedictinos Sancti Germani à Pratis Parisiensibus, qui in eo tam eminent, revereretur, ut non omnes pro fabulatoribus haberet; saltem conspectus eorum manum cohiberet, ut non tam facilè scriberet, *cæco impetu eos ductos fuisse, aut partium studio,* cum semel & iterum anno 1521. & 1523. libros *de Imit. Chr.* pientissimi & optimæ memoriæ Thomæ Kempensis nomine Parisiis edendos procurarunt.



C A P U T I I I .

Respondetur argumentis quibus contendit vetustiores editiones non favere Thomæ.

QUÆ toto penè paragrapho suo quarto habet Delfavius, ea prorsus perinfirma sunt & levia, neque satis profectò digna, quibus confutandis diu immoremur. Hoc unum his omnibus repono, verissimum esse, quod à nostris hætenus asseveratum est, vetustissimas nempe librorum de Imitatione Christi editiones, Thomæ favere, non D. Bernardo, non Gersoni Parisiensi Cancellario.

Neque quidquam officit, quod refert ex Rosveido, contrarium ut videtur Vind. cap. 4. ultrò proficiente, cùm scribit : *Vetustissima quæque editiones librum hunc Joanni Gersoni ascripsere ; ita vetus editio Mediolanensis & Veneta utraque anno 1488. & Parisiensis 1496.* Nam vir ille doctissimus non viderat editionem Argentoratensem anni 1487. nomine Thomæ inscriptam per Martinum Flach; multò minus celebrem illam vi-

derat editionem Zintheri anni 1471. aut etiam antè, ut suprà diximus.

Ex quibus etiam duabus editionibus, uti & ex Lugdunensi anni 1489. pater quàm sit illud verum, quod semel & iterùm tam confidenter repetit Delfavius, *Pirkamerum omnium primum libros de Imitatione palàm & ex instituto anno 1494. Thomæ asseruisse.*

CAPUT IV.

Respondetur argumentis quibus contendit M. S.S. Codices suos adversari Thomæ.

ENIMVERO hoc illud tandem est in quo sese longè, quàm in reliquis gloriosius jactant & ostentant adversarii, M. S.S. omnes Codices qui tum ab illis tum à nobis proferuntur, prorsus adversari Thomæ magnificentissimè prædicantes. Verùm omnis isthæc eorum tanta in his codicibus gloriatio an non uti & in cæteris hætenus sit fortasse levissima; primùm in suis, tum in nostris codicibus breviter expendamus?

rit, inquit, codex Monasterii Sancti Udalrici anno 1437. Sed hic Codex quid officit Kempensi, cum & nullum nomen præferat, & annis viginti & ampliùs post vulgatos à Thoma libros de Imitatione scriptus sit?

*instrum. 6.
parte 2.
sect. 1.*

2°. Codex Weingartensis anno 1433. " Et hic similiter anonymus est, & viginti & ampliùs annis post editos à Thoma libros de Imitatione.

3°. Codex Mellicensis anno 1434. & " alter 1421. Sed hi etiam anonimi, & " Thomâ longè posteriores.

4°. Codex Monasterii Sancti Jacobi " anno 1417. Demus hanc illi ætatem, " quamquam vel ipse Delfavius ait recentiori manu (fortè recentissimâ) hanc illi assignatam esse: non plus tamen nocet quàm cæteri, etenim & anonymus etiam est, & longè post Thomam.

5°. Codex Salburgensis anno 1463. " qui hanc inscriptionem præfert, Joan. " Gers. Sed hic etiam Codex longè post " Thomam scriptus est, neque Gersoni militat,

6°. Codex Monasterii Sancti Germani à Pratis anno 1460. cum hac etiam " inscriptione, Joannis Gersonis de Imi- "

„ tatione lib. 4. Sed hic etiam non plus
quàm superior Thomæ nocet, aut Ger-
seni favet.

„ 7°. Codex Gerardi Montensis cum
„ hac inscriptione: Hic liber conscriptus
„ fuit à fratre Ludovico de Monte, qui
„ obiit ante annum millesimum quadrin-
„ gentesimum. Nec vacat; nec, si vaca-
ret, prorsus liberet innumeras, quas, oc-
casione hujus codicis, nugas hîc conge-
rit adversarius, expendere. Hoc unum
dico: fatetur ipse paginâ 4. eadem om-
nia novem Opuscula in hoc codice
contineri, quæ in Antuerpiensi habent-
tur. Constat autem omnium autorum
fide, ea esse Thomæ Kempenis, nec
ab illo edita esse nisi pluribus annis
post annum quadringentesimum. Quî
igitur ipsum juvat suo & lectorum otio
tam intemperanter abuti, ut nugis &
puerilibus nescio quibus artibus quas
hîc refert, velit persuadere codicem
hunc scriptum esse ante annum qua-
dringentesimum à nescio quo fratre
Ludovico de Monte?

De aliis quinque Codicibus, Padoli-
ronensi inquam, Allatiano, Caveni,
Aronensi, & Flusensi, qui disertè fa-

vere Gerseni, & nomen ejus præferre dicuntur, commodiùs in tertia parte agemus.

C A P U T V.

*Respondetur argumentis, quibus contendit
M. S.S. Codices nostros adversari
Thomæ.*

CODICES eos qui à nobis proferuntur quod attinet, duos imprimis impugnant adversarii, Antuerpiensem & Augustanum à Mathia Farinatore Carmelitâ Theologo exscriptum.

In Antuerpiensi duo præcipuè momenta ait Delfavius expendenda esse, subscriptionem & ætatem. Illam Thomæ nomen exhibere, hanc annum referre 1441. ambasque res his verbis concludi: *Finitus & completus anno Domini 1441. per manus fratris Thomæ de Kempis*; neutram tamen autorem designare, utramque Thomam repudiare.

Atque ut à subscriptione, inquit, ordiamur, ea exscriptoris tessera est, non auctoris.

Centies jam à nostris responsum est

t. 2.
Dissert. in
instrum. 2.
p. 1. sect. 1.

scire nos ex hac subscriptione solâ non colligi horum librorum Thomam esse Autorem, sed istud sic facilè confici. Cùm enim constet reliqua novem Opusculâ, quæ cum his de Imitatione libris in hoc codice continentur, à Thoma ipso haud dubiè composita esse: cur de solis de Imitatione Christi libris dubitabimus? unde ruit quod de Bibliis ac Missarum libris addit?

» Verùm quærit, quibus tandem au-
» toribus ea Opuscula Thomæ asseran-
» tur? Respondemus, omnibus tum no-
» menclatoribus, tum editionibus, tum
» M. SS. codicibus, tum denique vetu-
» stissimis Bibliothecarum catalogis, ut
» in Sandero, Desselio, & aliis videri po-
» test.

Jam verò illius Autographi ætatem
» expendens, ait ipsum pro Archetipo
» agnosci à Thomæ Vindicibus, uti som-
» malio, Rosveido, & Canonicis Regu-
» laribus in editione anni 1651. Atqui si
» ita res habet, actum est, inquit, de
» causa Thomæ, siquidem præsto nobis
» sunt codices M. SS. qui annos referunt
» 1421. 1433. de quorum antiquitate
» præscribimus, vel teste Hefnero: ergo

si anno 1441. primum elucubratum «
opus à Thoma confingunt ejus vindices; «
suo ipforum calamo conficiuntur. »

Vides, Lector, quâ confidentiâ scri-
bat Delfavius Thomæ patronos auto-
graphum istud anni 1441. pro archeti-
po habere ex hismet quos hîc attesta-
tur, fidem ejus agnosce.

Heserus in dioptra Kempensi pag. 22.
*Autographum, inquit, Thomæ quo Antuer-
pia gloriatur, non est Archetipon; quod ta-
men nobis adversarii subdolè imponunt, est
extipon tantum. Denuò descriptum à Tho-
ma Kempensi, & completum anno 1441.
à quo multis annis antè, nempe anno 1410.
fuit compositum.*

Rosveidus cap. 7. *Scriptit quidem, in-
quit, Thomas anno 1441. hoc exemplar,
sed foriè annis aliquot antè composuerat, &
aliud exemplar scripserat, hoc etiam tan-
tùm vult Sommalius.*

Fronto in argumento à *Devotis* sum-
pto, *Existimo, inquit, ante annum Domi-
ni 1410. scriptum fuisse hunc libellum à
Thoma. Similiter & Canonici Regula-
res in editione 1651. cùm aiunt, Tra-
duit en François du Latin pris sur le ma-
nuscrit original de 1441. d'Heribert Ros-*

vide, pro autographo quidem habent, sed non pro archetipo.

Ex his habes egregium fidei Delfavianæ argumentum. Sed vin tu constantiæ ejus? habes eodem loco, cùm scribit, *equidem ocius*, inquit, *alia atque alia exemplaria à Thoma edita esse aiunt illi vindices Thomæ*; & in sectione 6. *Hesserus*, inquit, *libri natalem ad annum 1410. refert, alii ad annum 1412. Werilnus non multò post emissam professionem.* Quì ista cohærent & conveniunt cum eo quod mox tam asseverantèr aiebat, Thomæ vindices autographum Antuerpiense anni 1441. pro Archetipo seu omnium primo exemplari habere?

Sed hic insuper quantum etiam sibi ipsi & quàm prudenter in scribendo moderetur ac temperet, non obscurè apparet in eo quod subdit. Sed demus, inquit, hanc veniam ut dictum indictum sit, factum infactum, verum falsum, archetipum extipum; non erit quo impunè abeant (grandia ut vides nobis minatur) exemplar istud non autorem refert, sed exscriptorem, cùm iis mendis scateat, quæ nemo grammaticus admiserit, in prima sui operis desi-

gnatione, ne dum in postrema recogni-
tione. Possem hic ego erratorum miria-
des attexere. Neque verò ea errata,
sunt hominis in recta scribendi ratione
aberrantis, sed haud planè capientis
quid scriberet. Enim verò si hic vera
prædicat, nihil jam loci est spei. Occi-
dimus. Neque Codex ille posthac us-
quam est, neque nos qui illum autogra-
phum asserimus. Expecto tamen quid
velit, & quid tanto tandem parturiat
hiatu, ut patet, inquit, ex eo quod
habet *stips*, pro quo legendum erat
stirps; & ex aliis quamplurimis, quibus
totum opus commaculavit. At huccine
tandem tot & tam ingentes minæ?
Quid est, si non est hoc, *Parturient
montes, nascetur ridiculus mus*? Quàm
vercor, ut hic ipse Delfavius haud pla-
nè capere quid scribat à prudentibus
& modestis meritò existimetur? Qui
tales tragedias agit in nugis, & qui
propter unius vocolæ compendiarium
scriptionem exclamat & vociferatur, er-
ratorum miriadibus totum opus aliquod
commaculatum esse. Nihil hic prorsus,
nihil inquam erratum est, sed compen-
diariâ, ut dixi, scriptione à Thoma po-

fitum est *stips* pro *stipes* non pro *stirps*. Quod vel ex Cæterano, & Walgravio, & M. SS. aliis Codicibus faciliè potuit Delfavius edoceri, uti & ex Sommalio, qui diu in manibus Codicem hunc Antuerpiensem habuit. Monuitque dudum Thomam pro more scilicet ætatis suæ tot notis compendiisque in scribendo usum fuisse, ut paucæ in hoc autographo dictiones queant reperiri ab hujusmodi compendiis liberæ.

Non satis itidem prudenter facit, cùm pro erratis insignibus habet hæc alia.

1^o. Transpositionem libri de Sacramento Altaris, qui cùm jam nobis quartus sit de Imitatione Christi, in hoc Codice tertio loco ponitur. Nam tum ex multis aliis Codicibus qui ab illo proferuntur, tum ex variis editionibus faciliè potuit deprehendere, nullo certo, sed vario admodùm ordine diversis temporibus libros de Imitatione à Thoma editos esse. Et nisi in re jam vulgatâ quidquam immutari displiceret, hujus Codicis ordinem tanquam omnium optimum retinendum esse, utpote qui sit postremò tandem ab ipso autore

autore Thomâ scilicet institutus, qui quo liberet ordine potuit libros suos disponere.

2^o. Omissionem istam, nam lib. I. c. 13. post illum versum, *Principiis obsta, sero medicina paratur*, omittitur sequens ad sensum, inquit, omnino necessarius, *cum mala per longas invaluere moras*. Sed nullum etiam hic erratum esse, potuit rescire ex Aronensi Codice, ex Caven- si, & ex Padolironensi, quos tam ma- gnificè prædicat, in quibus tamen hic etiam versus desideratur. Immo: Cæ- tanus ipse & Walgravius in omnibus suis editionibus, ut minimè necessarium omiserunt. Adde in pervulgatis iis & jam tritis sermone proverbiiis multa etiam ad sensum necessaria vulgò prætermitti, unde ista, *Fortuna fortes, nemo pius est qui pietatem*, & sexcenta hujusmodi apud Tullium.

Atque istuc tandem erratorum mi- riades quibus totum opus Thomæ com- maculatum esse clamabat, reducuntur. Sed, inquit, *ea satis confessa sunt*, vel apud Thomæ patronos, Rosveidum nem- pe c. 19. sed en etiam alterum fidei Del- favianæ argumentum. Nam hoc loci

contrarium prorsus de hoc Codice scribit Rosveidus. Hæc enim sunt ejus verba: *Liber noster Antuerpiensis tam accuratè ab autore scriptus est, ut ne litterulâ quidem aberrarit.*

Sec. 3.

Quod Augustanum Codicem à Mathia Farinatore non ignobili Carmelita Theologo exscriptum attinet, tum in primâ, tum in secundâ suâ editione solitâ & effusâ loquacitate suâ multa, ut
 „ fidem ejus elevaret, effutiit; nempe fa-
 „ bulas hac in parte fabulis à nobis ait
 „ congeri, magnificisque verbis magis
 „ quàm veris quæ à nobis afferuntur,
 „ enarrari.

Verùm ego semper magis magisque miror singularem istius hominis confidentiam. Quas enim hîc fabulas fabulis à nobis congeri comminiscitur? An quod asserimus tabulas hoc de Codice publicas extare? At à nobis si è re sit possunt exhiberi. An quod affirmamus Codicem hunc inter alia opuscula libros etiam de Imitatione continere; eosque nomine Thomæ inscriptos? At utrumque hæc tabulæ testantur. An quòd à Mathia Farinatore exscriptum Codicem dicimus? At pagella quæ ag-

glutinata est asserculo id testificatur. An
denique quòd volumus Mathiam Farina-
torem anno 1477. vixisse? At istud
de seipso refert, cùm scribit se anno 1472.
libellum *de Amore librorum* Richardi de
Buri Episcopi Dunelmensis, & Solilo-
quium Hugonis *de discretione & animâ*
anno 1477. exscripsisse. Eccui autem de
ejus ævo certius quàm ipsi credi potest?

Sed, inquit Delfavius, exscripsisse
Mathiam Farinatorem librum de Imi-
tatione, id quidem verum; inscripsisse
autem Thomæ de Kempis nullus po-
tuit. Atqui inquam utrumque eodem
constat testimonio; aut igitur utrumque
simul labat, aut utrumque simul, ve-
rum est.

Sed Mathias, inquit, Thomam ætate
longè præcessit, erat enim Joanni 22.
ob egregias animi dotes imprimis carus,
& anno circiter 1300. natus; hinc Sim-
lerus ait ipsum floruisse anno 1330. Ita-
rùm repeto: eccui de ætate hujus Theo-
logi certius quàm ipsimet credi potest
& debet? Atqui testatur se vixisse &
exscripsisse Codicem de quo agitur an-
no 1477. Quì igitur natus dicitur anno
circiter 1300?

contrarium prorsus de hoc Codice scribit Rosceidus. Hæc enim sunt ejus verba: *Liber noster Antuerpiensis tam accuratè ab autore scriptus est, ut ne litterulâ quidem aberrarit.*

Sec. 3.

Quod Augustanum Codicem à Mathia Farinatore non ignobili Carmelita Theologo exscriptum attinet, tum in primâ, tum in secundâ suâ editione solitâ & effusâ loquacitate suâ multa, ut
 „ fidem ejus elevaret, effutiit; nempe fa-
 „ bulas hac in parte fabulis à nobis ait
 „ congeri, magnificisque verbis magis
 „ quàm veris quæ à nobis afferuntur,
 „ enarrari.

2. Verùm ego semper magis magisque miror singularem istius hominis confidentiam. Quas enim hîc fabulas fabulis à nobis congeri comminiscitur? An quod asserimus tabulas hoc de Codice publicas extare? At à nobis si è re sit possunt exhiberi. An quod affirmamus Codicem hunc inter alia opuscula libros etiam de Imitatione continere, eosque nomine Thomæ inscriptos? At utrumque hæc tabulæ testantur. An quòd à Mathia Farinatore exscriptum Codicem dicimus? At pagella quæ ag-

glutinata est asserculo id testificatur. An
denique quòd volumus Mathiam Farina-
torem anno 1477. vixisse? At istud
de seipso refert, cùm scribit se anno 1472.
libellum *de Amore librorum* Richardi de
Buri Episcopi Dunelmensis, & Solilo-
quium Hugonis *de discretione & animâ*
anno 1477. exscripsisse. Eccui autem de
ejus ævo certius quàm ipsi credi potest?
Sed, inquit Delfavius, exscripsisse
Mathiam Farinatorem librum de Imi-
tatione, id quidem verum; inscripsisse
autem Thomæ de Kempis nullus po-
tuit. Atqui inquam utrumque eodem
constat testimonio, aut igitur utrumque
simul labat, aut utrumque simul, ve-
rum est.

Sed Mathias, inquit, Thomam ætate
longè præcessit, erat enim Joanni 22.
ob egregias animi dotes imprimis carus,
& anno circiter 1300. natus; hinc Sim-
lerus ait ipsum floruisse anno 1330. Ita-
rùm repeto: eccui de ætate hujus Theo-
logi certius quàm ipsimet credi potest
& debet? Atqui testatur se vixisse &
exscripsisse Codicem de quo agitur an-
no 1477. Quì igitur natus dicitur anno
circiter 1300?


” Sed, inquit, hæc Chronologia con-
 ” stat ex Posslevino, qui de Farinatore sic
 ” narrat: *Joannis 22. jussu digessit librum*
 ” *moralitatum, quem prenotavit lumen anime*
 ” *fidelis*. Et ex Simlero, qui subjungit:
 ” *Clarnit anno Domini 1336. 10 mi sunt duo im-*
 ” *pressi 1477.* Posslem & iterum hac conten-
 tus esse responsione. Eccui certius de ævo
 Farinatoris, quàm sibi, potest credi?

Sed ecce facile demonstratur Simle-
 rum hac in re longè animi falsum esse:
 quod ex eo constat, quòd nullus auto-
 rum qui ipsum antecessère, quique de
 illustribus Ordinis Carmelitarum viris
 scripsère, cujusmodi sunt Trithemius,
 qui anno circiter 1493. de iis librum
 edidit; Arnoldus Bostius, qui eodem
 anno; Laurentius Burellus qui anno
 1494. Gesnerus qui anno 1545. scribe-
 bant, tale quidquam de Mathia Fari-
 natore narraverunt. Similiter nec ullus
 Simlero coævorum, quales sunt Jaco-
 bus de plebe, qui anno 1590. Petrus
 Lucius qui anno 1593. nec denique co-
 rum ullus qui postea scripserunt, ut Lü-
 dovicus Jacob nostrâ ætate cum Simle-
 ro hac in Chronologiâ conveniunt.
 Nullus, inquam, eorum Farinatorem

anno 1330. floruisse dixit. Nullus sub Joanne 22. vixisse; nullus libri moralitatum autorem eum ausus est asserere; sed contrà solum digessisse omnes ad unum dixere, & plerique anno dumtaxat 1477. ipsum vixisse asseruerunt.

Causa erroris Josiæ Simlero hæc fuit, quòd legisset: *Hunc librum moralitatum à Mathia Farinatore editum anno 1477. jussu Joannis 22. Pontificis maximi, lumen animæ dictum fuisse.* Unde statim opinatus est Mathiam igitur temporibus hujus Pontificis vixisse, & anno 1300. floruisse. Cùm tamen contrarium disertè innuat Farinator in Præfatione suâ. Hæc enim sunt verba ejus: *Liber moralitatum jussu Joannis Pontificis maximi lumen animæ dictus, quem post diutinam occultationem, cùm adhuc informis esset, simplicioribusque rudis & obscurus appareret; frater Mathias Farinatoris de Vienna sacri Ordinis Beata Dei Genitricis & Virginis Mariæ de Monte Carmeli Lectorum Sacrae Theologiæ minimus in titulos, & titulos in paragraphos distinxit; moralitates omnes pariter naturales per binas tabulaturas consignans, & editus est anno 1477.* Quibus profectò verbis perspicuum est, falli, & fal-

lere eos qui putant Mathiam Farinato-
rem ævo Joannis 21. aut 22. Pontificis
Maximi floruisse, cùm id dumtaxat in-
telligendum sit de primo autore operis
anonimo, non de Farinatore, qui tan-
tùm digessit illud & edidit, quique
cùm in hac suâ præfatione dixerit, se
post diutinam occultationem opus istud di-
stinxisse, non obscurè insinuavit longo
se tempore, post sæculum autoris il-
lius anonimi & Joannis ipsius 22. cujus
jussu liber ille *Lumen animæ* dictus est,
vixisse. Atque in hanc porrò sententiam
vel ipse Josias Simlerus testatur se ma-
gis propendere, cùm tandem in fine
scribit : *Videtur Mathias Farinator non*
autor libri esse, sed solùm in titulos distin-
xisse. Quod idem refert Possevinus, qui
propterea non dixit cum Simlero flo-
ruisse Farinatorem anno 1300. sed ad
Lucium remittit, qui Lucius hac de re
nihil etiam certi statuit.



CAPUT ULTIMUM.

*Solvuntur rationes quibus ait librum ipsum
adversum Thomam sese vindicare.*

PRIMò, opponit stilum, hominem ^{1. & 2.} Italum non Germanum referre, ut ^{Edit. 1. p.} testantur, inquit, hæ voces, *Großè, passionatus, bassari, contentari, sentimenta.* ^{JeH. 6.}

Sed ecce tibi easdem omninò voces in aliis operibus Thomæ & Buschii, hominum haud dubiè non Italarum, sed Germanorum. Thomas in Chron. Montis Sanctæ Agnetis c. 4. *Grossus erat cibus.* Idem serm. 5. p. 2. *Homo superbus est passionatus intrinsecus.* Buschius lib. 2. c. 26. *Gerardus Delf. bassus fuit in seipso, & altus in Deo.* Thomas in vita Gerardi Magni c. 11. *Uno prandio contentari consuevit.* Buschius l. 2. c. 27. *Vera devotio non in sentimentis dulcedinis consistit.*

2º. Autorem ait librorum de Imitatione l. 3. c. 56. Monachum se profiteri. Thomam verò nusquam se suosque Monachos indigitare; quin è contra

„ Clericos Regulares à Monachis passim
 „ dirimit.

Sed si vel levissimè in operibus Thomæ versatus esset, non tam præceps ejus judicium esset de rebus nullomodo sibi perceptis. Primò enim comperisset sæpissimè Thomam suos appellasse Monachos. Sic opusc. 11. *Monache, ad quid venisti? Quare mundum reliquisti? Cur Cappam istam induisti?* Monachum illum fuisse Canonicum Regularem manifestum fit, vel ex voce illa *Cappam*, hæc enim pars est habitus Canonicorum. Et in serm. ad Novitios suos serm. 40. *Frater Monache;* & tertia parte serm. 1. *O Religiose Monache.* Sexcenta prætereà sunt loca alia. Et quid etiam aliud indigitant hæc ejus opuscula, *de vita boni Monachi, Alphabetum Monachorum, &c.* Immo suos quos Buschius in vita Joannis Cele præstantes viros dixerat, cum scriberet: *Quæ religio in tota regione reformata præstantes viros ex ejus Scholaribus se recepisse non gloriatur? Præsertim Regulares Benedictinenses, Carthusienses, Cruciferi, & Cistercienses,* hos Thomas Monachos appellavit: *Quæ Religio,* inquit, *vita vel nomine clara ex scholaribus ejus Mo-*

nachos non habuit, præcipuè tamen Regulares cum Cisterciensibus ? 2º. Comperisset equidem Thomam Clericos à Monachis sæpè dirimere ; sed se turpissimè errare, qui opinetur ipsum se suosque nomine Clericorum intellexisse, non verò Monachorum. Cùm contrà potiùs se suosque sæpissimè nomine Monachorum & vix ac ne vix quidem nomine Clericorum intelligat : Clerici enim à Canonicis Regularibus æquè ferè ac à Monachis apud Thomam & Buschium mille locis distinguuntur. Etenim apud illos autores Clerici sunt Scholares, & Clerici Regulares ; seu fratres Clerici ii sunt, qui vel in Congregationibus Devotorum Daventriæ Zwollis & alibi passim à Gerardo magno & Florentio institutis, vivebant, aut in Monasteriis Canonorum Regularium plures annos antequàm sacris Canonorum initiarentur, agebant ; qui status eorum appellabatur, Clericatus & proba. Et profectò ubinam unquam in his autoribus legit : Talis investitus est in Clericum Regularem, ut indicaretur eum Canonicum Regularem factum ? An non è contrà millies occurrit : Talis Clericus investitus est habitum Ca-

nonicorum Regularium ? Unde in Chron. Montis Sanctæ Agnetis c. 6. Clerici qui nondum habitum ordinis assumpserunt, isti fuerun Wicoldus, Joannes Daventriensis, Joannes Kempis, &c.

» 3^o. Opponit eo sæculo quo editus est
 » liber de Imitatione, ordines monasti-
 » cos, imprimis verò Cistercienses, exi-
 » miâ vitæ sanctitate orbi præfulsisse; cùm
 » contrà sæculo decimo quinto quo Tho-
 » mas effloruit, vix ulla priscae institutio-
 » nis vestigia in Monasteriis superessent;
 » nec propterea potuisse ipsum scribere,
Attende Carthusienses & Cistercienses & di-
versa religionis Manachos & Moniales lib.
1. cap. 25.

Nescio profectò quibusnam præcipuè scripserit Delfavius, suis dumtaxat an etiam aliis. Sed quibuscumque opus suum destinavit, istud certè in illo hætenus sæpiùs animadverti non posse lectorum suorum facilitate ac fide immoderatiùs quemquam ipso & illibera- lius abuti. Quòd cùm ex pluribus antehac visum sit; tum verò ex illis quæ hic ait, evidenter apparet. Ecce enim vult anno 1410. sive ineunte sæculo 15. quo florebat Thomas vix ulla priscae in-

stitutionis vestigia in Monasteriis Germaniæ inferioris superfuisse. Nec propterea potuisse ipsum scribere, *Attende Carthusienses & Cistercienses, & diversæ Religionis Monachos & Moniales, &c.* Cùm contrà in regionibus iis in quibus agebat Kempensis, & de quibus tantùm hîc igitur, in ditione nempe ac Diocesi Trajectensi nunquam magis eximiâ quàm ineunte hoc sæculo, ordines Monastici, imprimisque *Carthusienses & Cistercienses, ac Monialium domus* vitæ sanctitate orbi Germanico præfulserint. Soli quippe Mendicantium ordines defecerant, qui Monachorum nomine non comprehenduntur.

An non enim tunc temporis Trajectensem Ecclesiam per totos triginta annos ab anno 1394. ad 1423. rexit eximius ille præsul Fredericus de Blankenkem? virtutum suarum famâ Apostolicis antistitibus haud impar: *Fuit enim, inquit Thomas, Columna Sacerdotum, Stella Clericorum, Pater Religiosorum, optimaque fuit in diebus ejus dispositio Trajectensis terræ. Elucebat honestas in Prælati, pietas divini cultus in Presbyteris, devotio in Religiosis, castitas in Virgi-*

nibus. *Et sic actis suis mirificis tempora sua decoravit, ut tunc Trajectensis patriæ aurea sæcula viderentur.*

An non etiam sub fine sæculi decimi-quarti in eadem provinciâ Trajectensi Gerardus Grootius, vir sæculorum omnium memoriâ dignus, & ingenti virtutum ac prædicationum suarum famâ ac miraculis *magnus* meritò appellatus extitit, quem, ut ait Buschius, *divina Providentia senescente mundo in extremis penè terra finibus, velut ingens quoddam lumen cælitus accenderat, quo mentes hominum divinitus illustraret, & frigescentia corda calore charitatis vehementer inflammaret: prædicationibus enim suis ferventissimis, tanta in his regionibus immutatio facta est, ut in diversis civitatibus, oppidis & villis plures Presbyteri, Clerici, Virgines & viduæ, viri & fæmina patriæ celestis amore, parentes, fratres, cognatos, amicos, prædia, possessiones, & omnia quæ in hoc mundo habebant, libentissimè reliquerint, & Domino nostro Jesu Christo pro ipsis egenis egendò factò, in verâ obedientiâ, castitate & paupertate, more fratrum & sororum devotarum congregationum in Daventria, perpetuò deservire in*

Lib. 1. de origine mod. devot. cap. 1.

toto corde concupierint. Et cap. 5. Vir venerabilis, inquit, Deo & hominibus valdè dilectus Gerardus Magnus, totam penè Diœcesim Trajectensem partesque circum vicinas ferventissimâ suâ prædicatione & aquâ sapientiæ salutaris verbis & exemplis multis odoribus virtutum irrigavit, illuminavit & accendit: ita ut quamplures in locis diversis Presbyteri, Clerici, Laici, Virgines & Viduæ vestigiis & doctrinæ ejus inherentes, ad communem vitam & perfectionem conversationis Apostolicæ totis præcordiorum suorum affectibus vehementer aspirarent.

An non tunc temporis Zwollis sub inclito illo Joanne Cele ab anno circiter 1380. ad 1417. & Daventriæ sub Florentio virtutum ac bonarum artium studia tam egregiè vigeabant, ut ex his duabus scholis innumeri viri præstantissimi, egressi, Religiosorum Ordinum Monasteria posthac passim impleverint? Unde Buschius & Thomas in vita Joannis Cele de schola Zwollensi: *Quæ Religio, inquit, in totâ regione Trajectensi reformatâ vitâ & nomine clarâ viros præstantes & Monachos ex ejus scolaxibus se recepisse non gloriatur, præsertim Regulares*

Benedictinenses, Carthusienses, Cruciferi, & Cistercienses, non paucos ex discipulis sui ordinis professores habuere, qui in virtutum exercitiis & veris scientiis in tantum profecerunt, ut quidam eorum Monasteriorum Abbates, Præpositi, Priores, Ecclesiarumque Rectores postmodum sint effecti. Egregia laus magistri tot laudum præcones, quem vita probata tot Monachorum ubique laudat & commendat. Et de schola Daventriensi, Ardentissimus Amator Christi Florentius, inquit Thomas in ejus vita cap. 27. Cui Christus vivere erat, & mori lucrum, desiderans fructum facere in tempore suo, maximam operam dedit, multis prodesse ad æterna salutis regnum, suadens hunc miserum & caducum spernere mundum. Misit ergo plures personas ad diversa Monasteria. Sacer Ordo Carthusiensium nec non Cisterciensium Sanctique Benedicti viros habet mihi non ignotos, qui Florentium, cum Daventria frequentarent, videre & audire meruerunt, & me veram dicere comprobabunt. Fueruntque eodem tempore plures devoti Sacerdotes in Diœcesi Trajectensi, qui Religiosos conventus sive fratrum sive sororum strenuè gubernare noverant.

An non denique hac etiam ætate
floruerunt multa Tertiariorum Mona-
stera, & plurimæ Monialium domus?
Unde Buschius lib. 1. cap. 2. *Tunc*, in-
quit, sub fine scilicet sæculi 14. & in-
eunte sæculo 15. *Omnes per istam Pro-*
vinciam Trajectensem devotarum sororum
Congregationes & in pluribus civitatibus
Sanctimoniales & Regularissarum Mo-
nasteria sanctæ Observationis & fervoris
originale sumpserunt exordium, quod usque
hodie servant. Et infra: *Harum Congrega-*
tionum utriusque sexus aliquas in tertiam
Sancti Francisci Regulam & ordinem vidi-
mus translatas, numerum centenarium ex-
cedentes in vera obedientia, humilitate,
simplicitate, carentia proprii & continentia,
& in Regula Christi charitate fideliter Deo
servientes.

Verum tunc temporis inter hos om-
nes Religiosos Ordines præcipuè flore-
bant *Carthusienses & Cistercienses*, unde
apud Buschium lib. 1. cap. 5. Gerardum
Magnum discipuli interrogant: *An Or-*
dinem Carthusiensem in his partibus refor-
matum, an Cisterciensem inter cæteros post
Carthusienses Religiosorem deberent assu-
mere?

Quæ cum sint ita, patet quàm sit falsum quod ait Delfavius sæculo decimo-quinto ineunte, id est anno 1410. quo Thomas effloruit, vix ulla priicæ institutionis vestigia in Monasterijs superfuisse, nec potuisse Kempensem scribere, *Attende Carthusienses & Cistercienses & diversæ Religionis Monachos ac Moniales.*

- pag. 82. „ Sed hæc eminus, inquit, rem attinent, nunc, cominùs ut agamus, comparandus est ipse autor cum Thoma Kempensi : certè quisquis ille tandem fuerit, qui eximio hoc libello Religionem illustravit, homo erat multò spiritualium rerum usu detritus, cui non solùm spectata inter bonos morum integritas, sed vel cana senectus, aut dignitatis amplitudo auctoritatem conciliaverat. Patere ergo ut Thomam quantum quantus fuerit proprio penicillo depingamus. Fuit is scolaris Daventriensis, qui scribere ac legere utcumque noverat vitæ spiritualis adeo rudis, ut nisi post exactum toto sexcentio ob animi levitatem aut tarditatem, quod non obscure innuit Badius, tirocinium nuncupandis votis idoneus non fuerit. Et quia
- pag. 84. „

quia hæc admodum ipsi placent, & istis egregiè animus ejus pascitur : hæc eadem repetens. Qui, inquit, ætatis suæ “ anno 30. ut potuerit per ætatem, certè “ non potuit per usum, non per crudi- “ tionem, non per ingenium, homo rudis “ scribendi legendique dumtaxat peritus : “ immò librarius & libellio ita præclarus, “ ut miriades erratorum intexeret in suis “ operibus, quæ nemo Grammaticus ad- “ miserit. Non in rectâ tantùm scribendi “ ratione aberrans, sed haud planè ca- “ piens quid scriberet. Qui hac ætate nec- “ dum in sanctiore militiâ meruerat : nisi “ fortè cum divino numine afflatum com- “ minisci velint. Sed istud intestatum “ cùm sit, nullam fidem apud cordatos ob- “ tinere debet. Nonnulla quidem Opus- “ cula reliquo vitæ suæ tempore compo- “ suit, quæ si cum illo comparentur, fri- “ gida, jejuna, atque exanguia videri “ possunt. “

Enimverò hoc etiam adversario ad infelicitatis & imprudentiæ cumulum restabat : ut pientissimi ac Religiosissimi Thomæ Kempensis memoriam bonorum omnium quotquot hætenus trium penè retrò sæculorum ævo extiterunt

laudibus celebratam, ipse primus & unus contumeliis ac probris oneraret. Hic ille nimirum quorundam hominum, quod ex Augustino discimus, mos est ut à veritate deserti, ad maledicta & convitia convertantur. Quasi convitiando facturi essent ut haberent causam bonam: interest ut singula discutiamus.

1^o igitur ait colligi autorem librorum de Imitatione, quisquis ille tandem fuerit, *canâ senectute, aut amplâ Abbatis dignitate venerandum fuisse*. Sed certè non immeritò quis addubitare possit, an libri de Imitatione unquam ipsi lecti sint. Nam disertè autor illorum multis in locis testatur, ut suprà vidimus 1. parte cap. ultimo, & se sub Prælati dominio constitutum, ne dum Abbas esset, & juvenem admodum fuisse cùm hos libros scripsit. Instar omnium sit unus aut alter locus ex his quos suprà adduximus. Sic itaque lib. 3. c. 32. ipsum Dominus alloquitur: *Utinam sic tecum esset, & ad hoc pervenisses, ut tu ipsius amator non esses, sed ad nutum meum purè stares, & ejus quem tibi præposui patris.* Et cap. 49. *Quia non audes resistere al-*

tiori potestati sub dominio constitutus, ideò durum tibi videtur ad nutum alterius ambulare. Denique lib. 4. cap. 5. n. 2. seipsum autor alloquens: *Attende tibi, & vide, inquit, cujus ministerium tibi traditum est per impositionem manus Episcopi: ecce Sacerdos factus es; vide nunc ut fideliter in suo tempore sacrificium offeras; non alleviasti onus tuum, sed arctiori jam alligatus es vinculo discipline.* Quibus clarè significat se tunc temporis, cum recens Sacerdos consecratus esset, quartum hunc suum & ultimum, qui de Sacramento Altaris est & Sacrificio Missæ, librum composuisse.

2º. Adeo vite spiritualis rudem fuisse ait Thomam, ut nisi post exactum toto sexcentio tirocinium nuncupandis votis idoneus non fuerit, ob animi levitatem, aut tarditatem, ut non obscure innuit Badius. Equidem autorem anonimum, eam fuisse Cœnobii Montis Sanctæ Agnetis consuetudinem existimasse, ut sic, id est per annos sex, Novitii probarentur. Sed huic sententiæ adversari ipsum Thomam in Chronico suo cap. 10.

Immodò aded ipse rudis fuit eorum quæ scripsit; ut haud sciam an quisquam

magis esse possit. Ubinam enim toto sexcennio Novitium egisse Thomam legit? Autores enim omnes, & ipse scilicet Thomas & Continuator & Anonimus unum dumtaxat annum in tirocinio ipsum posuisse testantur. Verum opinatur, cum ait Anonimus, *tunc temporis fuisse consuetudinis, quod sic probarentur*, intelligendum esse de Novitiatus (ut nunc loquimur) probatione. Cum ex his quæ addit *antequam investirentur*, aperte significet de tempore quod investitionem antecedit id intelligendum esse: & reverà tunc temporis id moris fuisse, potuit edoceri exemplis Buschii, Gerlaci, immò & Oerberti, qui cum Thoma investitus est; qui omnes plures annos inter Clericos in Windesem & in Monte Sanctæ Agnetis probati sunt, *antequam inter Canonicos initiarentur*. Quod ait de Badio, more suo, doctissimo viro imponit: hæc sunt enim verba Badii de Thoma Kempensi in ejus vita cap. 12. *Acceptis à Florentio litteris optimus adolescens, ad Montis Sanctæ Agnetis Monasterium advolavit. Prior autem lectis litteris ingenti gaudio est intus quidem affectus, quia & puerum noverat, & sciebat*

neminem à Florentio temerè commendari. At quamvis in omnibus morigerum & ad Religionem aptissimum Thomam comperiret, illius tamen professionem sexcennium distulit, sive quòd tunc cavebant quemquam ad ignotarum rerum vota astringere, sive quòd adolescentem volebat per omnia probare.

3^o ait, ut potuerit per aetatem libros de *Imitatione Christi* anno aetatis 30. componere, non potuisse per usum. At sciret jam ab annis quindecim & ampliùs in vitâ spirituali tum in domo Florentii, tum in Monte Sanctæ Agnetis egregiè Thomam hac ætate exercitatum fuisse; sciret quòd libro 1. cap. 4. dicitur: *Bona vita facit hominem sapientem secundum Deum & expertum in multis*, Thomamque nostrum, ut ab autore vitæ ejus refertur, tantæ morum integritatis & innocentiae ab adolescentiâ suâ, tamque eximiae pietatis & virtutis semper fuisse, ut propterea ipsum omnes præcipuè mirarentur; sciret quòd dicitur l. 3. qui est de internâ Christi locutione ad animam fidelem cap. 1. *Beata anima, quæ Dominum in se loquentem audit. Beata aures, quæ venas divini susurri suscipiunt,*

& de mundi hujus susurrationibus nihil advertunt. Beate planè aures, quæ non vocem foris sonantem, sed intus auscultant veritatem docentem. Et quod cap. 43. ad discipulum suum ait Dominus : Ego sum qui doceo hominem scientiam & clariorem intelligentiam ; parvulis tribuo quam ab homine possit doceri. Cui ego loquor, citò sapiens erit, & multum in spiritu proficiet. Et n. 3. Ego sum qui humilem in puncto elevo mentem, ut plures æternæ veritatis capiat rationes, quàm si quis decem annis studuisset in scholis. Sciret, inquam, hæc omnia, Thomamque nostrum unum præcipuè ex his æternæ veritatis intus docentis discipulis extitisse : quemadmodum Religiosi omnes Montis Sanctæ Agnetis, qui cum illo diu vixerant, his verbis testati sunt : Iste bonus pater solitus erat dicere, quando fuit cum conventu, quando sensit inspirationem divinam, quando sponsus ejus Jesus voluit loqui cum sponsâ animâ ejus, tunc humiliter petiit licentiam dicendo, fratres, oportet me ire ; unus me expectat in cellâ ; & quid tunc loquerentur ad invicem, habemus in tractatu ejus de internâ Christi locutione ad animam fidelem, qui jam liber est tertius de Imita-

tionē Christi. Sciret denique multos alios Canonicos Vindesemenſes Thomæ noſtro coævus & ſuppareſ, Joannem ſcilicet de Hueſden, Gerlacum, Mauburnum, &c. etiam tum cū ipſo juniores eſſent, & nondum annorum 30. multo rerum ſpiritualium uſu detritos fuiſſe, & pluribus, iisq̃ue eximiis operibus, Eccleſiam ac Religionem ſimiliter illuſtraſſe.


4°. *Non potuiſſe ait, etiam per ingenium, neque per eruditionem; immò, inquam, his maximè potuit, nam & à Trithemio commendatur Thomas noſter ut præſtans ingenio, & ſtudioſus & eruditus in ſcripturis; à Langio vir Angelicæ doctrinæ appellatur.* Et refert Anonymus illum proptereà à Florentio ejuſque fratribus præ cæteris omnibus unicè dilectum fuiſſe, quòd *ingenio & bonarum artium ſtudio* reliquis longè antecelleret.

5° ait, *nonnulla quidem reliquo ſuæ vitæ tempore composuiſſe opuscula; ſed quæ frigida, jejuna, atque exanguia videri poſſint.* At ut plures omittam, non ita videbatur vel ipſi Caietano, qui in Apologia ſua pag. 118. *Cætera, ait, benè mul-*

ta Thomæ Kempensis opuscula excellentis esse doctrinæ, pietatis eximie, summaque notæ. Qui in App. suo p. 6. Kempensem ait eximiè prædicandum, ut inter Asceticos principem virum multis nominibus doctissimum & clarissimum. Non ita denique videbatur trium illorum Christianæ pietatis, ut verbis Badii dicam, & religiosæ observationis ordinum proceribus, RR. nempe PP. Benedictinis Divi Germani à Pratis Parisiensibus, Carthusianis, & Celestinis; qui sæpissimè convenerunt Badium anno 1523. suo quique jure obnixè postulantes, ut pietissimi & optimæ memoriæ Religiosi fratris Thomæ Kempensis opera melliflua, & ad veram Religionem maximè conducentia, prælo suo iterùm divulganda committeret; utpote qui nihil hoc sanctius, nihil religiosius, nihil denique Reipublicæ Christianæ utilius fieri posse existimarent.

Factum itaque ab adversario contra sensum & existimationem bonorum omnium quotquot hætenus extiterunt, cum ab illo scriptum est, Thomam Kempensem sic proprio penicillo posse depingi: *Scolaris Daventriensis, qui scri-*

bere ac legere utcumque noverat. *Vitæ spiritualis adeo rudis, ut nisi post exactum toto sexcentio ob animi levitatem aut tarditatem tirocinium, nuncupandis votis idoneus non fuerit. Qui anno trigesimo ut potuerit per ætatem libros de Imitatione componere; certè non potuit per usum, non per eruditionem, homo rudis scribendique dumtaxat peritus. Immo librarius & libellio ita præclarus, ut miriades erratorum in suis operibus intexeret, quæ nemo Grammaticus admiserit, neque verò in recta tantum scribendi ratione aberraret, sed haud planè caperet quid scriberet. Neque quisquam est, opinor, qui non videat hæc Augustini verba ad præfervidi spiritus juvenem quemdam, à quo, cùm eum rationes deficerent, probris & contumeliis oneratus fuerat, à Thoma etiam Kempensi adversum illum usurpari posse. Libris tuis apparet te* *Aug. contra*
contra libros meos non invenire quid dicas, Int.
& querere calumnias, quas nobis loquaciter & inaniter ingeras. Sed convitiare quantum potes, quis enim malus hoc non potest?





PARS TERTIA.

JOANNEM GERSENEM
de Canabaco librorum de Imitatione
Christi non esse autorem.

CAPUT I.

NULLUM TOTIS QUADRINGENTIS
annis testimonium extare Joannem Ger-
senem de Canabaco in humanis unquam
& usquam egisse.

INVITI admodum, quod fatendum
est, partem hanc operis ultimam ag-
gredimur. Cum enim demonstrandum
suscipimus Joannem Gesenem, aut Gesse-
nem, vel Gersenem, qui enim ipsum no-
minaret non satis sciebat parens ejus
Caietanus; oriundum de Canabaco, vel de
Cavagliâ, aut de Gessate, neque enim
unde genus & patriam ipsi assignaret
plus sciebat; Abbatem denique vel Sancti
Petri in Villulâ Mulegii (ita enim pri-

mum confingebat) vel *Sancti Stephani Vercellensis*, ita namque postea commentus est : cum , inquam , demonstrandum suscipimus personatum Abbatem istum non esse librorum de Imitatione Christi autorem ; perinde sanè nobis accidit ac si serio , quæ jocos dumtaxat excipienda sunt , agere juberemur ; vel si fabulam refellere , aut demum adversum larvam aliquam depugnare cogermur. Quod profectò nonnisi otiosorum , & otio suo intemperanter abutentium , negotium esse posse nemo non novit. Nobis itaque , quibus non licet esse tam otiosis , neque verò si liceat , unquam libeat bonas horas in nugis talibus terere ; judicabit lector quàm sit ingratum , & omninò molestum partem hanc operis aggredi. Utcumque tamen consistendum est ; & quandoquidem magno apparatu ab adversariis ista de Gersene fabula adornatur , paucis proponendum , quibus viribus choragium ejus omne facilè disturbetur.

Primum adversum istam de Joanne Gersene fabulam argumentum est , neminem unquam prorsùs ante Caietanum , quem pro fabulatore plerique

omnes ætatis nostræ viri docti, Naudeus inquam, Leo Allatius, Chiffletius, Petravius, & innumeri alii habuerunt, istius Gerseni de Canabaco meminisse. Ut enim omitram Conradum Gesnerum, Josiam Simlerum, Aubertum Mirreum, & plures alios, qui de Scriptoribus Ecclesiasticis indices texuere, in quibus omnibus altissimum est de Joanne Gersene silentium; eosque dumtaxat commemorem, quorum imprimis intererat istius hominis, siquidem unquam & usquam extitisset, mentionem facere.

Certè non Trithemius Abbas Benedictinus, qui de illustribus sanctitate & doctrinâ viris Ordinis Sancti Benedicti quatuor libros instituit, ejus usquam meminit.

Non Arnoldus Wion, & ipse Monachus Benedictinus Congregationis Cassinensis, in suo ligno vitæ in quinque libros diviso, in quibus viri ex Ordine Sancti Benedicti virtute & scientiâ illustres describuntur.

Non Petrus Calzolaus, seu Ricordatus, & ipse Monachus Benedictinus, qui in Historiâ suâ Monasticâ in quin-

que dies dispertitâ, de Monachis illustribus Ordinis Sancti Benedicti amplè & copiosè differuit.

Non Franciscus Augustinus ab Ecclesiis in Catalogo Scriptorum Sabaudia & Pedemontanorum, quorum Vercellæ civitas est, in qua civitate volunt Gersensem fuisse Abbatem Sancti Stephani.

Non Ughellus in tomo 4. Italiae Sacrae, in quo Tomo Vercellenses Episcopos & Abbates, qui doctrinâ & pietate inter reliquos unquam excelluere, diligentissimè recenset; non inquam Joannis Gersenis Abbatis Sancti Stephani in civitate Vercellensi usquam meminit.

Non denique toto illo quatuor sæculorum ævo, ex quo hominem istum Joannem Gersensem extitisse volunt adversarii, autor ullus hætenus aut reperiri potuit, aut inveniri, qui de Joannis istius Gersenis nomine, natalibus, genere, parentibus, & patriâ aliquid testatus sit. Licet abhinc septuaginta annis, nullis in hac causa RR. PP. Benedictini sumptibus pepercerint, nullas propterea provincias non adierint, nullum ex eruditis & antiquitatis peritis viris

quâ prece, quâ pecuniâ ad suas partes non sollicitaverint.

2. Argumentum est nullam abhinc ducentis annis, ex quo Ars Typographica adinventata est, ad nostram ætatem & Caetanum usque editionem nomine Gerseni evulgatam esse.

3. Est M. SS. Codices qui in causâ Gerseni hæctenus ab adversariis exhibiti sunt falsi non immeritò, quod mox videbimus, semper accusatos esse, & ut vitiatos ac corruptos, damnatos esse.

4. Denique argumentum inde desumitur quòd liber ipse de Imitatione Christi Gerseni isti, quem & Italum & Abbatem anno 1220. fuisse confingunt, æquè penè ac lux meridiana tenebris adversetur. Cùm 1^o autor ejus tot quibus abundat Flandricismis, ut ita dicam, disertè se Flandrum innuat; & 2^o testetur se adolescentem admodum, ac nullâ dignitate spectabilem; sed sub Præpositi dominio adhuc constitutum, cùm scriberet; & 3^o denique nonnisi post institutas à Gerardo magno *Devotorum* Congregationes, id est anno circiter 1410. se libros suos edidisse sæpiùs significet.

Vide 1. part.
s. 4. 5. 6. 7.

Atque his quidem, quæ penè satis constant ex superioribus, adversum Gersensem contenti esse poteramus. Sed hîc interpellat nos Delfavius, magnificentissimè prædicans, plura & vero ingentia admodum argumenta & momenta in sua sibi causâ suppetere : itaque aliquantulum interest, ut illa in sequentibus tribus capitibus breviter expendamus.

CAPUT II.

Discutiuntur argumenta, quæ Joanni Gerseni extrinsecus adminiculi dicuntur.

ARGUMENTA, inquit Delfavius, „ quæ Joannem Gersensem de Cana- „ baco, Abbatem Sancti Stephani Ver- „ cellensis, esse autorem librorum de Imi- „ tatione Christi probant, ea duplicis „ sunt generis. Quædam enim ei extrin- „ secus adminiculantur, quædam verò „ ex ipso libello, seu ex visceribus causæ „ eruuntur. Juvat itaque modò quænam illa sint, & quanti momenti primi generis argumenta videre, de aliis postea dicturi.

- » Ea sunt, inquit, primò Codices in-
 » numeri. 1. est Codex *Sancti Udalrici apud*
 » *Augustam Vindelicorum* anno 1437. 2. Co-
 » dex *Weingartensis* anno 1433. 3. Codex
 » *Mellicensis* anno 1434. 4. Codex alter
 » *Mellicensis* anno 1421. 5. Codex *Leodien-*
 » *sis* anno 1417. Damus omnes illos Co-
 » dices ætatis ejus esse, quæ hîc assigna-
 » tur: hoc unum vel ex ipso Delfavio
 » contrà reponimus, illi omnes cùm sint
 » anonimi, addam & Thomæ posteriores,
 » Gerseni non militent.
- » 6. Codex *Salsburgensis* anno 1463. cum
 » hac inscriptione, *Joan. Gers.* 7. Codex
 » Monasterii *Sancti Germani à Pratis* cum
 » hac inscriptione, *Incipit libellus Magistri*
 » *Joannis Gerson.* Sed hi duo Codices ne-
 » dum etiam ipsi militent, contra ipsum
 » manifestè pugnant.

Sed quæras quid igitur tot Codices
 ad rem quâ de agimus prorsus inutiles,
 simul cum inscriptionibus, ætate, for-
 mâ, numero, operculis, membranâ,
 papiro, autore, loco, patriâ, tanto ap-
 paratu, initio, medio, & fine libri sui
 singillatim à Delfavio recensentur?
 Quid nisi ut saltem memoriæ lectoris
 interponendo res superfluas obstreperet,
 &

& ingeniis tardioribus (qualia in hominibus plura sunt) videretur dicere aliquid , cùm nihil dicat.

Pergit 8. *Codex Gerardi Montensis*, „ scilicet , qui etiam anonimus est , & non continet nisi Thomæ Kempensis opuscula. Unde ætatem suam , quâ dicitur ante annum 1400. scriptus , falsi evidenter convincit: unde etiam Gerseni non magis quàm alii superiores militat.

9. *Codex Padolironensis* Achronus „ cum hac inscriptione , *Incipit liber Joannis Gerseni primus de contemptu mundi.* „ *Codex Allatianus* Achronus similiter „ hunc titulum præferens , *Tractatus Joannis de Canabaco de Imit. Ch.* *Codex Cavenensis* Achronus etiam & anonimus , in „ cujus , inquit , prima litera Q. imago Monachi repræsentatur. Huc pertinet *Codex* continens plura opuscula , inter quæ „ est liber de Imitatione impressus Venetiis anno 1501. in cujus fine hæc habentur : *Joannis Gerson Cancellarii Parisiensis de contemptu mundi libri quatuor , unà cum tractatu de meditatione cordis feliciter „ finiunt ; & mox sequitur manuscripto „ caractere , hunc librum non compilavit „ Joannes Gerson , sed D. Joannes* „

„*Abbas Vercellensis*. Atque hæc est quadriga aurea triumphatrix, uti Caietanus aiebat, quâ Joannes Gersen vehitur. Verùm plurimùm doli & fuci in hac quadriga triumphatrice inesse quatuor hæc probant.

Primò, qui primus Codices hos quatuor produxit, est Constantinus Caietanus, quem, ut antè dixi, docti penè omnes pro fabulatore habuerunt, Naudeus, inquam, Leo Allatius, Lucas Holstenius, Petavius, Chiffletius, Suarezius Vasionensis Antistes, Antonius Gallonius, &c. Extantque eorum hac de re epistolæ & instrumenta publica dudum edita, quæ certè à me dicuntur invito, quamquam non tam hæc ego, quàm causa causæ responderet.

*Parisiis apud
Sebast. Cramoisy
anno
1652.*

*Extat hac de
re instrumen-
tum pu-
blicum & se-
piùs Parisiis
editum apud
Sebastiarum
Cramoisy an-
no 1649. &
1652.*

2°. Jam olim Romæ, anno videlicet 1641. coram Eminentissimo Cardinali à Balneis, coram testibus & Notariis à viris eruditione & probitate commendatis, Naudeo scilicet, & aliis, falsi convicti sunt illi Codices.

3°. Cùm ab illo anno 1641. quo Romæ hæc acta sunt ad annum 1652. id est per decem circiter annos, inter R.R. PP. Benedictinos Sancti Germani &

Naudeum vehementiùs controversia exarsisset : eoque pervenisset , ut ubique à RR. PP. Benedictinis summi flagitii in re litterariâ perpetrati accusaretur Naudeus ; ipse verò Naudeus nihil à se contra veritatem in accusandis falsi Codicibus illis, aut dictum , aut factum esse contenderet : quin semel & iterùm, sive apud Prætorem Urbanum, sive in amplissimo Senatu verbis expressis & scripto sæpiùs sponderet , se sufficienti fideijussore interposito, lampadem aut donarium aliquod argenteum quinquaginta pondo , Ecclesiæ Sancti Germani appensurum : quoties manuscripti illi Codices Gerséniani bonâ fide ab illis repræsentati non eodem prorsus modo se habere ab idoneis iudicibus deprehenderentur, quo toties ab illo designati erant : cùm , inquam , ita arderet ultrò citròque controversia , & ab amicis, à Canonicis Regularibus, à Senatu, ab omnibus efflagitaretur, producerent tandem RR. PP. Benedictini illos M. SS. Codices, sic litem omnem hoc uno facto dirimi posse ; nunquam tamen tunc ausi sunt illos exhibere. Interim verò à quatemario ingentes admodum libri

adversum Naudeum conscribebantur, in quibus quod lectu festivum est, uno in loco vitium in Codicibus agnoscebat; alibi integros esse contendebat. Modò Romæ asservari aiebat in Bibliothecâ Anicianâ, modò penes Naudeum detineri asserebat. An non nimium est, quod ex his ab omnibus intelligitur? Hoc enim unum ab hominibus æqui ac candoris amantibus proponitur. Aut vera erat Naudei relatio de codicibus falsi accusatis, aut falsa.

Sin vera (cùm veritatem nec spatia temporum, nec conatus hominum immutare unquam possint) quid est quod nunc iterum Naudeo mortuo, & post annos viginti producuntur? Quid est quod per falsos testes innocentissimi viri Thomæ de Kempis, de Religione Christianâ tam benè meriti, gloria & laborum fructus palàm attentantur?

Sin autem hæc Naudei relatio falsa fuit, cur toties ab hoc æmulo lacessiti, à Canonicis Regularibus rogati, à Senatu jussi, Codices illos proferre nunquam ausi sunt, & oculis judicum exponere? Ut si integri, si puri, si fraudis & doli erant expertes, nulla ampliùs de il-

lis controversia moveretur. Naudeus verò de iisdem M. SS. Codicibus, aut perfunctoriè examinatis, aut malignè damnatis ludibrium se debere viris omnibus litteratis (quod valdè volebat Quatremarius) fateri coactus esset, & RR. PP. Benedictinis satisfacere cum summâ nominis sui infamiâ, librarumque mille & quingenta rum multâ.

An Codices illos tunc se Parisiis habuisse pernegabunt, & Romæ fuisse obtendent, locorumque ac viarum longinquitatem causabuntur? At decennium duravit hæc controversia, ut Codicum exportationi tempus nimio plus suffecerit. An sumptuum afferent magnitudinem? At ære proprio sumptibus his omninò facturum se satis scripto etiam spondebat Naudeus. Sed ne diutius altercemur, Codices hos Parisiis in Bibliothecâ Sangermana tunc extitisse refert Lanoïus, cum ait præcipuum eorum sibi tunc temporis (ut mox dicam) amicè ostensum esse, unde de aliis facilis est conjectura.

Non est igitur quòd Naudei relationem falsitatis insimulare possimus, cum tanta adversariorum tergiversatio, &

tam diligens M. S. S. Codicum occultatio hanc verissimam fuisse plus nimio probet. Sicque profectò à prudentissimis Curiaë Parisiensis iudicibus existimatum est, à quibus Pseudogersen, cum hac suâ aureâ & triumphatrice quadriga limine pulsus est, & in medium deinceps solenni Edicto prodire prohibitus; ut jam profectò mirum sit tam contentionum ac litium avidos homines aliquos esse, ut quiescere posthac non quiverint, sed adhuc tumultuari, novasque rixas in re ex sese levissimâ serere voluerint.

*Unus & idem
est Codex, ut
patet ex Cais-
sano p. 95.*

4. Denique ultimum argumentum, quo falsi convincuntur Codices illi, ex eo colligitur, 1^o. quòd Codex Mantuanus, sive Codex Monasterii Sancti Benedicti de Padolirone, qui in instrumento decimus recensetur, in inscriptione suâ doctissimis & illustribus examinadoribus omninò sanus visus est. Sic enim in eo instrumento refertur Codex Padolironensis ita inscriptus est : *Incipit liber Joannis Gersen, primus de contemptu mundi & de Imitatione Christi; & in fine Codicis, Explicit liber quartus Joannis Gersen de Sacramento, Eucharistia; in qua inscri-*

petrone sana est omnino scriptura, & nulla. " falsi legitima suspicio apparet, neque in " subscriptione. Atqui non solum Romæ " anno 1641. maxima in inscriptione hujus Codicis falsi suspicio Naudeo apparebat, ut constat instrumento publico hac de re tunc temporis facto : sed etiam Parisiis anno 1652. doctissimo Lanoïo, qui tunc ab adversariis stabat, non omnino sana hæc inscriptio videbatur : sic enim in libro Gallicè tunc temporis ab illo edito paginâ 9^a. candidè refert. Sur ce sujet, je diray ce que j'ay remarqué dans un manuscrit d'un Livre de l'Imitation, qui est en l'Abbaye de Saint Germain des Prez, & qu'on me dit estre celui de Mantouë. Le titre est tel : Incipit liber Joannis Gersen primus de contemptu mundi & Imitatione Christi. La fin est telle : Explicit liber quartus Joannis Gersen de Sacramento Eucharistiæ. J'ay observé trois choses dans ce titre ; la première, que ces paroles, Liber Joannis Gersen primus, estoient écrites d'un rouge plus reluisant que les autres ; la seconde, que la ligne du papier sur laquelle ces paroles, Incipit liber Joannis Gersen, sont écrites, est un peu brunie, ce qui s'étend jusques au dessus de

la ligne; la troisième, que cette tache & souilleüre de papier va bien au dessus du mot de Gersen. Atque ex hac relatione viri fide dignissimi docemur in bibliothecâ, Sancti Germani à Pratis hos Codices, ut ante dixi, fuisse & latuisse tunc temporis, cùm adeo vehementer eorum exhibitio expostulabatur, ut si legitimi & illibati fuissent, certam Gersenistarum rebus conclamatis victoriam afferre, suum verò dedecus & infamiæ notam auferre primo statim aspectu possent. Docemur etiam veram causam quamobrem sic latuerint, & in publicum prodire nunquam tunc ausi sint, nempe nondum rubrica eorum & minium satis erant diluta. Proptereâ dandum illis otium, ut post annos viginti re jam satis maturâ prodirent, & dici posset: *In inscriptione Codicis Padolironensis sana est omnino scriptura, & nulla falsi legitima suspicio apparet.* 2°. Fraus & corruptelâ hujus & aliorum Codicum ex eo colligitur, quòd in fine primi horum M. SS. videlicet Padolironensis, vel ipso Caetano fatente in concertatione suâ, pro Joanne Gersene editâ anno 1618. etiam eâdem manu habebatur Joannis Gerse-

nis Parisiensis Cancellarii Epitaphium
sex versibus cum hac insigni corruptelâ
comprehensum:

*Magnum parva tenet virtutibus urna Joannem.
Præcelsum meritis Gersen cognomine dictum
Parisius celsæ Professor Theologiæ
Claruit Ecclesiæ qui Consolarius anno
Milleno Domini centum quater atque viceno
Nono, luce petit superos Julii duodenâ.*

Quis enim jam ex hoc vitiato & corrupto Epitaphio Joannis Gersonis, qui Ecclesiæ Parisiensis olim Cancellarius extitit, & obiit 1429. die duodecimâ Julii; quis jam, inquam, non faciliè deprehendat, quemadmodum hîc pro Gerson *Gersen*, & pro Cancellarius turpi & crassâ corruptelâ *Consolarius* repositum est. Ita reliquos M. SS. omnes Codices in quibus nomen Joannis Gersen jam legitur, haud dubiè similiter viciatos ac corruptos esse, & olim nomine Joannis Gersonis insignitos fuisse; sed litteram *o* in voce Gerson, corruptoris alicujus manu exiguâque gladioli alicujus operâ, in *e* fuisse immutatam? Unde *Vide Pref.* prorsus *Aronensis* & *Slusiani* Codicis, qui nomen etiam Joannis Gersen præferunt, fides labefactatur.

Nec vacat, nec libet in hujusmodi M. SS. Codicum fraudibus retegendis diutiùs immorari; præstat fortè videre an major sit fides in autoribus qui Joanni Gerseni dicuntur adstipulari.

CAPUT III.

Discutiuntur reliqua argumenta, quæ extrinsecùs Gerseni de Canabaco favere dicuntur.

» **A**D MINICULANTUR etiam Gerseni, inquit Delfavius, autores plerique. Enimverò istud efflagitamus, & ab adversariis vehementiùs postulamus, ut vel autorem unum proferant, qui ante Caetanum, hominem istum Joannem Gersensem unquam & usquam in humanis egisse testetur.

» Franciscus Augustinus ab Ecclesiâ, inquit Delfavius, in suo Chronico Pedemontano, in Indice Vercellensium Abbatum, disertis hæc habet verbis: *Joannes Gersen, qui eruditissimum tractatum de Imitatione Christi composuit.* At, inquam, Augustinus ille ab Ecclesiâ totis quadringentis annis distat à Gersene; scri-

bebat enim ætate nostrâ anno 1648. Et volunt Gersensem anno 1220. floruisse, nec ullum eorum quæ narrat vadem profert Franciscus Augustinus. Unde ergo ei licet alioquin clarissimo & doctissimo, fides hac in parte haberi potest? Deinde idem Augustinus in Indice suo *Scriptorum Sabaudie & Pedemontanorum*, quem anno 1614. edidit, nusquam meminit Joannis istius Gersenis? scilicet nondum animi deceptus fuerat ex operibus Cætani. Et certè in eo gravissimè ab illo erratum esse evidentissimè vidit doctissimus Ughellus. Unde, ut suprâ diximus, in recensendis claris pietate & doctrinâ Vercellensis civitatis Abbatibus à Francisci Augustini ab Ecclesiis sententiâ (cujus fidem aliàs imprimis sequitur) prorsus discedit, nusquamque Joannis Gersenis meminit. Immò ipsemet Augustinus ab Ecclesiis tandem vidit se in hoc suo Chronico Pedemontano anni 1648. errasse, cum asseruit Joannem aliquem Gersensem Sancti Stephani Vercellensis anno 1220. Abbatem fuisse, & autorem librorum de Imit. Chr. Unde in ultimâ suâ Vercellensi historiâ quam anno 1657. edidit,

& in quâ de illustribus pietate & doctrinâ viris fusè admodùm differit, priorem hanc suam de Joanne Gersene narrationem, ut fabulosam omnino præteriit.

„ Augustino ab Ecclesiis adstipulatur,
 „ inquit, Joannes Baptista Modena in suâ
 „ historiâ Vercellenâ. At etiam ætate nostrâ is vixit. Quid igitur certi & indubitati sine gravi & antiquo fidei aliquo jussore de Gersené, à quo totis quadringentis annis distat, testari potest? deinde ubinam extat talis historia Vercellensis? M. SS. inquit, Codicibus continetur. Nempe quia domi facilè nascuntur; semper præsto adsunt adversario nostro M. SS. Codices aliqui, qui quidvis testentur. 3°. Denique constat instrumeto publico testimonium hoc Joannis Baptistæ Modenæ Parisiis anno 1649. confictum esse.

Editum est illud instrumentum Parisiis apud Sciast. Cranoisy anno 1652. & extat in Bibliotheca Sangeroviana.

„ His accedit, inquit, Ferdinandus
 „ Ughellus in suâ Italiâ Sacrà. At, inquam, etiam ætate nostrâ is vixit. Scribebat enim Ughellus anno 1652. deinde istud ejus testimonium eâ fide profertur, quâ multa alia hætenus adducta sunt, id est nullâ. Unde Gersenis & Gersenistarum causa prorsus labefactatur. Elegantissi-

mè enim Tertullianus : *Quidni falsum*, *L. de anima*
cujus testimonium quoque ex falso est? quo-
modo credam non mentiri eum, qui menti-
tur ut credam?

Sequuntur, inquit, inclito agmine "
 Eminentissimus Cardinalis Bellarminus, "
 Antonius Possevinus, Rossiniolius, Maio- "
 lus, Clarissimus Michaël Marillacius "
 Franciæ Procancellarius. En quid scri- "
 psit Bellarminus ætate nostrâ, & anno
 1613. *Communiter opus de Imitatione ad-*
scribitur Thomæ de Kempis, viro admodum
pio: sed valdè probabile est, autorem illius
Opusculi, esse Joannem quemdam Abbatem
de Gerssen, sive de Gessen, ut habet inscri-
ptio in codice M. S. S. qui asservatur in Mo-
nasterio Aronensi, quod olim fuit Monacho-
rum Sancti Benedicti, & nunc est domus
Novitiorum Societatis Jesu. En etiam quid
 Possevinus scripsit anno 1606. *Etsi nos*
secuti communem opinionem libros de Imi-
tatione Christi Thomæ de Kempis tribuimus;
facere tamen haud possumus quin huc adjiciamus
quæ à Bernardino Rossiniolio Socie-
tatis nostræ Theologo accepimus. Sic enim ille
refert. Joannes Abbas de Gessen vel de Ger-
ssen scripsit aureum illum de contemptumundi
libellum. Ita habetur in exemplari M. S. S.

quod in Monasterio Aronensi, quæ nunc est domus Probationis Societatis Jesu, ex vetustâ Bibliothecâ reliquum. Ex quo etiam intelligitur hunc Abbatem fuisse Sancti Benedicti Monachum, cujus extitit Monasterium. Vides, Lector, Bellarminum, Possevinum, & Rossiniolum, idcirco tantum recessisse à communi illâ opinione, quâ libri de Imitatione Thomæ tribuebantur, eosdemque libros propterea ascriptisse Joanni Gerseni sive Gessenii Abbati Benedictino, quod existimaverint codicem illum Aronensem relictum fuisse ex antiquâ Bibliothecâ Patrum Benedictinorum, quorum olim fuerat domus illa Aronensis, antequàm ad R. R. P. P. Societatis Jesu pertineret. Unde si labat hoc fundamentum, profectò & id quod superstructum est concidat necesse est. Audiamus itaque Maiolum : siquidem ad ejus testimonium provocant adversarii. Ego Andreas Maiolus Presbyter Societatis Jesu, testificor me anno 1579. cum Genuâ proficiscerer Aronam, ad domum Probationis Societatis Jesu, ut in eam admitterer, detulisse mecum codicem M. SS. de Imitatione Christi, sub nomine Joannis Abbatis de Gessen sive Gersen, quem in domo pater-

*na reperi : nec scio unde venerit, eumque reliqui Arona in eadem domo, ubi conservatus est multos annos, & inde accepit nomen Aronensis codicis à P. Rosignolio & aliis qui legerunt Arona; & ignorantes, quòd ego illum attulerim, existimarunt ibidem ab antiquis Monachis, qui illud Monasterium inhabitaverunt, esse relictum; in quorum fidem hoc testimonium meâ manu subscripsi. Cremonæ die 28. Jan. 1617. Vides hoc Maioli testimonio, quod admittit Delfavius, quid de Bellarmini, Possevini, & Rosignolii opinionibus sit sentiendum. Porro in hoc codice lib. de Imitat. modò Gersenis modò Gessenis nomine inscribuntur, propterea quod ex alio codice nomine Gersonis insignito exscriptus est ab Amanuensi quodam haud planè capiente quid scriberet, ut satis innuit ipse Caetanus in longo illo indice errorum qui in Aronensi codice reperiuntur; quem indicem Romæ anno 1644. edidit. Clarissimus etiam Marillacius in libello suo Gallicè edito de autore librorum de Imitatione ait se ejusdem Aronensis codicis autoritate permotum ad partes Gersenis aliquomodo inclinasse, sed tamen mox addit : *Je ne donne pas**

néanmoins entièrement ma créance à Gersén, parce que je le vois si peu assisté des autres circonstances, que je ne puis pas encore lui attribuer le livre de l'Imitation de Jéssu-Christ : si bien qu'à mon avis ce livre n'a point jusques icy d'Auteur plus assuré que le Saint Esprit. Sed ad id redeo, quod capitis hujus initio dixi, etiam atque etiam rogamus adversarios, ut vel autorem unum proferant, qui ante Cætanum & ætatem nostram quidquam de isto suo Gersene toto illo quadringentorum annorum spatio quod inter nos & illum intercedit, unquam & usquam scripserit. Quamdiu enim ab illis hoc non erit præstitum, tamdiu à nobis hæc eorum de Gersene Canabacano narratio pro fabulâ habebitur.

„ Sed pergit Delfavius, quantò obscurius ab antiquis est nomen Gersenis,
 „ tantò illius causa est potior. Mirum fac-
 „ nè! Quis enim, inquit, Facundum, quis
 „ Agobardum, quis denique Guibertum
 „ noverat ante eorum libros hoc tempo-
 „ re editos? Sed quid hic? aut estne pruden-
 „ dens, qui tam secum pugnancia & contraria
 „ adinvicem confert? Nam Guibertum
 „ quod attinet, ex Clarissimo viro

Luca

Luca Dacherio coasceta suo potuit facile rescire, an ipsius nemo ante libros suos hoc tempore editos meminisset. Et de Agobardo quot extarent veterum elogia, potuit ab erudito Stephano Balusio, & Papirio Massono, qui Archiepiscopi hujus Lugdunensis opera ediderunt, edoceri. Denique de Facundo quæ & quot antiquissimorum autorum essent testimonia, potuit videre in editione illâ quam doctissimæ Societatis lumen illud ingens, Ecclesiæque Gallicanæ decus & ornamentum Jacobus Sirmondus adornavit, ut profectò hic omnino desideretur Delfavii prudentia, fictitium Gersensem suum, omnibus retrò sæculis incognitum, cum Guiberto, Agobardo, & Facundo, viris multorum veterum autorum sermonibus & laude celebratissimis comparantis.

C A P U T U L T I M U M.

Discutiuntur argumenta quæ ex ipso libello crui, & Joanni Gerseni favere dicuntur.

ARGUMENTA, inquit Delfavius, " quæ ex ipso libello eruuntur, ea "

» sunt ut minimùm tria, autoris videlicet
 » antiquitas, vitæ institutum, & dignitas,
 » quæ omnia in Gersenem ad amussim
 » quadrant.

» Ætas imprimis : nam autor ipse in-
 » nuere videtur, se non multò post obi-
 » tum Sancti Francisci, qui anno 1226. in
 » cælum migravit, & anno 1228. in San-
 » ctorum album relatus est, huic de Imi-
 » tatione Christi scriptioni animum adje-
 » cisse; nam beatum Franciscum velut
 » in vivis agentem appellat his verbis de
 » præsentī: *Quantum unusquisque est in ocu-*
 » *lis tuis, tantum est & non amplius*, dicit
 humilis Sanctus Franciscus. Quando ista
 diceret, & sic ratiocinaretur Delfavius,
 nisi non habendo quæ diceret? Nam si
 ista ejus consecutio valet, igitur, in-
 quam, autor de Imitatione, scriptioni
 suæ animum adjecit adhuc in vivis a-
 gente Christo Domino; ipsum enim,
 ut verbis ejus dicam, velut in vivis
 agentem appellat, his etiam de præsen-
 ti verbis: *Qui sequitur me, non ambulat*
in tenebris, dicit Dominus.

Porro de hac alia temporis circun-
 stantiâ quâ vult ætate Thomæ Religio-
 sos Ordines, atque imprimis Cisterciē-

ses, à fervore primo longè deslexisse;
Cum contra, inquit, temporibus Gersenis,
seu anno 1220. aut 1230. florent, satis 2. p. cap. ult.
 suprà dictum est.

Quod deinde attinet, inquit, ad vi-
 tæ institutum, autor Monachum se in-
 digitat. Demus hoc. Sed quid istud Ger-
 senem juvat? An usquam autor se Mo-
 nachum Benedictinum indigitat? An
 non suprà demonstratum est nomen
 istud à Thoma Kempensi non esse alie-
 num, seque, suosque hoc nomine sæ-
 piùs appellare? Unum ex tot præceden-
 tibus testimonium hîc referam. *Quæ* In Chron. suo
Religio, inquit, vita vel nomine clara Mo- cap. 22.
nachos præstantes non habuit, præcipuè ta-
men Regulares cum Benedictinis, Cruci-
feris, & Cisterciensibus? unde & à Pir-
kamero hoc nomine appellatur. Fuit re-
verà, inquit, Thomas de Kempis Profes-
sus Monachus fratrum Ordinis Canonicorum
Regularium, vir Sanctitate & doctrinâ exi-
mius.

Abbatem denique & canâ senectute
 spectabilem fuisse conicere est, inquit,
 ex variis formulis, quas nonnisi è su-
 periore loco proferre queat vir mode-
 stissimus. Immò, inquam, autor pror-

sus contrarium sæpius significat ; nam & suprâ à nobis evidenter ostensum est, ipsum disertè innuere se quartum & ultimum de Sacramento Altaris libellum statimatque Sacerdos consecratus est, scripsisse. Sic enim de seipso loquens cap. 5. *Attende tibi*, inquit, & *vide cujus ministerium tibi traditum est per impositionem manus Episcopi ; ecce Sacerdos factus es, & ad celebrandum consecratus ; vide nunc ut fideliter & devotè in suo tempore Deo Sacrificium offeras, & teipsum irreprehensibilem exhibeas. Non alleviasti onus tuum, sed arctiori jam alligatus es vinculo disciplina & ad majorem teneris perfectionem sanctitatis.*

Et in l. 3. sæpiùs evidenter significat se adolescentem, & sub Præpositi dominio, ut loquitur, ac potestate constitutum, & inter adolescentiores Religiosos ad virtutem adhuc solitum informari & exerceri, cùm librum hunc componeret, ne dum canâ senectute, & amplâ Abbatis dignitate spectabilis tunc esset : sic enim de seipso loquens c. 24. *Quid te implicas*, inquit ? *non indiges respondere pro aliis, sed pro teipso rationem reddes.* Et c. 13. *Quia adhuc nimis inordinatè te diligis, ideò plenè*

te resignare aliorum voluntati trepidas. Et cap. 32. Deus in ipso inordinatum hunc amorem arguens, Utinam, inquit, sic tecum esset, & ad hoc pervenisses, ut tui ipsius amator non esses, sed ad nutum meum purè stares, & ejus quem tibi præposui patris. Et cap. 49. per totum, & in primis num. 5. Quia non audes resistere altiori potestati sub dominio constitutus, ideo tibi durum videtur ad nutum alterius ambulare. Et cap. 52. istud etiam disertissimè innuit, cùm ait: Domine, ego nihil boni me egisse recolo, sed semper ad vitia pronum, & ad emendationem pigrum fuisse. Verum est, negare non possum: in veritate confiteor, quoniam dignus sum omni ludibrio & contemptu, nec decet me inter Devotos, (sic Canonicos Windesemenses & Montis Sanctæ Agnetis appellari solitos suprâ ostendimus) commorari. Et licet hoc ægrè audiam, (à Præpositis nempe suis istud ipsum illi virtutis in piissimo adolescente exercendæ causâ sæpiùs exprobrantibus) tamen adversum me pro veritate peccata mea arguam, ut facilius misericordiam tuam merear impetrare. An hæc omnia in virum amplâ quâdam Abbatis dignitate conspicuum, & canâ senectute

spectabilem valdè & venerandum ad
amissim quadrant?

„ At, inquit Delfavius Hi, Thomæ
„ Kempensis nomini atque modestiæ pa-
„ rum consulunt, qui rudem adhuc tiro-
„ nem talia locutum esse confingunt l. 1.
„ c. 22. *Benè opus esset quod adhuc iterum*
„ *institueremur, tanquam boni novitii ad mo-*
„ *res optimos, si fortè spes esset de futurâ*
„ *emendatione.* Hui! tam citò non ego
„ eam contumeliam Thomæ inferam, ut
„ cum à primævo fervore statim recessisse
putem. Atqui, inquam, eodemmet lo-
co, & in verbis hæc antecedentibus di-
sertè tradit, non diu esse quòd vitam
Religiosam professus esset, cùm hæc ex-
citandi sui causâ scriberet; sic enim ha-
bet: *Quid fiet de nobis in fine, qui te*
„ *descimus tam mane? Va nobis, si sic volu-*
„ *mus declinare ad quietem quasi jam pax sit*
„ *& securitas, cùm nec dum appareat vesti-*
„ *gium veræ sanctitatis in conversatione no-*
„ *strâ. Benè opus esset, quod adhuc iterum in-*
„ *stitueremur tanquam boni novitii, &c.*

Atque ex his omnibus satis superque
palàm oculis omnium ostenditur, mul-
ta ab adversariis in propugnandâ Ger-
senis de Canabaco fabulâ, scripta esse,

quæ si saltem nobis admonentibus considerare non negligant, etiam sibi ipsi interdum quantumlibet sint in suâ sententiâ obfirmati, erubescant. Neque, opinor, deinceps errores Caietani, qui in hac quâ de agimus causâ multum homo fuit, & humani plurimum passus est, præstare in se recipient; sed eligent majorum suorum, RR. scilicet PP.

Benedictinorum Sancti Germani à Præ-
 tis Parisiensibus, exemplum sequi; qui
 olim non semel dumtaxat, anno nempe
 1521. sed & iterum anno 1523. unâ cum
 RR. PP. Carthusianis & Celestinis li-
 bros de Imitatione Christi nomine Tho-
 mæ Kempensis Parisiis edendos procu-
 rarunt. Quod demum facere si perfra-
 ctè renuent, patiantur saltem de eâ re
 quæ nos multum non molestat, ulte-
 riùs non certare. Inter illos & nos hoc
 quod caput est omnino convenit libelli
 hujus *Autorem*, ut clarissimus Franciæ
 Procancellarius Marillacius aiebat, *pri-*
imum ac præcipuum esse Spiritum Sanctum,
quod scire sufficit, etsi alius autor ejus igno-
retur. Est enim hoc à Gregorio Magno
 scriptum sapienter: *Si magni cujusdam*
viri susceptis epistolis legeremus verba,

*Extant etiam-
 num hujus-
 modi editio-
 nes.*


*In libello suo
 de autore lib.
 Imit. Chr.*


*Pref. in exp.
beati Iob.*


eaque quo calamo fuissent scripta quaeremus; ridiculum profectò esset, si non epistolarum sensum cognoscere, sed quali calamo earum verba impressa fuerint, indagare studeremus. Cùm ergo rem cognoscimus, ejusque rei Spiritum Sanctum autorem tenemus; cùm scriptorem quarimus, quid aliud agimus, nisi legentes litteras de calamo perscrutamur? Quod facere ab autore etiam nostro prohibemur: Non quæras, inquit, quis hoc dixerit, sed quid dicatur attende.

Lib. 1. cap. 5.


FINIS.













B.46.

XL11
D20